

## ԱՇԽԱՆ ԱՐԵՎ

Մոսկվայից, Ծնակուտի վրայով, Երևան են հասնում մի 100 բռ-պետմ, իսկ Ծնակուտից Երևան հասնելու համար պետք է գնալ մի ցերեկ ու մի գիշեր:

- Մեր գյուղը, խնամի ջան, հեռո՞ւ, հեռու...
- Էնպես էս ասում հեռու, կարծես Յայաստանից դուրս է:
- Յայաստանից դուրս է, աշխարհից էլ դուրս է:

Այնտեղ օրերով ու տարիներով բազեն անում է նույն շրջանը գյուտի ու հավերի գլխին, բլուրների արանքից կարկուտը փախս է ընկնում՝ ջարդելու արտ ու լոր, քամին շպրտում է փեթակների տանիքները և փեթակների մեջ անձրև է լցվում, ձին բերելու գնացած Երեխան ձորի այս լանջին նոլորվում է, մյուս լանջին կանգնել է թաց ձին, իսկ ձորը լցվել է սև հեղեղի վշշոցով, հարյուր տարի է ճաք է տվել մեծ ժայռը և չի փլվում ու չի փլվում, և մարդ չգիտի՝ տունը ժայռատակի տափարակի՞ն սարքի, թե Սիմոնի տնից վերև, բացատի եզրին: Իսկ եթե ոչ այնտեղ, ոչ էլ այնտեղ, այլ, հազիվ առիթ է, չեղած բեռները կապի ու քոչի Երևա՞ն: Սիմոնի գործերը լավ դասավորվեցին, Երևան տղա ունի, իսկ շոգերից փախչելու հարցն էլ՝ Ծնակուտը քեզ պատրաստի ամառանց: Աղունը նպատակին հասավ. հարս գալու օրից՝ քաղաք, քաղաք, քաղաք, ուզածն էլ ընդամենը Մանացի պես մի բան էր, իսկ ահա քսանիինգ տարեկան տղա ունի Երևանի պես տեղը:

- Մերո՞ւ:

Փառանձեմին պարտք մնաց Երեսուն ձու: Են անգամ որդին ասաց. «Զուն տասը կոպեկ է, շուկան քթներիս տակ է»: Չի հասկանում, թեռուն է քաշել, երբեք էլ լավ չի ապրի, փող հաշվել չգիտի, բուռ-բուռ ստանում է, բուռ-բուռ էլ ծախսում: Նրա կինը պիտի տնտես լինի:

– Մերո, իինգ հարյուր ձուն տասը կոպեկով ինչքա՞ն փող է անում:

- Որ ինձ հետդ չես տանում՝ ես էլ չեմ ասի:
- Թվաքանությունն սովորեցի՞ր: Էր ի՞նչ էս կարդում:
- Որ ինձ հետդ չես տանում՝ քո գործը չի:
- Սի թղթի վրա գրիր Երեսուն ձու Փառանձեմին:
- Որ ինձ հետդ չես տանում՝ ես էլ չեմ գրի:
- Վեր թոիր տեղիցդ... Գնա տես են ձին արածո՞ւմ է, թե խճճվել է:

Թվաբանությունից որդին էլ թույլ էր: Քննության էր գնալու, փայտ էր ջարդում, ոտքը կտրեց: Խոր չեր կտրել, բայց որ քննության էր գնալու՝ լաց եղավ. «ցավում է, ցավում է, ցավում է»: Սիրանույշն ասաց՝ «Աղավնի, տուժած կին ես, նշանակում եմ, բայց առանց թվաբանության երեխադ ապագա չի ունենա»: Ինքն ասաց՝ «Եթե Վանքերի կողմին է քաշել՝ չի կորչի, իսկ եթե, Սիրանույշ ջան, ծնակուտեցի է՝ թեկուզ հանրահաշվից էլ ուժեղ լինի»: Սիրանույշը տեսնես կարդո՞ւմ է նրա հոդվածները: Վազգենը կարդում է ու չի հավանում. «Եթե գրեմ, ես նրանից լավ կգրեմ»: Փսփսան, թանաք էլ ունենք, գրիչ էլ, գրի...

– Սերո:

– Ի՞նչ է:

– Պրոֆեսոր Սերո ջան, գրեցի՞ր երեսուն ձու Փառանձեմին:

– Որ ինձ հետո չես տանում՝ ես պրոֆեսոր չեմ:

– Ես էլ եմ ասում: Յարյուր ձու, հիսուն էլ՝ հարյուր հիսո՞ւն ձու:

– Դու ի՞նչ ես ասում:

– Ասում եմ՝ դու ոչխարած Սերոն ես:— Երբ ուբերորդ դասարանում էլ հանրահաշվից կտրվեց, Սիմոնն ասաց. «Կարգին աշխօր ու փող է գալիս, բեր, այ կնիկ, թող գնա գառնարած»: Թող գնա գառնարած... Կորիկ չկա, կամք չկա, լավ ապրելու ցանկություն չկա, կարտոլ է՝ կարտոլ էլ կեր:— Վեր կաց... ես Արմենակ եմ բանեցրել... Մի հին գիրը գտիր, թուղթը պրծավ:

Երեխան գնաց կանգնեց պահարանի դեմ, նայեց, հետո գնաց աթոռ բերելու:

– Եղտեղ անպետք գիրք չկա, բարձրացիր վերև:

– Որ ինձ չես տանում՝ ես էլ ձվերը կջարդեմ:

– Չէ-չէ...

– Կջարդեմ:

– Ուրիշ լավ բան կարո՞ղ ես:

– Որ ինձ չես տանո՞ւմ...

Արտաշը կոլխոզը կողոպտեց, կողոպտեց, իսկ տղայի բաժինքը մի գորգ էր ու մի անկողին: Բարձին ձեռք էիր տալիս՝ ինչպես փետել ենպես էլ աստարի մեջ էր լցորել նրա փնտին:

– Դե լավ, Սերոյին հետս տարա, հետո՞ւ. կովն եկավ՝ հորթը չեկավ. հերդ հանդից եկավ՝ տանը կրակ չկա, ջուր չկա... Յերդ էլ սոված սոված, ծարակ՝ ծարակ... Խոզը հանդից չեկավ, ուրուրը հավերը տարավ, Մուրադենց Ռիսաբացը հանդ գնալիս տանձենուն

փետք քաշեց. հավերը ձու ածին, ձուն վերցնող չեղավ՝ կատուն կերավ... Երևանից Եկանք տեսանք տուն չի, գոմ է – լա՞վ է...

– Ին ի՞նչ գործն է:

– Ես տանը ինչ որ կա՝ քոնն է, տունն էլ հետք, ես ու քո հերն էլ քո ճորտերն ենք, այսինքն՝ քո ծառաները:

– Պետք չեք:

– Ախաբերդ էլ էր ասում: Իսկ իմա տես, նրա համար մի ծմեռվա ուտելիք է ուղարկում նրա Սերոն: Գիտե՞ս ինչու է ուղարկում... Փաթաթիր, ասում եմ. ուղարկում է, որպեսզի համալսարանի ժամանակը գա թե չէ՝ իր Սերոյին համալսարան ընդունի... Այ, էսպես մեկ-մեկ փաթաթիր, դիր էստեղ:– Յարսը տեսնես ինչ ցեղ է լինելու. ֆշշան օձի մի տեսակ կա, շեք է անում մարդի վրա՝ «ես մարդը իմն ե»: Եղ մարդուն մայր չի ծնել, հենց էտպես պատրաստ եղել է: Փնքիների մի տեսակ կա – դու բեր, դու բեր, դու բեր՝ տունդ դատարկ է: Շեկ լիներ, բարձր լիներ, երկար ծանր մազ ունենար, ծներ առողջ երեխաներ...– Էգուց էն ճաշը կտաքացնեք, էգուց չէ մյուս օրվա ճաշը Նազիկը կգա կեփի, չքողնես յուղը շատ օցի: Էգուց չէ մյուս օրը հերդ որ գործից գա, կասես «այ հեր, ամեն օր պետական, պետական, ուրիշներն իրենց խոտերը բերել են, մեր խոտը մնաց սարում, բա որ ծյուն դրեց, դժվար կլինի, չէ», այ հեր»: Են ռադիոյի ձենը գնա բարձրացրու, լավ երգ է երգում: Ամբողջ կյանքում մի երգող տղա ուզեցի՝ խուլ ծնվեցի:

– Ախաբերը բա լավ չի երգո՞ւմ:

– Ախաբերը... ախապոր ցավը տանեմ: Երգում էլ է, գրում էլ է, ծիծաղում էլ է, լավ-լավ ընկերներ էլ ունի... Ուժ, մեջքս... Կմեծանաս, կգնաս անասնաբուժական համալսարան, կդառնաս անասնաբույժ, ծի՞շտ է, Սերո ջան, կդառնաս անասնաբույժ, և փաթաթիր և լսիր, կգաս գյուղ: Դու քաղաքում տուն կունենաս, ախաբերդ գյուղում. Ես էլ կլինեն ձեր մայրը, կնստեմ մի լավ կիանզստանամ... ձեր հայրն էլ ձեզ համար մեղու կպահի: Իսկ եթե ձեր մայրը չլինի՝ չմոռանաք, կգաք կասեք գերեզմանիս. այ մեր, մենք էն ենք, ինչ որ դու ուզում էիր: Կլսե՞մ: Գրեցի՞ր Փառանձեմին երեսուն ձու: Յողի տակ հանգիստ չունենա քո պապ Իշխանը. աշխարհը լիքը տղա՝ գնա, Աղունիկ, Սիմոնից մարդ սարքիր, գոմից տուն սարքիր, Արմենակից Արմենակ սարքիր... Սարքիր, սարքիր, հետո էլ արդեն ոչ առողջություն կա, ոչ էլ խնդալու սիրտ: Ուրիշները պալատից պալատ գնան, ինձ համար աստված Ծմակուտն էր սահմանել ու Ծմակուտ՝ Սիմո-

նին: Ծաղիկ ես, ամեն գարնան ծաղկելու ես: Կզաս, Սերո ջան, կկանգնես գերեզմանիս գլխին. «այ մեր, Արմենակը լավ է, ես լավ եմ, քո գժած ճանապարհով գնացինք»:

– Ելի սկսեցի՞ր, իինա ձուն կկոտրեմ, հա...  
– Լաց մի եղիր, դու սրանց փափուկ ցեղից չես լինելու:  
– Բա ինչո՞ւ ես դու լաց լինում:  
– Ես իրավունք ունեմ: Ձո լավ հորեղբայր Աղամը թկիցս բռնեց ու հունվարին դուրս գցեց՝ «գնա, դու ես տան համար չես». քո տատ Արուսը ամեն օր արյուն-արտասուք էր թափել տալիս, քո պապ Աբելը, խո՞ր գնա, հանդից գալիս էր ու՝ «դեռ էստեղ ե՞ս», քնից վեր էր կենում ու՝ «դեռ էստեղ ե՞ս. շան երես ունես, շան». իսկ քո եդ լավ հերը բերանը ծուռ կանգնած էր մոտները: Անունս Աղուն չէր, առնառուտ քուրդ էր, շա՞տ շատ էի ուստում իրենց չեղած հացը: Քո հորեղբար Յրաչիկ որդին մի մատ երեխա էր, սովորեցրել էին, ասում էր առնառուտ ու քարով խսում էր: Յապա՝, Սերո ջան: Իսկ իմ հորաքույր Մանիշակը... իմ հորաքույր Մանիշակը... Վեր թռիր, վեր թռիր տեղիցդ... Զանակդ ծա՞նը նստում ես քո պապ Աբելի նման, աշխարհը հնձել բերել ես: Են ձին իինա խճճվել է, թռիր: Արագ, խոր գնա քո պապ Աբելը, շո՞ւտու...

– Լավ էին անում որ ասում էին:  
– Ի՞նչն էին լավ անում:  
– Որ ասում էին առնառուտ:  
– Ապրես:  
– Բա ինչո՞ւ խփեցիր:  
– Թռիր էն ձիուն նայելու, թե չէ որ վեր կացա...  
«Աղունի՛կ»:  
– Տես, էլ առնառուտ չեմ, անուն ունեմ, անունս Աղուն է: Աղավնի է, «Աղունի՛կ»:

«Աղունի՛կ»:

– «Աղունի՛կ»: Ասա՞ ի՞նչ է:  
– Չեմ ասում:  
– Քո նանն է, թող էնքան գոռա՞՝  
– Գոռում է գոռա:  
«Աղունիկ, Աղունի՛կ»:  
– Ասա՞ ի՞նչ է:  
«Սերո, Սերո՞»:  
– Ինչ է՞:

«Մերո՞»:

– Այտա, ի՞նչ է:

«Մերդ ի՞նչ բանի է»:

– Ասա՝ գնում է Երևան, ասա՝ պատրաստության մեջ է, ժամանակ չունեմի:

– Գնում է Երևան, պատրաստության մեջ է:

– Ասա՝ ժամանակ չունի:

«Երևան է գնո՞ւմ»:

– Յա՞:

«Թող մի աչքառ դուրս գա»:

– Ասա՝ ժամանակ չունի, գրաղված է: Յիմա պետք են, իիմա անուն ունեմ, իիմա անուն Աղուն է, էլ առնառւտ չեմ: Թոիր ձիուն: Ես ռադիոն միացրած բողիր:

Քաղաքում մի բան են անում՝ ռադիոն երգում ու խոսում է, արդուկը տաքանում է, բոլոր սենյակների լուսերը վառվում են, վառարանը տաքացնում է, բայց հաշվիչը չի հաշվում, մի բան են անում՝ եղ բոլորը լինում է անփող: Լավ արադից Երջոյին մի բաժակ պիտի խմեցնել՝ հաշվիչը դարձնի քաղաքի հաշվիչների պես: Ժուռնալիստների միությունը լավ տեղ է, էնտեղ տուն շուտ կտան: Բայիհարկե, մի Յայաստան է՝ մի ժուռնալիստների միություն, իսկ ինժեներ ու անասնաբույժ ինչքան ասես կա: Լավ արեց, որ գրողական ջիղը զարգացրեց: «Դուք իհարկե բյուրոկրատ չեք և հասկանում եք, որ այդպես միայն սյուլիտի մեջ կլիմի և չի լինի կյանքում, զի սյուլիտն առանձին է, կյանքը՝ առանձին»: – Իբր ես ինչ է գրել, ով էլ ուզենա՝ էսպես կգրի, – ասաց Վազգենը, որովհետև չեր հասկացել նրա գրածի իմաստը: Սյուլիտ և բյուրոկրատ: Դեռ դպրոցում էլ դժվար բառերը նա լավ էր ըմբռնում: Ինքը նրանից սովորեց համայնական բառը և օգտագործեց Սիմոնի վրա, քանզի Սիմոնն աշխատում, աշխատում, աշխատում է սրանրա համար, իսկ վարձը՝ էգուց, եկող տարի, Երբեք: Ամբողջ աշխարհը Սիմոնին պարտը է: Չե, կուսակցության գծով էր գնալու՝ բոլորը դողային ու հարգեին: Արգումանյանն իմանար իշխանի թոռն է Կօգմեր: Իշխանի Աղունիկ աղջկա տղան: Այո, ընկեր Արգումանյան, են Աղունիկի, որ որբ էր, դպրոց չուղարկեցին, քո քույր Մարիամն ասաց՝ «լավ երեխա է, իշխան, մերացվին մի թող եղքան տանջի»: Դետո վերցրին և ուղարկեցին Ծնակուտ մարդի: Կուսակցության գծով էր գնալու, Կենտրոնից զանգահարեր՝ մայրս ի՞նչպես է:

Այս կյանքը մի անգամ է լինում, ևս մե՛ծ կանաչ աշխարհում արևի տակ մի ծաղիկ մի օր ծաղկում է ու՝ պրօավ, աշխարհը նրա համար այլս չկա: Յող ու խավար: Աստված մարդուն որ անիծեց, ասաց. տեսնես ու չհասնես: Յորս պալատները և ամուսնուս գոմը – դա աստծոն անեքըն է: Ու եթե դու էլ խոզարած լինեիր կարկուտի ու ցեխի հետ՝ կայծակը թող էր օրն ինձ խփեր:

Նա իհմա խնձոր էր դասավորում հատ-հատ կողովի մեջ և որդուն հրահանգում էր քիչ ծխել, գրելիս խնձոր ուտել, գիշերները չգրել և կուշտ քնել: Մարդ եթե երջանիկ է ապրում՝ պիտի երկար ապրի: Կողովը ծանր էր, և նրա ռունգերում թթռաց մղեղի հոտը, նա տեսավ դեղին կալերը և լիքը ջվալները, և հին ցավն օձի պես մի պահ շփշփաց փորում. պորտն ընկել էր:– Բեր բարձրացնենք, – ծիծաղելով ասաց գորի Արտաշը:

Եվ մառանի դուռը ետևից վրա բերելով, նա մտածեց, որ ամեն մարդ ապրում է իր կյանքը: Որդու ուրախությունը որդունն է, իսկ իրենը պորտի ցավն էր, կրիվն է Սիմոնի հետ, գարունների հետ՝ կարտոլի հոգսը, ամառների հետ՝ կովերի հոգսը, աշունների հետ՝ ձմեռվա հոգսը: Իսկ որդին ստանում է բուռ-բուռ և ծախսում է բուռ-բուռ: Յարսը եթե մարդորդի եղավ՝ Արմենակը մերն էլ է, եթե չեղավ՝ այդ տղային ոչ ծնել ես, ոչ սնել:

Զորից դուրս էր եկել, չափարի տակ թեքվում էր սկեսուրը: Մի քիչ տնքտնքան, բայց քայլում էր թերև՝ թերև: Ուրսուն տարեկան չի – վարսուն տարեկան է: Տասնինգ տարի առաջ զնկել է, մեջքը իբր ցավում է, տասնինգ տարի առաջ քար է տաքացրել, շալի տակ կապել մեծքին – դեռ իին տնքտնքոցն է ու իին քարը: Լավերը շուտ են մեռնում, իսկ վատերը տնքտնքում են ու չեն մեռնում: Ինքը երբ հարս եկավ՝ նա այդպես էր, ինքն ահա հասել է նրա ետևից նա դեռ այդպես է: Նրա աչքը ծանր է, որսի գնացողները եթե նրան տեսնում են՝ լուր ետ են դառնում. խոտի գնացողները սայլը ճամփից հանում են, թեքվում գյուղամեծ՝ «աշխարս տվեք Արելի պառավին». լույս դառնած Ասատուր հորեղբայրը դիվոտում էր՝ տո էլի՝ տնկվեցիր դեմս...

– Արի, խնդրեմ, – քմծիծաղ տվեց նա, – քո փետածեծը ինձ տակ չարեց, քո աչքն ինձ չբռնեց: Կա՞մ, արի:

Չեղքերը կոնքերին՝ նա պառավին սպասեց, հետո հիշեց, որ ինքը նրան արհամարհելու էր: Եվ տուն մտնելիս նա մի կողմ նետեց դոււլի ծածկոցը, որպեսզի պառավը գա տեսնի դառլրման նույնպես: Եվ

ձեռքերը կոնքերին իր ապրուստի մեջ կանգնած՝ նա հիշեց տունն այնպես, ինչպես կար բաժանքի առաջին ձմռանը, անսվաղ պատերը դեռ ջուր էին տալիս, վառարանը տաքացնում էր ինքը իրեն ու իր խողովակները, իսկ պատերի տակ՝ սառնամանիք. թաց տակաշորերի մեջ երեխան թպրտում էր, և ինքը ծղրտաց. – Իշխան: – Քամին ծուխը ետ էր տալիս, Մուրադենց Սրբուհին տղանարդու իին շապիկներ բերեց, իսկ Սիմոնը գյուղամիջում ակումբն էր սարքում, սրախոսում էլ էր, սրանք սրախոս են, ծիծաղում էլ էին, և Սիմոնը գոհ էր, որ սրախոս է: Երեխան լաց էր լինում ու լաց էր լինում, և ինքը հասկացավ... Սրբուհու բերած շապիկների մեջ ոչիլ կար, երեխան բլբրլքոտել էր ու տաքություն էր տալիս: Եվ երեխային խլելով ոջլոտ խանձարուրի միջից, ինքը թռավ գյուղամեջ ու ծղրտաց հեռախոսով. – Իշխան: – Եվ ասելիքը չեղ ասվում, որովհետև խեղլվում էր, և խպիան առաջին անգամ կոկորդի վրա ուռավ պայթելու չափ: Իսկ Սիմոնը (ակումբին տանիք էր կապում) ուրագը ձեռքին լսում էր, թե ինչ է ասում ինքը և կակազում էր ակումբի գլխից. «Այտա, ամոր է... այտա, ամոր է, հեռախոսով ոջլից ես խոսում»: Գիշերը երեխան մնաց Սիմոնի թևերին, վառարանի մոտ, իսկ առավոտյան... Սամվելիս ցավը տանեմ, առավոտ լույսի հետ դուրս քշած եկավ կարմիր կարմրած, բեղատեղերը քրտնած, վարդագույն... տասնվեց տարեկան էր Սամվելս, թևատակին քսան մետր կտոր... Սամվելիս ցավը տանեմ, լավերը շուտ են մեռնում:

Եվ մայրն ասաց որդուն Ծմակուտից Երևան.

– Կեր, խմիր, ծախսիր բուռ-բուռ, ծխիր, աղջիկ փոխիր, քո բաժին տանջանքը ես արդեն քաշել եմ:

Պառավը հասավ որդու դուռը՝ գոմը այնտեղ էր, խոզանոցը տեղում էր, փեթակները չորս գույզ ու մի կենտ էին, մի ամսվա փայտը ջարդած դարսած էր, բազրիքը ներկած էր կապույտ ներկով: – Սիմոնիս կրներին մատաշ, – ասաց պառավը:

Աղունը լի էր արտասուրով ու Սամվելով, և մյուս եղբայրներով՝ խեղճ Վարդգեսով և խմոր, կատաղած ու խեղճ Ռոկանով, Աղունը չուզեց պատախանել, թե Սիմոնի արածն այդ տան վրա ոչինչ է, որ դրանք իր ջղերն ու կյանքն են, միայն ուզգեց ասվել լացով ու խղճահարությամբ, և ծիծաղով՝ այ նանի, պիտի գնայիր եղբորդ քառասունքին, մի երեսատեղի շոր չուներ, Ասատուրի Մանիշակի շորը հագար, ու նա էլ չեղ տալիս, ու դու էլ երեսդ դեմ էիր արել, հիշում ե՞ս. քո որդիները, այ, եդ են, ու քո մարդն էլ էր:

Դույլը լիքը, իա էլի, դառւրմա էր, կողովինը տանձ ու խնձոր էր, թղթով հատ-հատ փաթաթած ծու էր, տակը տեսնես ինչ կլինի, – Աղունի՞կ, – գլուխ պանիրը՝ հինգ զույգ, ես ինչո՞ւ է էսքան հանել, ես կարա՞գն ես ինչու է էստեղ, – Աղունիկ, – ես ո՞ւր է դուրս տվել իր երեխայի ապրուստը: Քառասուն կիլո՝ մի կովի մի տարվա յուղ: – Աղունիկ:

– «Աղունիկ»: Ի՞նչ է, նանի ջան, – հոգոցով, ծաղրով ու ներելով ասաց Աղունը: – Յա, նանի ջան, – ինչպես անհասկացողներին են բացատրում՝ բացատրեց Աղունը, – ես կարագ է, ուտելու համար է, նրանը գլխի աշխատանք է, նա փետ չի կրծում, պիտի ուտի, որ գլուխն ուժ ունենա: Գրում է, գրում, – բարձրաձայնեց Աղունը և ցույց էլ տվեց, թե որդին ինչ է անում: – Ես դառւրմա է, գործից որ ուշանալիս լինի՝ երկու կտոր պիտի ուտի ու գնա: Ես ծու է, մի բանկ բան չի, հինգ հարյուր հատ. օրական տասը հատ՝ մի ամիս, հետո էլ՝ զնացողի հետ կուղարկեմ... Այո՛, նանի ջան... Յարսն էլ՝ բարձր, շեկ, առողջ, ինժեներ, ինձ համար խելքը թօցնում է, ասում է՝ կամ դու արի քաղաք, կամ ես եմ գյուղ գալիս...

Ինքը ջրից գալիս էր: Վանքի հին աղբյուրը դուրս է թօչում խեղդվելով, սառն ու ճաքուր է, կեռասը հասնում էր, Վանքերի ուղիղ փողոցում Արգումանյանի եղբայրը հեծանիկ էր քշում, աղջանուղ էր, ինքը կարմիր լիքը աղջիկ էր: Արգումանյանենց տան մոտ թեքվեց՝ իրենց դռանը իրիկնամուտի մեջ կանգնել էին երկու տղա. մեկը շարմաղ էր, ճակատը բարձր ու վիզը երկար. մյուսը սև էր ու մեծագլուխ. շարմաղը իր հորաքրոջ որդի Ներսեսն էր: Եվ ինքն զգաց, որ այդ մեծագլուխը այդտեղ պատահաբար չի: Մեծագլուխը Սիմոնն էր. գլուխն ուսին դրած կանգնել էր ու ճիպուտի ծայրով խաղում էր տրեխսի քի հետ: Ինքը վազեց տատի մոտ. «Չէ՝ տատի ջան, չեմ ուզում»: Խսկ Սիմոնը նայում էր ու խեղճ-խեղճ ժպտում: «Յավան Ե՞ս, Աղունիկ, ուզում Ե՞ս, Աղունիկ», սեղանի մոտ մի րոպե նստեց Իշխանը: «Ինչո՞ւ ես իրեն հարցնում, Իշխան, – ասաց դարպասեցի մերացուն, – իրեն որ հարցնես՝ միայն ջուր կրերի ու լվացք կանի, մարդն իր ինչին է պետք»: Ներսեսը դուրս եկավ ու պատուհանի մոտ քթերում դնողնդաց. «Դուրգար տղա է, աշխատող, խելոք, դե ինքն էլ արհեստավոր տղա է, էլի, փետի լավ գործ է անում... դե, Ծնակուտ, հորաքրոջ մոտ կլինես, ես էնտեղ եմ, ինքն էլ խելոք, աշխատող տղա է»: Սիմոնը նստել էր թիկունքը լայն ու ծնոտը ձեռքին, Իշխանը պատշգամբ ելավ. «Լավ տղա է, Աղունիկ, ուզիր»:

Իշխանի ետևից դարպասեցին դուրս եկավ ու Իշխանին համոզում էր. «Իրեն մի հարցրու, Իշխան ջան, են տղի մոտ չուզեցի ասել, ինքը հիմար է, իրեն որ հարցնես՝ են է ջուր է բերում, էլի, մարդի չի գնա», ու այդ ժամանակ այգու մթան միջից Ոսկանը մռնչողով դուրս պրժավ. «Եղ ո՞ւմ քույրն է հիմար, դարպասեցի, տասնինգ տարեկան է, եղ ո՞ւմ ես մարդի տալիս, ախչի»: Ոսկանը խմած էր, պատշզամբի աստիճաններին ընկավ ու ընկած էլ քնեց: Եվ ինքը որոշեց. կգնա Ներսեսի ու այդ տղայի հետ, որ էլ երբեք չտեսնի դարպասեցու և Իշխանի երեսը: Օժիտի կարպետը դարպասեցին էդ արանքներում տակվերոց արեց, Իշխանի տնից մի դատարկ օժիտակալ եկավ Ծմակուտ, դարպասեցին տակվերոց արեց նրա մորենական գորգը, որ եկել էր Շնողից, Շնող եկել էր Արձեշից. գետինը մտնես. մի օժիտակալ էր և Նարգիզ մորաքրոջ գորժած սիրամարդ ու եղջերու կարպետները: Ծմակուտ դրանից էլ սկսեցին. «Կնյազ Իշխանի տանը էլ բան ես թողե՞լ, թե եղածը ես է սրբել բերել ես, ախչի», ասաց Արել ապին: «Կնյազ Իշխանի տանը ես քոծ էի, ես էնտեղ մայր չունեի, ապի»,— ասաց ինքը: «Պահ, պահ, պահ,— ասաց Աղամը,— լեզուն էլ է բերել: Եսի՞ն, էնքան համկարծ եկար՝ ասի լեզուդ էնտեղ մոռացած կիհնես»: Իսկ Սիմոնը կանգնել էր մի կողմ և ամաչում էր ասել կինը ձերը չի, իմն է: Իսկ Մանե հարս նրանց թաքուն քսի էր տալիս, երեսանց՝ մխիթարում Աղունին: Մի երկու անսվա վրա որոշեցին, որ չըեր է: «Տասնվեց տարեկան են»,— ասաց ինքը:— Լեզո՞ւդ, — մառանի դրան մոտից կողպեքը շարտեց սկեսուրը: Արցուներն աչքերում, ինքը տարավ ետ տվեց կողպեքը և ասաց. «Տուններդ պալատ է, իինգ սենյակ ունեք, միայն երեխայի պակասություն եք քաշուն»: Որ այսպես աղյուսը դրել է մեջքին ու տնքտնքում է այս սկեսուրը մազերից քոնեց ու կողպեքով աղաց կողերն ու մեջքը: Չորս պատի մեջ հաց էին ուտում, լվացք էին անում, քնում էին, տրեխները հանում էին, ոտքները լվանում էին ապին, նանը, Աղամը, Մանեն, Սիմոնը, Արփիկը, Արաքսին, Սիրանը, Յակոբը, Յաշիկը, Սվետիկը, Ամալյան, Վազգենը, ինքը, Յովտի բարեկամները, Ղաեղի բարեկամները, Խաչերի բարեկամները, միրզ ծախելու եկած դազախեցիք: Մի իինգ կով ու մի քսան ոչխար ունեին, մի չորս գորգ ու մի երկու ձեռք անկողին, մի քանի փեթակ մեղու, մեղու քամելու մի մեքենա ու կարի մի. մի հատ էլ ինքնաեռ, որպեսզի իրիկուները թեյ խմեն ու գյուղին ծաղը անեն. ինչ որ էր, այդպես միատեղ՝ ապրուստ էր և ափսոս էր կտոր-կտոր անել, տալ

վանքերեցու ձեռքը. Եթե վանքերեցին արժանի լիներ՝ այդպես չթի մի շորով չեր գա են լի աշխարհից:

Սիմոնին ուղարկել էին Ղազախ ցորենի: Ներսեսը Մանաց էր գնում, – տար տուր հորը, – ասացին: Չե, չասացին. այդքան լեզու առնառուտ Իշխանի դեմ նրանք չունեին. սիրտ պատռելու չափ սարսափելի էր պատկերացնել, որ այդպես կարտող ու հաց են ուտելու և ծաղրելու են ուրիշներին՝ թե լավ ապրողներին, թե վաշտ ապրողներին, և ինքն էլ՝ նրանց հետ, և կյանքը զնգալու է հեռու Մանաց քաղաքում, իսկ ինքը պառավելու և բաղվելու է Ծնակուտ: Նրանք գնացել էին Խաչերից թե Յովտից Սիմոնի համար մի հանգիստ, անլեզու հաստիկ անասուն բերելու, իսկ Սիմոնը սև ու քրտնածեկավ վանքեր: – Եկել եմ թեզ տանեմ: – Ինքը ցույց տվեց կողերը և ասաց՝ տես: – Դե բա ես ի՞նչ անեմ, – ասաց Սիմոնը: Երկարուղու Զորագէս կայարանում ինքն ասաց. «Էստեղ տուն սարքենք, դու Երկարգօնուն կաշխատես, ես էլ՝ հավաքարար»: Յիմա մեկ-մեկ ասում է. «Են որ ասացիր՝ ճիշտ էիր ասում, Աղունիկ»: Երկարուղու Զորագէս կայարանուն ինքը նայեց լուսավոր խանութի առատ ցուցափեղկին, հետո նորից նայեց ցուցափեղկին, ապա նայեց Սիմոնին և դարձյալ նայեց ցուցափեղկին: Եվ Սիմոնը բարի, խեղճ ու հասկացող էր: Եվ Սիմոնն ասաց. «Վայ թե տրուսիկ ես ուզում, ախչի», և ինքը գլխով այս ասաց և ուրիշ կողմ էր նայում, և ուզում էր արտասվել: «Ինչու քոնը ո՞ւր է», – ասաց Սիմոնը, և իր այդ շորը հագել էր նրա քույրերից Արաքսին: Եվ Սիմոնն աչքերը փակեց ու վաճառողին հարցրեց՝ ի՞նչ արժե, և մինչև վաճառողը կպատասխաներ թե ինչ արժե, Սիմոնի քուս ճակատը քրտնեց, որովհետև բռան մեջ մի Երկու կոպեկ փող ուներ՝ այդ էր: Եվ ինքը ուրիշ կողմ էր նայում ու լաց էր լինում Սիմոնի համար: Եթե մեր միջև սիրո պես մի բան եղել է այդ եղել է Զորագէս կայարանի լուսավոր խանութում:

Յորաքույր Մանիշակը, Ծնակուտ, կանգնեց ճանապարհին. «Բարով եկար, քաղաքացի. ուր գնացիր, ուր եկար»: Յորաքույր Մանիշակը կանգնել էր այգու մոտ և տան մոտ՝ որ սարքել էր Յամբոյի գողությամբ, – հորաքույր Մանիշակին դժվար էր պատասխանել: «Դուն տեղն էլ գիտի, պատուհանի տեղն էլ, մեկից դուրս ես գցում մյուսով է մտնում», – ասաց Աբել սկեսրայրը, և ինքը տեսավ, որ իզուր է ետ եկել. սրանք խեղճերին ծաղրում են ուզաների չափ, իսկ ուժեղների դեմ մոռանում են, որ լեզու ունեն: «Ասա... ասա, – ինքն արմունկեց Սիմոնին, – ասա որ կինը քոնն է, իրենցը չի»: Նրան

մի տարի տվել էին Դսեղ հյուսնի աշակերտ՝ «վրադ քրտինք ենք թափել», նա կակազեց. – Ապի... ապի, եթե առանձին ապրեի, ապի, ի՞նչ կասեիր, կարո՞ղ է ապրել: – Յա՛, ձեռքդ բերանիդ հասա՞վ... հա, դե եթե ձեռքդ բերանիդ է հասնում, ինչ կա որ:– Սիմոնին ուղարկեցին կոլխոզի կալերում կովանոց սարքելու, իսկ այս պառավը, որ այսպես աղյուս է շալակել ու տնքտնքում է, իրեն կանչեց գոմ, դուռը փակել տվեց... Ուրիշ բան չեմ ուզում, եղան աղյուս շալակած ապրես երկու հարյուր տարի, նանի ջան: Շողերը... Շողերը դարպասեցի էր, գիտեր թե ինչ կլինի քաշած նա դարպասեցի մերացվի ձեռքին, Շողերը եկել էր ջրի, լսել էր նրա աղիողորմը, եկավ, գոմից հանեց, տարավ իրենց տուն: Եվ ինքը տեսավ, որ Ծնակուտ էլ կլինի ապրել Վանքերի պես: Մթան հետ սկսեցին նրան փնտրել, եկան հանեցին Շողերենց տնից ու հրելով տարան սկեսուրն ու Մանեն: Այդ ամառ հիդ էր: Ուզում էր ուտել, ուտել, իսկ հացի ու պանրի վրա կողապեք էր դրված և բանալին խճճված էր պառավի կարկատանների մեջ, ու ամեն ինչի վրա Մանեի, Արաքսու, Արփիկի, Սիրանի, Յակորի, Յրաշիկի, Ամայայի աչքն էր... սպասում էին թե երբ է չխչխչալու մառանի կողպեքը: Ինչ եղավ. պառավը գնացել էր Յովիտ հորանց, ապին, Աղանը, Սիմոնը կոլխոզում էին. Մանեն աղջկների հետ կազմակերպեց՝ բլիթներ թիւնեցին. պառավի յուղի հախից մի լավ եկան, կճուճը կես էր ընկել: Այդ ամառ կշտացավ այդ անգամ, մի անգամ էլ կշտացավ հորաքրոջ հարսի հետ, հորաքրոջից թաքուն (հորաքրոջ հացը չէր ուտվում. դեմք հաց էր դնում և աչքը տնկում սեղանին): Յովըտից եկավ ու փնտրել սկսեց բանալին. մառանից դուրս եկավ իբր միամտված ու միանգամից բռնեց Աղունի մազերը: Աղունը երկար, հաստ հյուսեր ուներ: Մեջների խղճովը Սիրանն էր, ասաց՝ ի՞նչ ես ուզում եմ աղջկանից, բոլորս միասին ենք արել: Արփիկը տասներկու տարեկան էր, այնտեղ գծեր էր քաշել ու ցատկուտում էր գծերի վրայով. Արաքսին նշանված աղջկի էր. Սիրանը կարուಡն էր սովորում, հոր ու եղբայրների սիրելին էր, – պառավը վրա քշեց Մանեին՝ Մանեն կռացած պղինձ էր լվանում, որ չղոմոաց՝ «պղինձը գլխովդ կտամ, ես քեզ համար վանքերեցի որբը չեմ», պառավը ետ-ետ արեց: Պառավը մոլոր մնաց, մնաց ու ճանկեց Աղունին. – Ալմառուտ, քուրդ, առնառուտ, քուրդ:– Փորիս խփիր՝ ինձ պետք չի ձեր լակոտը, փորիս խփիր՝ ինձ պետք չի...– Լեզուդ...– Յետոն ինքը գալարվում էր նրանց կալում և հող էր ուսում և մատ էր տալիս, ուզում էր որձկալ ու ետ տալ նրանց բլիթները, կարտոֆիլը,

մի բերան հացը, մի պատառ պանիրը,— և պառավը վրա քշած դարձյալ եկավ: Յետո ինքը նստել էր կալի ծայրին, ամպերը լողում էին լազուրի մեջ, արծիվը լողում էր ամպերի տակ, Շողերը քամուն ցորեն էր տալիս, ճանապարհները լցվում էին տունդարձի մայունով, և չէր գտնվում ինչպես մեռնելու ձևը: Մի զարմանալի թախծոտ կյանք էր կանաչում դեմք, ինքը որդուն նստեցրել էր խնձորենու տակ, նստել էր նրա կողքին, խնձորենու վրա հասած խնձորներ կային, ու ինքը որդուն մրմնջում էր իր որբ մանկության, երազած երազների ու անկատար իղձերի պատմությունը, թե ինչպես ինքը երեք օրական է եղել, իր հայր Իշխանը խփել է իր քաղցր մայր Շողերին, և իր մայրը այդպես էլ հանգել է, և նրա կուրծքը սառել է իր բերանում և իրեն պահել է իր բարի տատը և օր չի տվել դարպասեցի իր մերացուն: Ոչխարը տուն հասավ, աղջիկները գնացին կրելու, Մանեն գոմեշները կրելու գնաց, ամպի վրա հիմա արև չկար, Յակորն ու Յաշչիկը այժի ետևից էին ընկել, Շողերը ցորենը հավաքեց, զույգ պարկը քարշ տվեց պատշգամբ և, թևերը կոնքերին, կանչեց դեպի սրանց տուն.— Արուս տատի... առաջ արի, բան են ասում...— Լավերը շուտ են մեռնում, թե՝ մահն է թանկացնում կյանքը: Սկեսուրն առաջ գնաց, Շողերը դանդաղ եկավ, այգու անկյունում մի րոպէ իրար դեմ կանգնեցին, հետո սկեսուրը կաղկանձեց: Շողերը խփեց մի անգամ էլ ու կանգնեց ձեռքերը կոնքերին.— Տասնվեց տարեկան է, հիյ է, աղջիկներիցդ փոքր է, խիշճ ունեցիր:— Սպասեց, որ կանգնի ու դարձյալ խփեց.— Գյուղխորհրդի բերանը կտամ, կախարդ, ձենդ դուրս չգա,— և շուտ եկավ ու գնաց քարշ տալու պարկերը մառան:

Մյուս օրը Շողերը նրան իր հետ տարավ կոլխոզ արտհունձի՝ կյանքը լայն էր. դեղին արտերը խշշում էին, նրան չքողեցին ծանր գործ անի, Քոչարը գրնագում էր հասած արտերի վրա հանդով մեկ՝ յարս, յարը՝... և արևն էլ էր գրնագում, և կյանքը լավն էր:— Վա՞նքերեցի,— կանչում էին է՛ վերսներից,— երեսիդ կարոտ մնացինք, ջուրը շուտ արա...— Ո՞ւր կորավ էդ կյանքը: Քոչարը կանչեց.— Վա՞նքերեցի... Արելենք չուզեմ՝ երեխադ վերցնեմ, հետը կզա՞ս...— Լավերդ շուտ եք մեռնում, որտե՞ղ ես, Քոչար, խփվե՞լ ես թե գերի ես ընկել, Ամերիկա ես. քո ձայնը դեռ գրնագում է Ծմակուտի դեղին արտերի վրա: Մահը թանկացնում է կյանքը, դրա համար էլ, նանի ջան, ես թեզ մահ չեմ ցանկանում, եսի՞մ, համկարծ մեռնես, համկարծ մտածեմ, որ լավն էիր, գնացիր: Յետո ինչ եղավ. տասներեք հոգով չորս

պատի մեջ՝ ձմեռը բերեցին, տորք էլ տնկեցին տանը. թըխկ, թըխկ, թըխկ, թըխկ՝ Արաքսու օժիտի համար գորգ են գործում: Ու իրար էլ այնքան են սիրում, որ չեն էլ մտածում առանձին ապրելու մասին. ու խոսքներն էլ՝ նույնը, մեկը որ սկսեց մեկին ծաղրել՝ մնացած դյուժինը օգնության է հասնում: Երկու տարեկան Վազգենն էլ օգնում էր. երբ խոսել սովորեց՝ առաջ ասաց ապի (սրանք մեծահարգ են, «մայրիկ», «մամա» խոսքի փոխարեն պապին սիրել են սովորեցնում), առաջ ասա ապի, երկրորդ բառը առնառւտն էր: Ծիծաղեցին՝ երբ տեսան տորքի տակ նստել է ու հանգույց անել չգիտի Աղունը: Եվ պառավն սկսեց. կիրա անել՝ չգիտես, գործել՝ չգիտես, իսկ ի՞նչ գիտես. ուտե՞լ: Ինքն էլ, ճիշտն ասած, մի քիչ անհասկացող էր. դարպասեցին չէր սովորեցրել, ինքն էլ, դե, ինչ է լինելու որբը, շշմած էր: Եվ պառավը փետրվար ձմռանը թևից բռնեց ու դրւու շարտեց: Եվ շունն էլ ետևից քսի էր տալիս: Յորաքույր Մանիշակն ասաց իր դրանից. «Էդ ո՞ւր ես գնում, ախչի»: «Գնում եմ ինձ ջուրը գցեմ»: «Զրերը սառած են, թող վարարեն, կգնաս»: Յարսի՝ Ներսեսի կնոջ հետ հորաքույրը կարպետ էր գործում, տարավ նստեցրեց կարպետի տակ: Կրա ութերորդ օրը ցավերը բռնեցին: Յորաքույր Մանիշակի հետ սկեսուրը կռվել էր. «Էդ ինչի՞ ես կոխել տունդ, եդ ինչի՞ ես կոխել տունդ... Որ կողքներիս ծնի ու սրտներիս ցավ տա՞... Քո եղբոր աղջիկն է, մե՞ր ինչն է... Որ կոխել ես տունդ, տանդ էլ կպահես»: Ցավերը բռնեցին, հիմա էլ երեխան գրկին էր կռվելու, ծեծվելու, երեսը դեմ անելու: Եվ ուզում էր, որ չծնվի: Ասում են բարձ են դնում գլխին, կուրծք չեն տալիս, կուրծքը բերանում քնում են: Թող չծնվի. կառնի իր գլուխը, կգնա թիֆլիսներում, քաղաքներում մի տեղ կաշխատի, կապրի:

Ուրագը հավիտյան ձեռքին, կոլխոզից տուն էր գնում Սիմոնը:— Սիմոն, — քերի մեջ դնդնդաց Ներսեսը, — տղեդ եկավ: Արմոն, Արմենակ, — ասաց Ներսեսը: Սիմոնը կանգնել էր դուրսը պատուհանի մոտ և տրորում էր գլխարկը, կաշվե բաճկոնը ուսերին՝ անցավ Ներսեսը:— Գնում եմ քո մեր Արուսին իշին դմեմ, Սիմոն:— Գլխարկը ձեռքի մեջ տրորելով, մեծ թուխ գլուխը բաց՝ Սիմոնը գնաց նրա ետևից: Լուսամուտը սառել էր, դուրսը սրանց Ծմակուտի վատ ցուրտն էր, Վանքերի գերեզմանոցում մոր տեղը ցուրտ էր, Ուկանը հիմա խմել ու քնել էր դրսում մի տեղ, հորաքույրը գոմ էր գնացել գոմեցները կրելու, ասում են գոմեշը դժվարակիր է, և կոշտ անասուն է, կտրորի, կջարոյի ոտքը: Այս աշխարհին ինչո՞ւ է այսքան դժվար: Տատմները

Երեխայի համար գուշակեց լավ կյանք, և ինքը լաց եղավ ու ասաց.— Եդ մեր բաժինը չի, Քալի տատիի:— Մի ասա, աղջիկ ջան:— Դրսի սառած ցեխը տրորելով, գիշերը Ներսեսը Եկավ:— Քեզ համար պալատ սարքեցինք, Ար-մո՛...— Համաձայնել էին գոմշանոցը տալ: Եվ ինքը նորից լաց եղավ: Իշխանի տներում հատակը ներկած է կարմիր, առաստաղը՝ կապույտ, բազրիքները՝ կապույտ, այգու ծառաբներին սպիտակ կիր է քսած, տա՞ք, լուսավոր... Ծողերի տանը եղջերու գորգ է կախված, վեց զույգ էլ ծալքի մեջ կա, մի հատ փափուկն է՝ թախտին, Ծողերենց վառարանը զվում է տաքությունից, սեղանին՝ թթու կաղամբ ու կարտոլ... Զորագէսի լուսավոր կայարանն ու գուգաված կանայք ու փափուկ նայող տղամարդիկ... Ինքը լաց եղավ, և հորաքույրն ասաց:— Երեխադ քիչ է, դու է՞լ... ձենդ կտրիր...— և ինքը լաց եղավ լրիկ:

Դուան տակ գոմեշներն էին կապած, վերևի ծայրը իրենն ու Երեխայինն էր: Սիմոնը գնում էր գործի, գալիս էր գրուցում հորանց տանը, գիշերը գալիս քնում, լույսի հետ գնում գործի: Զրի գալիս՝ Ծողերը պատահում էր ճաշ էր բերում, պատահում էր՝ ցամաք հաց: Յորաքույրը, ջրի գալիս, մեկ-մեկ ներս էր նայում: Դոնից անցնելիս՝ սկեսուրն ականց էր դնում — դեռ կենդանի<sup>9</sup> են: Զուր տաքացնելու աման՝ չկար. Խանձարուրի շոր՝ չկար. օրորոց՝ Սիմոնը սարքեց, դնելու մի թիզ ուղիղ տեղ չկար. Խանձարուրել՝ չգիտեր. ճաշ եփելու տեղ՝ չկար,— ջղայնությունից ու քաղցից պատովում էր: Երեխան էլ՝ լացկա՞ն, հիվանդո՞տ, ինքն էլ երգել, երգով քնեցնել՝ չգիտեր. կուրծքը բերանը տված՝ վազում էր գոմի այս ծայրից այն ծայրը, այն ծայրից այս ծայրը: Կրակը հանգել էր, ինքը գնաց է՝ Մուրադենցից կրակ բերելու, Եկավ տեսավ գոմի դուռը բաց, գոմեշը՝ գոմի վերի ծայրին. օրորոցը շուր է տվել, թքել է մահճակալին, Երեխան այնտեղ գոռում է, գոռում է, իսկ պառավը՝ հանգի՞ստ, բան չի պատահել, գոմեշի համար խոտ է բերում: Իսկ իր Իշխան հայրը... իր Իշխան հայրն էլ Մանաշից սիրուն-սիրուն խոստումներ է ուղարկում:— Որ լավ տղա դաշնա՝ թևի մի ժամացույց եմ առնելու:

Ապրիլին կաթոքըն սկսեց. հորաքույր Մանիշակը կարպետը Վերջացրել էր, գորգ էր իինել, — տարավ պահելու իր մոտ: Նրանք գորգն էին գործելու, ինքը ջուր էր բերելու, տուն էր ավելու, գոմ էր մաքրելու, նայելու և սովորելու էր: Իսկ իր Իշխան հայրը նախշուն գովեստներ ուղարկեց:— Ապրեք, այտա, իրար պահեցք, մարդը հարազատով է մարդ:— Մայիսին, ծնի վրա, Աբելի մի կովը սատկեց,

և նրանք ասացին, որ այդ կովը Սիմոնի բաժինքն էր: Սիմոնը լռեց ու համաձայնեց: Մայիսի վերջին օրորոցից, խանձարուրով, ընկավ երեխան ու դեմքը ջնջիսց: Եվ ոռնացող երեխան գրկած՝ նա վազեց Փառանձեմենց տուն, նրանք ասացին «Երեխա է, լաց էլ կլինի», նա վազեց Մուլրադենց տուն, նրանք թուղթ էին խաղում, «արյուն է, էլի, կգա էլ, կկտրվի էլ», նա վազեց Շողերենց տուն՝ «ափսոս, երեխայի երեսը փչացել է» – և ինքը չէր գտնում այս մեծ աշխարհում իր տեղը:

Յունիսին դեռ գոմում էին, դրսի արև աշխարհը թողած՝ գոմում էին. գոմի հոտը. լուն: Յունիսի վերջին Սիմոնն առաջին անգամ նրան ծեծեց. Սիմոնը ակումբի համար նկարների շրջանակ էր սարքում, ինքն ասաց. – Պալատները՝ պալատներդ զարդարում ես: – Սիմոնը շուր եկավ և ուրագի կորով խիթեց: Երեխան իր ծեռքին էր, ինքը երեխային դեմ արեց նրան և ասաց՝ սպանի՛ր, ինձ էլ սպանիր, իրեն էլ, բավական է, էլ չեմ ուզում ապրել: Նա շուր եկավ գնալու իր կոլխոզ՝ ինքը կտրեց դուռը. – Տո՛ւն ենք սարքում: – Ինչո՞վ ես սարքում: – Ես ծեռքերովս: – Գնա սարքիր, – Սիմոնը նրան հրեց ու դուրս եկավ՝ ինքը դարձյալ կտրեց նրա ճանապարհը. – Տուն ենք սարքում: – Սիմոնը ծնկով մի կողմն հրեց նրան ու անցավ, նա դարձյալ վազեց ու ծնկեց նրա դեմ. – Տո՛ւն ենք սարքում: – Չեմ սարքում: – Քոչում ենք Մանաց: – Քո վայրենիներին կարոտել եմ: – Տո՛ւն ենք սարքում, – աղաղակեց ինքը: Սիմոնը բարձրացրեց ուրագը, և այդ ժամանակ ինքը ծղրտաց նրա երեսն ի վեր. – Էլ բավական է... են գիտ հերս ցեղող կրաղի ու քեզ էլ հետը, – և ինքն ուզեց խանձարուրով խիթել նրան ու տեսավ, որ քիչ էլ, մի քիչ էլ ինքը խելագարվում է:

Յունիսի տասն օրը, հուլիսը, օգոստոսը, սեպտեմբերը, նոյեմբերը: Նոյեմբերի վերջին շաբաթում թաց պատերով տանն էին: Ներքևի ծորում ավազն էր, ջուրը վերևի ծորում էր, քարհանքը Արյենց Ստեփանի տան մոտ էր, կիրո՛ Տանձուտ բացատում, փայտը՝ անտառում: Փայտի, կրիորի, ջրի, քարհանքի արահետներին շրխկում էր ջահել Աղունը: Բոճի մեջ, պառավ տանձենու տակ, գվառում էր երեխան, պատի վրայից Աղունով հիանում էր մշեցի ծեր որմնադիրը: Ուկանը եկավ օգնեց քսան օրվա չափ, իշխանը մի հինգ կիլո մեխ ուղարկեց, Սիմոնը ծղատվում էր կոլխոզի գործի և տան արանքում: Աշխարհը լավ է, մարդիկ վատ են. սղոցարանից գողացան տախտակի կեսը, լուր վեճ եղավ կաղնի հին գերանի վրա.

Սիմոնն ուզում էր մարդակների համար սղոցել այդ գերանը՝ սղոցարան քաշեց ու սղոցել տվեց Աղամը. հանդերում կտրել ու մաքրել էր Սիմոնը – եզներով բերել էր Աղամը, Աղամինն էր. բայց բերելու օրը Սիմոնը Ղազախ հացի գնացած էր Եղել, հացը կերել էին հավասար, իսկ գերանը հիմա Աղամինն էր: Մուշեղը տվեց իր մարդակները, բայց մեկի պակասություն կար, Սիմոնը բերեց Աղամի սղոցածներից, Աղամը եզներով եկավ. եզների Ետևը զցեց ու, տափակելով լորի, սամիթ, սփյուռքի, քաշեց իր տնացվի տեղը. դրա փոխարեն Սիմոնը թաց մարդակ զցեց՝ որ հիմա ծռվել ու անծոնի կախվել է: Աթյենց Ստեփանը տնկվեց թե «իմ տաճ մոտ է՝ քարհանքն իմն է, իմ տաճ մոտ փոս ես գցում»: Նա ճիշտ էր թե ճիշտ չէր՝ Սիմոնը գծվեց. նա իրել էր Սիմոնին, Սիմոնը լինգը վրա բերեց նրան, նրա Արեստի որդուն, խփեց կոտրեց նրանց շան մեջքը, լինգը խրեց նրանց տաճ հիմնաքարերի մեջ և քանդում էր: Չորս տղամարդով բռնած նրան տուն բերեցին, և մի ամիս գլխացավից նա խելագարվում էր: Քարհանքի իրավունքը գյուղխորհուրդը տվեց Սիմոնին, բայց նա երեխայի պես խռովվել էր. Էլ այնտեղից քար չհանեց, բերեց հեռու Քարկապից. դրա համար էլ պատի կեսը դարչնագույն է, կեսը՝ կապույտ ու փշրկուն: Պիոներները շեփորի կանչով հավաքվում էին դպրոց, նաքուր ու գիրուկ Մայայի մանկապարտեզը ճլվլալով գնում էր խաղալու ծառերի տակ, աղջկները լուսնի հետ երգելով իջնում էին կոլխոզի հանդերից, ձիու վրա Ներսեսը թռչում էր հանդից հանդ ու գյուղից Մանաց, – և Աղունը տեսավ, որ սիրում է Սիմոնին և լաց եղավ նրա համար ու իր համար, և Ուկանի հարբեցողությունը, աչք մտնող Ներսեսը, Իշխանի կողոպուտը, շահագետ հորաքույր Մանիշակը, ապահով Շողերի բարեհոգությունը և Սիրան տալու նազանքը կարի մեքենայի տակ՝ ատելի էին. և ատելի էր այդ Արմիկ երեխան, որ ունենալու էր մայր էլ, հայր էլ, և կրթություն էլ, և ապագա էլ:

Տաճ մեջը քար էր, քանդելիս Սիմոնի փորը պատռվեց. պառավը եկավ, յախուր դրեց փորին, Աղամը եկավ. – Մարդակի համար իզուր կլինես նեղացած, Սիմոն, եկել եմ քարը քանդեմ, – Սիմոնն ասաց՝ չէ, Աղամ, շտապ չի, որու ավելի շտապ գործեր կունենաս, գնա արա, քար է, էլի, կամաց-կամաց կքանդենք, թող իր համար էդտեղ էնքան մնա՞ – և այդ պատճառով իսկ Աղունը Սիմոնին կրկնակի սիրեց: Աղունը դեն զցեց պառավի դրած յախուն, ինքը սարքեց, լավ չկպավ, բայց հո ինքն էր արել: Քանի դեռ փորը ցավում էր՝ Սիմոնը

թեթև գործերի էր. դուռավագամուտ դրեց, մահճակալ սարքեց, դուրս գցեց հորանց տված մահճակալը, խոզանոցի տեղ փորեց, շան բուն սարքեց, մի սայլ խոտի և մի էգ մողու գնով սարքեց Մուշեղի տասնինգ փերակը, Արտաշի յոթ փերակը, մի խոճկորի դիմաց սարքեց Գիքորի դուռը: Այդ տանը ամեն մի առարկա, մինչև վերջին կրակխառնիչը՝ որի դիմաց դարբինը Սիմոնին սարքել տվեց կացնի, ուրագի, մուրճի և բաիի կոթերը,— այդ տան ամեն մի իր, մինչև վերջին շան լակոտը՝ որ Սաքոն տվեց իբր թե անվարձ, բայց անվարձ էլ կապել տվեց հոր նկարի համար շրջանակ, մինչև դուն տակի ոտնաքերիչը, կացինը, տակարի կապերը, խնձորեմիները, մեղուները, սամիթի սերմը, կաղամբի սածիլը՝ ստեղծվեցին Երեխայի պես ուժով, ցավով և պատութելով և ոչ թե ածվեցին ձվի պես: Միայն փայտե գրալներն են երել նվերի պես անսպասելի: Խոզարած Նիկալ պապը մի իրիկուն եկավ,— Էկել եմ ձեր տունը շնհավորեմ, այտա, ես ինչ լավ տուն ունեք... ես գրալնին ձեզ հմար եմ շինել, ճաշ կուտեք, այտա... Վախեք ոչ, աման էլ կսարքեմ, գործիս անունն ինչ է:— Լույս դառնաս, Նիկալ պապի, քու գրալները նվեր էիր բերել, բայց քեզանից էլ խոզի ողիլ էր քաշվել Երեխայի վրա:

Դիմա վառարանի շուրջը տաք էր և նավք կար լամպի մեջ ու շշի մեջ էլ կար: Դրսից պատուհանը տաք ու քրտնած էր երևում, պառավը կարծում էր Աղունը կախարդել է իր որդուն և հիմա նա այնտեղ նրան է պարզում իր բարի ժայտը և նրա հետ անում է տոհմական իր շռայլ կատակները: Այդպես չէր. Սիմոնը նրան ծեծում էր. այդ տան ամեն մի իրը ստեղծվել է ծեծվելու գնով (հիմա չի ծեծում, ծերացել են, և, բացի այդ, ապրուստի գլուխն էլ հողեն, կարևորը մարդուս առողջությունն է և ուրախությունը, քանզի մարդս ծաղիկ չի, մի անգամ է լինում ու, ես մե՞ծ հավիտենականության մեջ, էլ չի լինում, չի՝ կրկնվում): Պառավը հիմա ուժը տվել էր ոտքին. Յովտի տերտերը ասել էր՝ «ամոք է, այ կնիկ, ապրում են՝ թող խաղաղ ապրեն»: Փեշերը քշտած՝ պառավն իրեն խփել էր Դսեղի տերտերին, Կիրովականի տերտերին: Տերտերերոց լինես, նամի ջա՞ն: Գիր անել էր տալիս, գելերոց լինես: Սիմոնի բաժինք վերմակի մեջ Աղունը եռանկյուն մոնմած թուղթ գտավ: Մութաքայի մեջ՝ կար, բարձի մեջ՝ կար: Մինչև հիմա էլ՝ ներքնակի բրդից դուրս են գալիս: Աղունը Վանքեր հորանց էր գնացել, Վանքերի տերտերն ասաց՝ «ամուսինդ քեզ լավ չի վերաբերվում, տանդ վրա չար աչք կա, ուզում են բախտող կապել՝ ամուսինդ լավ տղա է, միաբան եղեք՝ չարը կիսափանվի»:

Եկավ պատմեց Շողերին, Շողերն իսկույն ըմբռնեց: Շողերը մի րոպե գունատվեց:— Ախչի... ախչի, էն բահը դեսը տուր:— Շեմքատակը փորեցին ու, գելերոց լինես, նամի ջա՞ն, գիր գտան շեմքափետի տակ: Նրա Վանքեր եղած ժամանակ Շողերը պառավին տեսել էր որդու տնից իջնելիս: Սա հատուկ գիր էր, սրա մեջ Աղունի ծամերից մազ կար: Աղունը հիշեց, որ մազը Սիրանն էր կտրել: Սիրանին էլ, ուրեմն, հեղափոխել էր պառավը: Սիմոնը հիվանդացավ գլխացավով, գայլն այդ ձմեռ քանդեց գոմի կտուրը, ջարդեց ոչխարները: Մոզին գոմում մենակ մնաց, մրսեց ու սատկեց: “Պառավը ձորակն անցավ, եկավ սվսվալու սատկած մոզու վրա և որդու շուրջը: Աղունը համբերեց, համբերեց, հետո էլ հնարավոր չէր, վրա պրծակ ու նրա աչքը կոխեց շեմքի տակից հանվածը՝ ա՛ն օրինանքդ: Սիմոնը վեր թռավ, խփեց Աղունին: Աղունը լուր լացելով գնաց հորաքրոջ տուն: Նրա հարսը եկավ, տարավ երեխային: Սիմոնը դուրս քշեց մորն էլ ու հանգած վառարանի տանը մնաց առանց թեյի, առանց թրջոցի: Սիրան քույրը մի հատ խմձոր տարավ և ուզեց վառել վառարանը՝ Սիմոնը շաքարամանը շպրտեց ու վերմակն էլ շպրտեց: Դուրս բաց տանը Սիմոնը մնաց վրան բաց, փորի ճողվածքը փքված... Ներսեսը քնել էր թևը կնոջ գլխի տակ, ոտքը օրորոցին, Ներսեսի շապիկը սպիտակ, սպիտակ էր, իսկ վառարանը գվկում էր ու կարմրել էր: Գոմի դուռն էլ այնտեղ էր բաց մնացել՝ սատկած մոզին մեջը և իհմա հավերն էլ աղբեսերոց կլինեին: Եվ գերեզմանոցն էլ՝ տան ճանապարհին... Ինքը մի անգամ ասաց՝ Ներսես... հետո էլ սիրտ չարեց կրկնել: Յետո ինքն իրեն ասաց՝ Ես Վանքերի աղջիկ լինեմ ու վախենա՞ն սրանց քոսոտ գերեզմանոցից: Եվ վառարանից կրակ վերցրեց ու երեխային էլ վերցրեց, որպեսզի զրուցի նրա հետ ու մոռանա գերեզմանոցը, և գնաց տեսավ դուռը բաց, ամանները ջարդած, ուրիշի կատուն տանը, վերմակը հատակին, Սիմոնը սառել փայտացել է: Ինքն ասաց.— Սիմոն ջան, ախսեր ջան, ցավը տանեմ, բա Ես որք Եմ, չէ՞... բա ինձ խղճա, չէ,— և ժամանակ չեղավ վառարանը վառելու, ինքը մերկացավ մորից մերկ և նրան տաքացրեց իրենով: Եվ կարգին հագնվելու ժամանակ չեղավ, մի շորով ինքը դուրս եկավ՝ ոչ մի տան լույս չեր վառվում: Ինքը վագեց հորաքրոջից կրակ բերելու՝ գերեզմանոցից հանկարծ խուլ հևոցով դուրս թռան շներ առանց հաչելու: Բժիշկները թե ինչ կասեն՝ իրենց գործն է, լեղապարկի հիվանդությունն իր մեջ այդ գիշեր առաջացավ: Յորաքրոջ դուռը փակ էր: Էլ ուրիշ հնար չկար՝ ծեծեց: Յորա-

քույրն ասաց. «Ախչի... ախչի, ես միանսականը տանը, ես հարսն ու տղեն քնած, դու ո՞նց ես դուռը ետևիցդ բաց թողնում»: Ինքը ծղրտաց.— Կրակի եմ Եկեղ, Սիմոնը մեռնում է, կրակ տվեք:— Դե գլուխ տարար, էլի,— դնդղնդաց Ներսեսը,— բաժանվում ես՝ բաժանվիր պրօնենք, չես բաժանվում՝ թող քնենք, գլուխ տարար, էլի...— Ինքը շրիսկացրեց դուռը և ասաց.— Մեռնում է՝ թող մեռնի:— Յորաքույր Մանիշակը նրա ետևից կրակ բերեց ու մեղրուկարագ: Կաթ էլ էր պետք, կարի համար Աղունը մի անգամ էլ գնաց ու եկավ գերեզմանոցով: Քամին մտնում էր նրա մեջ, մեկ սառչում ու մեկ տաքանում էր,— լեղապարկն այդ գիշեր փչացավ: Սիմոնի թոքաբորբ շուտ բուժվեց, բայց գլխացավը խփեց աչքին ու վառեց բիբը: Եվ գլուխը բռնում էր ու գալարվում էր անկողնում. գլուխս, գլուխս, գլուխս...

Եվ ինքը լաց էր լինում նրա հետ, որովհետև իր գլուխն էլ սկսեց ցավել: Թաց տուն էր, առանց վառել չէր լինի, կացինը խփում էր գերամին՝ ուղեղը շարժվում ու աչքերը մբնում էին: Եվ ահա այդ ժամանակ էր, որ Մուլադենց Սրբուհին տղամարդու շապիկներ էր բերել Երեխային տակաշորացու, Սիմոնն աշխատում էր ակումբի շինարարության վրա և սրախսություններ էր անում, Սրբուհու բերած հին շապիկներից Երեխան բլբբլքոտեց, և ինքը հեռախսով ծղրտաց. Իշխան... մորս սպանել ես՝ ինձ Է՞լ ես սպանում, դատի կտամ...— և Սամվելը մյուս օրը բերեց քանն մետր սպիտակ կտոր: Տղամարդիկ ակումբի գլխից լսում էին, թե ինչ է ասում Աղունը, Սիմոնը կակազում էր՝ ամոթ է, ախչի, ամոթ է... իսկ գողի Արտաշն ասել էր՝ հո կնի՞կ չի, բերեք կոլխոզի նախագահ դնենք: Պատերազմի ժամանակ ինքը նրան պատասխանեց. լավ պաշտօնները դուք մեզ չեք տա: Գողի Արտաշը դրա պատասխանը տվեց մի ամիս հետո, երբ ջվալ քարշ տալուց պորտն ընկել էր: Գողի Արտաշը ծիծաղելով ասաց. ուզո՞ւմ ես բարձրացնեմ: Ինքը մոտ գնաց ու բռնեց նրա գլուխը, Շուշանը ջվալը շուր տվեց նրա մեջքին:— Կամքո՞վ, կամքո՞վ,— ասում էր նա: Իր կամքով Գողին կալից պահեստ տարավ երեք ջվալ, իսկ չորրորդի տակ նստեց:

Գողի Արտաշը թոշակավորվելու թե թոշակը բարձրացնելու համար Երևան Աղունի տղա Արմենակի մոտ է գնացել իր շողոքորք լեզվով հանդերձ՝ «չի կարող պատահել, որ դու մինհստրությունում ծանոթ չունենաս», Արմենակը մերժել է. «Ծանոթ չունեմ, իսկ եթե ծիշտն ասենք՝ գլուխ չունեմ, քերի»: Այդպես: Աշխարհը գալիս ու գնում է,

իսկ մենք պինդ ցեղ ենք, կա՞նք:

Եվ իբր թե սրբելով թանկանց ռադիոյի սուտ փոշին և իբր թե շտկելով սեղանի մետաքսե ծոպավոր սփռոցը, սուտ հոգոցով Աղունն ասաց սկսրոջը.

– Պառավեցիր, նանի ջան, առանց մարդի վայ թե դժվար է, – և նայեց տան պատը բռնած եղջերու գորգին:

– Յա, ապին որ գնում էր՝ ինձ էլ պիտի տաներ, անհմաստ թողեց ինձ:

– Չէ, ինչո՞ւ, նանի ջան, – դոդալով ասաց Աղունը, – հացը կա, պանիրը կա, քո ատամներն էլ, փառք աստծո, սակ-սարքին, տղերքի էլ ողջ-առողջ պտույտ են գալիս շուրջդ. արևն էլ տաքացնում է. չէ, ինչո՞ւ, նանի ջան, ինչո՞ւ անհմաստ թողեց:

– Յա, – ասաց պառավը, – ամեն մարդ իր վշտի տերն է:

Սրանք մտածում են, մտածել էլ գիտեն, սիրուն-սիրուն խոսքեր են ասում:– Ոչինչ, նանի ջան, – ասաց Աղունը, – աշխարհում վիշտ էլ կա, վշտի արժեքը իմանալը լավ է: Բա ի՞նչ ամեն Շուշանը, Սոնան, Ազնիվը, Գիբորի Մարգոն, Ներսեսի Մարգոն, Վարդը, Մարիամը, Գոհարը, Խեղճ Տղդղան Մարոն, բա ի՞նչ անեն, որ քսանիինգ տարեկան՝ ամնարդ մնացին:

– Երանի գնացողաց, ոչ երանի մնացողաց: Քանի դեռ էստեղ էր՝ մարդի երեսն ուսում էր Անդրեի Շուշանը, Անդրեն գնաց չեկավ՝ վշտատե՞ր դարձավ Անդրեի Շուշանը:

– Թիշտ ե՞ս, նանի ջան, կրծում էր մարդի երեսը թշնամի սկեսուրի պատճառով: Յիմա աստծո հաջողությանք սկեսուրը չկա, գուցե թե խաղաղ ապրեին:

– Ոչ մի մայր էլ իր որդու վատը չի ուզում:

– Չի ուզում վատը, նանի ջան, չի ուզում, չի ուզում, միայն լավն է ցանկանում ու տալիս վառում է աչքը:

Պառավը հավանեց եղջերու գորգի գործքը, «խուզը մի քիչ բարձր է բռնած», և գորգը շոյելով ասաց.

– Վառողի աչքը թող դուրս գա:

– Դուրս գա՝ դուրս գա, ես էլ եմ էդ ուզում, նանի ջան:

Պառավը օրինեց թիկնաթոռները կապողի մատները և սեղանը կապողի մատները, սփռոցը հավանեց, սփռոցն արժանի էր որդու շնորհիքին և հարսի շնորհիքին էլ: Կով կրելը հեշտ չի, բայց սովորովի է, մի երկու անգամ նայելով գորգ՝ կգործվի, – բայց, – ասաց պառավը, – լեզվին կապ դնելը անհնար բան է:

— Սիրուն էլ էիր, լավն էլ էիր,— ասաց պառավը,— ամաները ծերիդ որ շրխկալով ջուրն էիր իջնում մարդու խինդ էր գալիս, բայց լեզվիդ պատճառով Սիմոնս օր չտեսավ, դու ինքդ էլ շատ ծեծվեցիր: Ծաղրատեղ դառանք գյուղում:

— Ուզում եմ, նանի ջան,— ուներք խաղացնելով ասաց Աղունը,— ուզում եմ էդ գորգը տանեմ Արմենակիս, հ՞նչ կասես: Յա՛, մեծը, եղթերուն, հա՛, էդ:

— Չէ,— ասաց պառավը,— թող՝ հետո: Եթե հարսը լավը եղավ՝ կտաս, եթե մարդորդի չեղավ՝ իզուր կլինես տված երեխայիս ապրուստը:

— Իշխանը մարդորդի չէր, Աբելը մարդորդի էր, նանի ջան. Իշխանն էլ մեռավ, Աբելն էլ մեռավ. բոլորիս ծանիեն էլ էդ է, բոլորս էլ մերնում ենք, առաջ մեծերը, հետո փոքրերը: Ու իշխանի թաղումն էլ թաղում էր, Աբելի թաղումն է՞լ թաղում էր: Իշխանի թաղմանը, նանի ջան, տասն ավտո մարդ Կիրովականից էր եկել, հինգ՝ Թիֆլիսից, տասը՝ Երևանից: Գերեզմանի վրա մի ավտո ծաղիկ դրեցին, բանակային նվազախումբն էլ նվազում էր: Սոչիից հետ՝ մարդ էր եկել իշխանի թաղմանը: Քանի՞ մարդ էր գնում իմ սկեսրայր Աբելի ետևից: Աղամը, Սիմոնը, Յակոբը, Արաքսին, Սիրանը, Արփիկը խինչինն քիթը սրբելով, դու՝ քո տագրակին Թամարի սգաշորը հագիդ:— Եվ սպասելով, որ այդքանը լավ ներծծվի պառավին և պառավը տեսնելով իիշի այն օրերի ցավը և գետնի տակ անցնելու չափ ամոքը սգաշոր ուզելիս, Աղունը շարունակեց պատմել դանդաղ, հեքիաթի պես:— Տասը տարի է չկա են խեղճ սկեսրայրս: Տասը տարի է գերեզմանոցում է, անքա՞ր: Ուրիշների երեկվա հանգուցյալը էսօր քար ունի, իսկ խեղճ սկեսրայրս որդի չուներ, կին չուներ, տեր չուներ — անցորդ էր, մեռավ, թաղեցին ու էլ հետը գործ չունեն, անցորդ էր: Նստում են տանն ու՝ հացը կա՞՝, պանիրը կա՞՝, թեյ լցրու, թե կա՞ մին էլ լցրու, — ու սիրուն-սիրուն ձեռ են առնում Սահակենց Տիգրանին, Արյուենց Ստեփանին, Բեժանենց Անուշավանին, Ասորենց Տիգոյին: Լավ են անում, նանի ջան, որ ձեռ են առնում ու ծիծաղում են. դրա համար էլ քառասուն տարեկան չեն, յոթանասուն տարեկան են: Քարը, եթե հիշողություն ունես ու հիշում ես, ես տաշել տվեցի, ես, — ասաց Աղունը, — ինձ ծեծ ուտեցնելու գնով: Ասացի՝ քո հերն անքար է մնում, քո հերը որդի ունի, երեքն էլ աստօն ողորմածությամբ կենդանի են, աստօն հաջողությամբ պատերազմից ողջ-առողջ վե-

րադարձել են, խեղճ սկեսրայրիս վրա քար քաշեցեք, և ուրագը բարձրացրեք քո Սիմոն որդին: Ու քո Աղամ որդին իր դժնից նայում էր ու ասում էր՝ «տո կարգին խփիր, դրա դեսը ուղարկողի»: Ու դու էլ, նանի ջան,— դառը-դառը ասաց Աղունը,— քո դժնից էիր աչքիդ զոր անում՝ որ տեսնես աջո՞ն է խփում թե անաջող: Ու ասում էիր՝ «Երեխիս կերար, Երեխիս հոգին կերար»: Ու,— գիծ առ գիծ պառավեց Աղունը և աչքերի տակ տոպրակներ կախվեցին,— ու քարը տաշել տվեց, ու Դսեղի ձորում դեռ ընկած է էս էլ յոթ տարի: Ու,— զզվելով ասաց Աղունը,— սպասում եք, որ ես բերել տամ ծեծ ուտելով: Էլ պրծա՞վ, չէ՛, էլ ծեծ չեմ ուտի: Ինձ մաշեցի, մաշեցի, ու ինչի՞ տեր եմ: Քառասուն տարեկան չեմ — ութանասուն եմ: Դու էլ ութանասուն չես — քառասուն ես: Լաց եղիր, ոչինչ, ինձ շատ ես լացեցրել:— Եվ պառավին թողնելով տանը, Աղունը դուրս եկավ, որպեսզի չտեսնի նրա արտասուրը և չխղճահարվի, քանզի նրանք արժանի են կրակ տալու և ոչ թե խղճահարության:

Ինչի՞ էր դուրս եկել. հա, գնում էր Երևան, Երեխային ուղարկել է ծիուն նայելու, Երեխան ո՞ւր կորավ այսքան ժամանակ: Դուրս եկավ՝ աշնան արև աշխարհը ջերմանում էր. լուր տերև էր թափում դիմացի անտառը, խնձորենիները կարմրել, վառվում էին, տանձենիները բոց էին կտրել, տաքդեղի շարուկը կեծանում էր, շունը փաթաթվել էր ինքն իր մեջ ու նիրհում էր: Երեխան այգում էր, դեղձենին շղահարում, տակից փախչում էր և նայում թե ինչպես է շաղ անցնում կրակը. հետո կրանում վերցնում էր՝ դրանք տերևներ էին, և Երեխան նորից էր շղահարում ու տակից փախչում՝ կողքից նայելու թե ինչպես են շաղ գալիս կրակները: Դեղձենին Վանքերից Աղունն էր բերել, այստեղ պտուղ չտվեց, բայց որովհետև սիրուն էր՝ Սիմոնն ասաց թող մնա: Իսկ մեծ տանձենու պատվաստներից մեկը կանա՞չ, կանաչ էր, նրա տանձը հասունանում է դեկտեմբերին, իսկ տերևը կանաչ է մնում մինչև հունվար: Աղունն ուզեց ասել՝ Սերո՞, էտ ի՞նչ ես անում, արի դասերդ սովորիր,— չկարողացավ: Տեսավ, որ խեղդվում է: Եվ նստելով գերանին, Աղունը լաց եղավ: Եվ լաց լինելով մտածեց, որ փոքրին չի ուղարկի Երևան. թող այստեղ աշխատի վարորդ, տրակտորի վրա, անասնաբույժ, իրիկունը տուն գա, տանը հարս լինի, և ինքը նստի ու նայի հարսին ու տղային: Ճին օրերի արծիվը դեռ լողում էր ամպերի տակ, Ծմակուտի գլխին, նրա կանչը դողանչում էր անտառի ու այգիների վրա, խեղճ Ծողերի գերեզմանը... և

Աղունն ասաց դեպի ներս, դեպի սկեսուրը արտասուքով ու ժպտալով.

– Այ կճիկ... այ կճիկ, բա որ տարածել էր, թե լիրք եմ, լրբություն եմ անում...

– Բավական է,— հաշտ-հաշտ ասաց պառավը,— անցած բանի ետևից չեն ընկնի: Վատ եմ եղել՝ վատ եմ եղել: Աստված ինձ վատ է ստեղծել՝ վատ եմ եղել. Ես քեզ խրատ՝ հարսներիդ հետ դու լավ կլի-նես:

– Ես անհաշտ եմ, լավ կլինեմ՝ լավ կլինեմ, վատ եղան՝ ես անհաշտ եմ: Աստված ինձ ուրիշներին ու ինքնինք ուտող է ստեղծել: Մենակ թե...— լաց լինելով ասաց Աղունը,— մենակ թե ինձ ուտում եմ, իսկ ուրիշները ողջ-առողջ կան:

– Մի ամառ դրսներին նայեմ գնա բուժվիր:

– Առողջությունն էլ է մի անգամ տրվում: Թշնամիս չընկնի բժիշկների դրուք:

– Չարիկը բուժվեց:

– Չարիկը Աշոտի կինն է, ես՝ քո տղա Սիմոնի: Տասնիինգ տարի է քար շալակած ման ես գալիս:

– Սիմոնը բժիշկ չի:

– Սիմոնը դարբին է, գլուխս ու կողերս ծեծում է:

– Լեզվիդ պատճառով:

– Անտեր մնա իմ լեզուն, անտեր, որ ձեզ էդպես խանգարում է:

– Կինը կին է, Սիմոնս էլ փափկասիրտ երեխա էր: Դարբնենց Ծովինարի հարսանիքը գնում էր քո հորաքույր Մանիշակի տան տեղով, Սիմոնս նատել էր մեր կալի ծերին ու լաց էր լինում. «Խանի, Ծովինարը սիրուն էր, չէ»: Մուրադենց հարսը ետևից հինգ-վեց տարեկան տղա ուներ, մենք ուզում էինք Յովտից աղջիկ բերել Սիմոնիս համար, իսկ երեխաս լաց էր եղել Աղամիս մոտ՝ չէ, ես նրան եմ ուզում: Կուրանամ ես: Քսանիինգ տարի է էս տանն ես, սրտից եկած մի խոր չես ասել երեխայիս: Կինը կին պիտի լինի, իսկ դու կին չես եղել երեխայիս համար: Ծովինարի հարսանիքը գնաց ու չեկավ, Մուրադենց հարսը Մուրադենց տանը պառավեց — երեխայիս դու պիտի սիրեիր:

– Զեր ամեն ինչը տեղն է, մնում է սիրվելը:

Պառավը կանգնեց.

– Դե լավ, ես գնամ, գործի ես, չխանգարեմ:

– Բան ես ասում՝ ասա: Ինձ խանգարողը դեռ չի ծնվել:

– Կոպիտ ես, – փնթփնթաց պառավը, – ամեն ինչդ լավն է, միայն կոպիտ ես:

– Կոպիտ չլինեի՝ ձեր կախարդությունները կտրտելով դուրս չեն գա: Ու գոմեշի հետ դեռ գոմում կլինեի: Եղ սառը գետնին մի՛ նստիր, – դեպի երեխան ճչաց Աղունը, – գլխացավ չես, երեխա ես ինձ համար:

– Ին ունեցածը գոմ էր՝ գոմ էի տվել. Ես պալատում չեի, դու գոմում: Ինչի՞ էի եկել, – այգու եզրին մոլորվեց պառավը, – բանի էի եկել, մոռացա թե ինչի եմ եկել:

– Ունեցածդ կով էր՝ կով տվեցիր:

– Տվեցի՝ սատկեց, ես ի՞նչ անեմ, որ ամեն ինչն էլ մեզ համար դժվար է լինում:

– Սատկեց՝ տվեցիր: Եղ ոչինչ, կով էր՝ սատկեց: Մարդ էլ է մեռնում: Բա են լավ-լավ տերտերներդ: Յասկդ կալսելու՝ զնացել էիր Կիրովական տերտերի: Բերել թաղել էիր շեմքափետիս տակ: Ցույց տա՞ն:

– Եթե ամոք չես անում՝ ցույց տուր:

– Ամեն մարդ իր ամոքն է տանելու:

– Ես ձեր սիրով ապրելու էի ուզում, այ որդի:

– Սերը մեր ցեղում չկա:

– Վայ թե իրոք չկա, այ հարս, վայ թե իրոք չկա:

– Մեր ցեղը գործ է անում, լաստվելու ժամանակ չունի: Յետո էլ՝ տղեդ էր սիրո արժանի լինելու:

– Գնայիր գտնեիր քեզ արժանին, ին տղին հանգիստ տայիր, ին ուզածն էդ էր:

– Որբ էի, գնալու տե՞ղ չունեի: Թևերը վրաս փոշած մե՞ր չունեի:

– Մեր չունեիր՝ հեր ունեիր, ախապեր ունեիր, պապոնք ունեիր: Յերդ մի քաղաք էր կողոպտած ուտում:

– Ինձ համար չեր կողոպտում:

– ճիշտ է: Դրա համար էլ ասում եմ Սիմոնիս հետ խաղաղ պիտի ապրեիր:

– Խաղաղ չեմ ապրել՝ Սիմոնիդ կերե՞լ եմ: Իմ տան գործերն ինձ են պատկանում:

– Շունն է ուտում, դու քեզ մի անպատվիր:

– Ես շուն եմ, շնից էլ վատ եմ վատերի հետ: Լավերին էլ շան պես հավատարիմ եմ: Ամեն ոք ինձանից արժանին է ստանում: Ինչ որ կարող եմ՝ տալիս եմ, ինչ որ չունեմ՝ տալ չեմ կարող, մի պահանջեք:

- Ծիշտ է: Ես էլ էդ եմ ասում:
- Ի՞նչն է ծիշտ:
- Տղես քեզանից սեր չտեսավ:
- Իմ ցեղում էդ ապրանքից չկա:
- Ամեն կին իր ամուսնու համար պիտի սեր լինի: Աբել ապին հնձից, գոմերից, ծմբան փայտատեղից ինչքան եկել է՝ Ես նրան տաշտակի մեջ եմ դրել ու տաք ջրով, գոլ ջրով լողացրել եմ: Սիմոնս քեզանից սեր չտեսավ:
- Իմ սերն իմ երեխաներն են:
- Իմ սերն էլ իմ երեխաներն էին: Ես իմ երեխայի լավն էի ուզում:
- Թեկուզ երեխաս լինի՝ Ես վատը չեմ կարող սիրել:
- Քա՞ծ, – սիրով ու սկեսուրի իրավունքով մրմնջաց պառավը, – ձենո՞ւ կտրիր, քած: Ամոք ունեցիր:

Ոտքի տակ մի շատ աջող փայտ կար, խոսքից էլ՝ իրենք խոսքից երբեք չեն խեղճացել, եթե հիմա խոսքը շրպպացնելով փայտը վրա բերեր՝ մեղավորը նախ ինքն էր լինելու և հետո էլ իր գլուխն էր ցավելու, պայթելու էր իր գլուխը... Աղունը ոտքի ելավ իր տան դրանը և իրեն ասաց, որ իրենն են այդ այգին, այդ տունը, շունը, գոնը, երկու կովն ու երկու մողին հանդում են, չգրանցված երինջը հանդում է, քսան ոչխար ունի և տասնյոթ խոզ, մեղրը քանձված ու կարասավորված է, երևանի պես տեղը Արմենակի պես տղա ունի, Արմենակը թերթերում շրջկոմների քարտուղարներ է քննադատում. Սիմոնը մեղվի պես զնգոցով բերում է, ձմեռը հատակ է տախտակում, առաստաղ է խփում, ամռան արևին հանդում է զնգում, անձրևին՝ տանը, երեսուն հավը շխչշխկալով ձու է ածում... Աղունն այսքանն իրեն ասաց և ասաց, որ ինքը քառասուներեք տարեկան է, քառասուն տարվա փափուկ ու բարի կյանք է ննջում իր դեմ, մաքուր, կարծ հագնված թոռները դեռ պիտի գան ամառները, թիթեռ պիտի բռնեն ամառները քաղաքի ծևով, պիտի խոսեն Ծնակուտի սպիտակ արևի մեջ երևանի շեշտով, – Արա՝, Սամվել, – հարսը դեռ պիտի կանչի երևանի շեշտով դեպի գետակ՝ աչքերը Ծնակուտի արևից կկոցած. – Սամվելինկ... – բայց ապա մի սպասի՞ր. սրանք եղ ի՞նչ սիրուց են խոսում:

- Տղիդ շապիկը կեղտոտ տեսել ե՞ս:
- Չէ, – ասաց պառավը:
- Տղիդ անկողինը կեղտոտ տեսել ե՞ս:
- Չէ: Չեմ տեսել:

- Տանը ճաշացու է եղել ու տղիդ սոված տեսել ե՞ս:
- Չեմ տեսել:
- Իմ հագին նոր շոր ու իր հագին հին՝ տեսել ե՞ս:
- Չեմ տեսել:
- Ամեն անգամ երեսի բուրդը մինչև խուզել եմ տալիս՝ մի կռիվ լի-նում է: Ես էսքանն եմ, ինչքան կարողացել եմ՝ տվել եմ, ինչ որ չել կարող՝ չել հնարելու: Ես եգորի Սիրուշը չեմ, որ Արտաշի հետ լրբու-թյուն անեմ, մարդիս հետ էլ՝ փիշի-փիշի: Մարդ է, կատու չի: Կովն էլ ծախեմ՝ ժամացույց կապեմ, ոչսարն էլ ծախեմ՝ կոշիկ հագնեմ: Բարձրակրութեակ, – ասաց Աղունը: – Բանի էիր եկել, ինչի՞ էիր եկել, ասա:

Աղամի դռանը թիւկալ սկսեց կացինը: – Երեխաս քնից վեր կա-ցավ, – ասաց պառավը: – Աղամս: – Եվ աղոթքի պես շրբունքները դողացնելով պառավը մրմնջում էր թե անիծում, հետո լսելի ասաց: – Աղամս, Սիմոնս, Յակոբս: Արաքսիս, Սիրանս, Արփենս: Արփիկս չկար: Իմ ժամանակն էր՝ Արփենիկս գնաց: Արփենիկս անբախտ եղավ:

Փիլոյի Արուսը գալիս էր ջրի: Գիրանում ու գիրանում է Արուսը: Ու ծիծաղում է՝ ծիծաղում է: Երբ Աղունը փախավ Վանքեր ու սրանք՝ փեշները քշտած՝ աղջիկ փնտրեցին Սիմոնի համար, Յովիտ գյու-ղում Արուսին էին հավանել: Խուփը գլորվում է կճուճը գտնում – իրենց արժանին իսկական գտել էին. կարտող կուտեին, գոնում կապրեին, – գոմի մարդակները կաղնուց էին, կդիմանային մի հար-յուր տարի, – ու տան վրա թևներին ցավ չէր տա ու կիրը չէր կու-րացնի աչքները: Թե չէ՝ խեղճ Փիլոն կարեցածի չափ թօցնում հա-թօցնում է կոլխոզից – դեռ հորենական օժիտի մեջ են քնում: Ու ծիծաղում են, ծիծաղում են կարտողեամիամ ծիծաղով: Ի՞նչ է եղել – ցանցավոր մահճակալ են առել՝ հանգիստ քնել չի լինում. Արուսը ծանր է, Փիլոն՝ թեթև, գլորվում, ընկնում է Արուսի վրա: Սրանց սերը ըստ երևույթին այդ է: Չե, մենք դրանից չունենք, մեր ոչխարը չխու-զած, մեր կարտողը հանելու, մեր խոզը հանդում կորած՝ մենք չեն կարող ծիծաղել:

- Արուս, – կանչեց Աղունը:

Դույլերը ծեռքին՝ Արուսը կանգնեց:

- Երևան են գնում, ամանդ մինչև կլցվի՝ արի թեզ բան ցույց տամ:
- Էսքան տեղը բարձրանա՞մ, – ծիծաղեց Արուսը:
- Ղժվար է՝, – և ծաղրեց հարցրեց Աղունը:

- Յեշտ է՝ – ծիծաղեց Արուսը:
- Իսկ ես ո՞նց եմ ամեն օր բարձրանում:
- Դու Աղունն ես, – ծիծաղեց Արուսը:

Աղամի դռանը կացնի թխկողը կտրեց: Այս արևին ականջակալ գլխարկով՝ Աղամը կանգնել էր սայլի մոտ և, աչքերը ճպճպացնելով, բառերը դասավորում էր: Աղունին ու մորը նայելով բառերը դասավորեց, դասավորեց ու ընդամենն ասաց.

- Չրույց եք անո՞ւմ:
  - Յա, – ասաց Աղունը, – ցուրտ է:
- Աղամը աչքերը ճպճպացրեց, ճպճպացրեց, հետո հարցրեց.
- Եդ նանն է:
  - Նանն է, – ասաց Աղունը: «Զեր սիրելի մայրիկը»:
  - Շըմ, – քնծիծաղեց Աղամը:
  - Ի՞նչ է, – ասաց Աղունը:

Աղամի մասին սրանք իրենք են պատմում, թե մտքի մեջ շատ լավ իմացել է, բայց արտասամելու փոխարեն լացակումել է, դպրոցում չի արտասամել ։ Յովիաննես Թումանյանի «Փարվանա» պոեմը, ասել է՝ «խոսելը ծանր է, է»: Այս Աղամը նայեց մորն ու հարսին, նայեց, աչքերը ճպճպացնելով բառերը դասավորեց և ասաց.

– Իշին ե՞ս դրել նանին:

Եդ՝ ժողովներում է, որ Աղամը լեզու չունի ու նախագահից եզ խնդրելիս – Աղունի դեմ լեզու էլ ունի, ծաղր էլ ունի: Դիմա տարվա բացակայությունից Գերմանիայից վերադառնում էր, Աղունը պարելով դեմ գնաց փաթաթվելու, իսկ նա մի կողմ կացավ ու ասաց. – ճամփա եմ տալիս՝ տեսնեմ կարո՞ղ ես մինչև Վանքեր մեկ գնալ ու էլ չգալ: – Սրանք աղի արտասուք են դարձրել մեր բոլոր ուրախությունները:

– Գնում եմ երևան, – ասաց Աղունը, – զրո բաների ժամանակ չունեմ:

– Բարի... – Աղամը տնքաց, տնքաց ու գտավ խոսքի շարունակությունը, – ճամփա: Ինձ համար մի հատ... – Աղամը դասավորում էր մտքի շարունակությունը, Արուսի գլուխը աղբյուրի ձորակից դուրս եկավ, պառավն աղոքք թե անեքք էր մրմնջում, Արուսը ձորակից լրիվ էր դուրս եկել – Աղամը դեռ դասավորում էր մտքի շարունակությունը:

– Քեզ համար մի հատ ականջակալ գլխարկ բերեմ, – ասաց Աղունը:

– Յա, – ծիծաղեց Աղամը, – նայիր, եթե... – ու մտածել սկսեց շարունակությունը:

– Նայեմ, եթե լինի՝ բերեմ: Տաք-տաք, թեթև-թեթև, որ և օգոստոսին դմեք և հունվարին:

Աղամը կացնով մի անգամ էլ թխկացրեց. գլխարկը գլխին ուղղեց և ասաց միանգամից և ամբողջական.

– Մի հատ էլ կա՞պիչ կրերես, չմոռանաս:

Պառավը հիմա չէր մրմնջում. խոսում էր, և աղոթք ու անեծք չէր՝ խոսքը վերաբերում էր Աղունին.

– Միմոնի գուլպան ծակ չի եղել, շապիկը կեղտոտ չի եղել, Միմոնը սոված չի մնացել, դու լիրք չես եղել, երեխայիս ապրուստը դեսուդեն չես արել, բայց ես քեզանից գոհ չեմ ու անգոհ եմ, քանի որ...

Աչքը ցանկապատի երկարությամբ օրորվող Արուսի գլխին, Աղունը հանկարծ հասկացավ, որ Աղամի խոսքը լեզվի կապիչի մասին էր: Խայթվածի պես վեր թռչելով, Աղունն ասաց պառավին.

– Ուրախության եմ գնում, պայծառ օրս մի պղտորեք: Սերո, շունը պահիր էն կնիկը գա:

– Ես քո թշնամին չեմ, – ասաց պառավը: – Մի գլուխ սխտորի էի եկել, չգիտեմ մերը պրօել է թե երեխեքն են կորցրել: – Եվ Աղունի հետ գնալով սխտորի և հիանալով մառամի առատությամբ ու կարգուկանոնով, պառավն ասում էր պատմելու պես. – Որդին հարսինն է, աղջիկը՝ փեսայինը. շաղ են գալիս՝ տանը մնում ես մենակ. լավ է թե վատ է՝ մարդն է քոնը. ամեն մեկը իրենը գտնում է՝ քոնը քո մարդն է. քառասուն տարեկան կորցրիր թե ութանասուն՝ ամենամեծ կորուստդ է. զավակները հայր են կորցնում, հարսները սկեսրայր են կորցնում, թռոները՝ պապ, իսկ դու քեզ ես կորցնում, քանզի ոչչի պետք չի լծի կենտ եզը: Քանզի դու նրա հետ եզ էիր ու գութան էիր քաշում: Մի լծի լծված եզները իրար սովորում ու իրար հասկանում են, ու իրար խնայում են: Իմ աղջիկ ժամանակ մեր Ծիրան եզը հիվանդացել էր, մեր խնձոր եզը իմ հերը լծեց գոմեշի հետ: Իմ հերն աղի արտասուր էր քափում, որովհետև ցանքի ժամանակն անցնում էր, իսկ նրանք իրար հետ չէին քաշում, գոմեշը նրան էր սպանում, նա՝ գոմեշին, հերս ասում էր իրար չեն սիրում, ատելով ատում են: Սուրբ գիրքն ասում է. «Եթե թշնամի ունես՝ նրա հետ մի խոսքի արի, քանզի նրա հետ նույն ճանապարհի վրա ես, նա քեզ դատավորին կտա, դատավորը՝ դահիճին»: Իսկ ես քո թշնամին չեմ, մերդ եմ,

մորդ տեղն եմ:

– Բավական է, լավ, եզները իրար սիրում են, մի դրան շները իրար չեն կրծում – Աղունը Սիմոնին օր չի տալիս, բավական է: Աստված ինձ անմեր է ստեղծել: Սերո՞... ճամփի վրա եմ, դու էլ գիտես, որ քո աչքը ծանր է... Սերո, թոխ գյուղամեջ, հորդ ասա ուշացանք, շո՞ւտ... Քո էդ սուրբ գիրքն ինձ վրա չազդեց:

Երբ երեխան ծորակն անցնում էր, Աղունը իրահանգեց.

– Դինք րոպեից էստեղ լինի:– Եվ մեջքը դարձնելով պառավին, Աղունն ասաց աշխուժով:– Արուս ջան, քեզ կանչել եմ մի խորհուրդ հարցնեմ:

Պառավը գնաց՝ ճանապարհին ընկած փայտը դնելով կույտին, փեթակները համրելով և նրանց թվից ուրախ: Լաց լիներ, լաց չլիներ: Ուզեց թեքվել Արտամի մոտ, հասկացավ որ Արելն է պետք: Իսկ էդ անտեր արտասուլքները չեն գալիս... Ո՞ւր կորան էդ անտեր մաքուր վիշտն ու ուրախությունը, ե՞՞ր ցամաքեցին էն շատ ու թեթև արտասուլքները:

– Արուս ջան, պառավին մատ եմ արել: Գնում եմ երևան: Հա, պառավին պայտեցի, մի հինգ տարում երե մաշեց... Քեզ էլ կանչել եմ, որ մի խորհուրդ հարցնեմ, մինչև ամանդ կլցվի:

Արուսի փեշերը իրար տակից երևացող, Արուսի Փիլոն կոլխոզից բուրդ գողանա՝ Արուսը նույնությամբ էլ առանց լվանալու լցնի ներքնակների մեջ, Արուսը ծնկները չոած նստի վառարանի մոտ՝ նրա գորգը գործեն հովհատեցիք, փողով:– Աղունը Արուսից խորհուրդ հարցնի: ճաշը կրակին Արուսը ժամերով աղբյուրում կանգնի գրուցելու, ճաշը վառվի, պղինձը վառվի, ծուխը բարձերը սևացնի, իսկ Արուսը սրա լուրը բերի նրան, նրա լուրը բերի սրան:

– Արուս ջան, գնում եմ մեծիս տնավորեմ,– պատմեց Աղունը:– Աղջիկը ինժեներ է, հարյուր հիսուն նա է ստանում, հարյուր հիսուն նա, չհաշված հինորարը: Հոնորարը, Արուս ջան, էն է, որ ստանում են տպելու համար: Իրենք խեղճ չեն, բայց մեր ձեռն էլ չոր քարի տակին չի, իմ ունեցածից տալիս եմ, էս դառնամա-մառնան, խնձոր-մնձորը, հինգ հարյուր հատ ձու-մուն՝ զրո, դրանք մեր օրվա պարտքն են, դու՝ քո տղերքին, ես՝ իմին: Չմտածես թե ձուն կփչանա, որովհետև իհնա կասեմ: Սրանք՝ ներքնակներն են, տասներկու-տասներկու կիլո: Զոնոնք գուցե ավելի ծանր լինեին, բայց դե Փիլոն էլ է ծանր, Սիմոնի պես փետ կրծելով չի բերում գրամ-գրամ... իսկ որ ճիշտն ասենք, մի նեղացիր, Արուս ջան,– վիզը թեքեց Աղունը,–

քոնոնց բուրդը լվացած չէր, իմը լավ լվացած է: Իմ էս մատներով: ճիշտ է, ջրից դուրս եկա ու երկու ամիս հաշմանդամ դարձա, բայց մի բան հաստատ է՝ որ տասներկու կիլո մաքուր բուրդ է, ոչխարի թրիք-մրիք չի: Արանք՝ ներքնակները, Արուս ջան: Դիմա գանք վերմակներին: Երեսները՝ որ գնացել էր Սիրիո խամուխոպան ու եկել էր Մոսկվա՝ փող ուղարկեցի, Մոսկվայից բերեց: Երեսները Մոսկվայից են, Արուս ջան, իրենց ճաշակով, իրենց ուզածի պես: Իսկ իրենց ճաշակը քաղաքի է, եղ մի բանը ճիշտ է, մենք գյուղացի ենք, քիչ ենք տեսել՝ քիչ գիտենք: Բուրդը՝ մարդդ որ գնում էր Ղազախ ու ես խնդրեցի, որ մեր ցեղականինը տանի փոխի տեղականի հետ ու Սիմոնն էլ ինձ ծեծեց՝ բուրդն ինքդ ես տեսել, էն բուրդն է: Այո, վերմակների համար էր: Իսկ աստաները, Արուս ջան, աստաների պատմությունը երկար է: Նախմադարյան ժամանակներում ես մի հեր ունեի, անունը Իշխան էր: Մուրադենց Սրբուիհին տղամարդու հին շապիկներ բերեց տակաշորացու, երեխան Մուրադենց շապիկների մեջ հիվանդացավ, Իշխանը, Մանացից, հազար երեսունվեց, հազար ինը հարյուր երեսունվեց թվականի փետրվար ամսին քսան մետր սպիտակ, ձմռան լուսնի պես մաքուր կտոր ուղարկեց... Սանվելիս ցա՛վը տանեմ... Պատերազմի միջո՞վ, սովի միջո՞վ, անշապի՞կ, կարկատանով՝ պահեցի մինչև հիմա ու գցել են երեխայիս վերմակներին աստառ:

— Սուտ ես ասում, Աղուն:

— Նրա կանաչ արևը:

— Ախչի, ամոք է, ամոք:

— Ես եղ եմ:

— Դրա համար էլ կարծես յոթանասուն տարեկան լինես:

— Հա, Արուս ջան,— աշխատմացավ Աղունը:— Օժիտակալ կարպետը իմ պապոնց տնից է բերել իմ մերը, իմ պապոնց տուն էլ եկել է իմ մոր պապոնց տնից, Արծեշից: Երկու բարձ, մեկը սագ է, մյուսը՝ չկարողացա, սագերս մտել էին Փիլոյի լորուտ, Փիլոյի Արուսը շունը բաց էր թողել, խեղդել էր մեկ-մեկ, եթե հիշում ես: Ոչինչ, Արուս ջան, հավա էլ ձեռ կտա, ինքն ինձ համար մի գլխաշոր չի առել: Ես՝ գորգն է: Զի ուզում, բայց դե իր անունով եմ գործել: Իսկ չի ուզում էն պատճառով, որովհետև քաղաքուն պատվեր են տալիս սենյակով մեկ: Ուժ ունեցա՝ կտամ կպատվիրի, չունեցա՝ դու ողջ լինես, Արուս ջան, սա՛ կցցեն ոտքների տակ:

— Հարսդ ինժեներ է, տղեդ ստանում է բուռ-բուռ, էլ ինչո՞ւ ես

Էսքանը տանում:

– Բուռ-բուռ ստանում է, բուռ-բուռ էլ ծախսում. ընկերների հետ նա մի գիշերում չորս հարյուրի գլխին քար է գցում: Մի կովի գին: Իսկ ես, Արուս ջան, էսքանը տանում եմ, որովհետև նախ շատ չի և երկրորդ՝ իմ ծնողական պարտքը:

– Ախչի... ախչի, ուժը հատած մարդիդ երեսը դու ուտում ես, որ տանես քամուն տա՞ս:

– Սրանք ինձ դուրս էին գցել ու եկել էին քեզ ուզելու Սիմոնի համար. այսի հաջողվեր, այսի գայիր, պիտի նայեիր երեսին ու ծիծառեիր, ինքն էլ քո երեսին ու ծիծառեր – լավ կլիներ:

– Փիլոյի ճկույթի հետ չեմ փոխի:

– Տարին մի տոննա բուրդ է մտնում քո տուն, ինչո՞ւ պիտի փոխեիր:

– Քոնք չի բերում:

– Փայտ կրծելով, այո, բերում է:

– Չո ապրուստն իմից պակաս չի:

– Եդ ուրիշ հարց է, Արուս ջան, դրա մասին արի չխոսենք: Ես ռեալիստ եմ, եթե խոսքը ճակատին չասեմ կիհվանդանամ: Քո մարդը բերում է, ինը չի բերում, բայց իմ ունեցածը քոնից մի քիչ ավելի է, պակաս չի, քանի որ ես տան կինը Աղունն է: Աստված սահմանել է, որ չեղած տեղը կարող նստի, եղած տեղը՝ անկարող: Որպեսզի լինեն հավասար:

– Ինչ որ է, Աղուն, մարդդ մեղք է:

– Դրա պատասխանն էլ կա, Արուս ջան. որպեսզի մեղք չլիներ՝ պիտի գողանալու խորանանկություն ունենար, չունի՝ պիտի վիզը ձգելով աշխատի:

– Աշխարհը հեշտ է, Աղուն, բայց դու դժվարացնում ես ու քեզ էլ սպանում, ուրիշներին էլ: Պատերազմի ժամանակ մի փոր կարտողով ապրում էինք ու իիշո՞ւմ ես ինչքան էինք ծիծառում: Որ գոդի Արտոնյին բարձեցինք...

– Գողացողի համար հեշտ է, վայ չգողացողին: Գոդի Արտոն բոշակի հարցով գնացել է Արմենակի մոտ, Արմենակը ասել է՝ տեսնենք:

– Ղե որ ձեռքից էդպես գալիս է, մոտը պիտի գնանք, բա ի՞նչ պիտի ամենք:

– Քամակը բաց հերն է, իհարկե կօգնի ծմակուտեցիների լավությունների համար:

- Բա իր բարեկամներն ենք, ինչո՞ւ չպիտի օգնի:
- Մարդիս կեսը ինձ է եղել, կեսը՝ ուրիշներինք, իսկ ընդհանրապես՝ կոլխոզինք, տղեն հորը կքաջի: Եթե իմ արյունից մի կաթիլ մեջը կա, գոմը նա չպիտի մռանա: Զուրդ լցված կլինի, կրակին ճաշ կունենաս, գնա, Արուս ջան, քեզ գործից չգտեմ:
  - Ել բան չունե՞ս ցույց տալու:
  - Իմ խեղճուկրակ աղքատությունից էսքանը հանել եմ՝ քի՞չ է:
  - Լավ բաժինք է: Դե հնում կով էին տալիս, բայց հիմա կովն իրենց ինչի՞ն է պետք:
  - Կովի դիմաց ես մի բան եմ մտածել, չգիտեմ կիավանես թե չես հավանի: Կովի դիմաց, Արուս ջան, հինգ հազար ռուբլի փող եմ տալիս: Փողը ձեռքները չեմ տալիս՝ որ գնան կինո, թատրոն, ռեստորան, ես ինքս իմ ձեռքով հագուստի պահարան եմ առնելու, դնեմ տանը:
  - Յա՝, – մռաց Արուսը: – Բա տուն ունի՞:
  - Ժունալիստներին տուն շուտ են տալիս: Աշխատելու տեղն առանձին, քելու տեղն առանձին, որպեսզի ընտանիքը չխանգարի, իրենցը գլխի աշխատանք է:
  - Յա՝, – մռաց Արուս:
  - Եղ՝ հագուստի պահարանը: Ինքը չի ուզում, բայց ինքը անհասկացող հերն է: Սիրում է, որ հագուստի տեղն առանձին լինի, ամանեղենին առանձին, դաշնամուր էլ է սիրում, բայց չի հասկանում, որ դրանք պիտի առնես՝ որպեսզի ունենաս: Ուստորան գնալ՝ հասկանում է: Են աղջիկն էլ՝ ետևից: Նրանց մի խստ վերահսկիչ է պետք իմ տեսակի: Դաշնամուրն առնելու ոչ ուժ ունեմ, ոչ էլ հասկացողություն, բայց, Արուս ջան, ճաշասենյակ եմ առնելու: Դա բերում են Մոսկվայից: Դա արժե, Արուս ջան, հազար ռուբլի նոր փողով: Թանկն էլ կա, բայց ես չունեմ թանկի ուժը:
  - Լավ է, – համաձայնեց Արուսը: – Շատ լավ է, – համաձայնեց Արուսը: – Շատ լավ է, խելքից դուրս է, – զարմացավ Արուսը: – Ախչի, դու հո խելագար չե՞ս, – շփորքեց Արուսը: – Ախչի, դու խելագար ես, – ձեռքը բերանին մտածեց Արուսը: – Ախչի, դու հիմար ես: Ախչի, տո հարսիդ հերն էլ թաղեմ, տղիդ հերն էլ անիծեմ, ահչի, դու ես տունը սրբած տանում ես ո՞ւմ համար, – դեպի դռները գնաց Արուսը: – Դե տանում ես՝ սուսուփուս տար, ինձ ինչու ես կանչել: Տո քաղաքիդ գլուխը հողեմ, – դրների միջից շուր եկավ Արուսը, – քաղաքի պտու՝ հարսդ մեծացել է մաքրության ու փողի մեջ, դու էլ արյուն-արտա-

սուքով մի քանի կոպեկ ես իրար գցել՝ որ տանես նրանո՞վ անես: Ասել են, է, ասված է. շատը շատին, իշի... բանը աղքատին... քեզ չես խղճում՝ չես խղճում, ախչի, են մարդդ մեղք է, անամոթ:

«Դե հիմա զնա, Արուս ջան, ջրիդ, ու լուրջ տար, գյուղի բերանը գցիր: Ասա՝ Սիմոնի Աղունը մի կարպետով բաժանվեց, հիմա տղայի համար դաշնամուր է առնում»:

– Եվ՝ սառնարան,— ասաց Աղունը:

– Ի՞նչ:

– Սառնարան: Երեք հարյուր ռուբլի նոր փողով, ուտելիքը դնում են մեջը՝ չի փշանում: Ամառները մածուն կուղարկեմ, կարագ կուղարկեմ, հավ կուղարկեմ՝ չեն փշացնի, ինչ կուտեն՝ կուտեն, մնացածը կղճեն սառնարանում: Իմ հայր Իշխանը բանկում իմ անունով հարյուր հազար փող էր թողել, իմ ախաբերացու Վալորդ տակվերոց արեց: Ուզում եմ ասել՝ ծնողը իմ հայր Իշխանի պես պիտի լինի: Վսյո՛:

– Ունեցվածքը քոնն է՝ ցանկությունը քոնն է: Եթե ինձ խոսք է հասնում՝ մարդդ մեղք է: Մարդիցդ հանել ես, տալիս ես ուրիշի աղջկան:

Յարսն այնպես լիներ, որ նրա տանը Աղունի ծայնը լիներ ընտանեկան: Ասեին՝ տատիկը: Ասեին՝ մայրիկը: Յարսն ասեր՝ մայրս:— Զանս, աղջիկ ջան:— Յարսի համար կապել տար ոսկի մի ծանր մատանի:

– Արուս,— մրմնջաց Աղունը:— Արուս, ես բախտավոր ե՞ն թե անբախտ:

– Մարդու նեղություն ես բերում, Աղուն, ազնվությամբ:

– Էդ՝ զրո, Արուս, դու եկել էիր թե չէիր եկել — գելը մի գիշերվա մեջ Ներսեսի Երեսունիինգ ոչխարը ջարդեց. Երեսունիինգ ոչխարի տեր էր՝ հիմա դատարկ գոնի տեր է. փող է, կգա էլ, կգնա էլ. գրպանը հազար ռուբլի դրած իմ տղա Արմենը ընկերների հետ գնացքի ռեստորան է նստում Թիֆլիսից Երևան, ժամացույցները թողնում են, դուրս գալիս: Ես բախտավոր ե՞ն թե անբախտ:

– Քո տղա Արմենակը քո տղա Արմենակն է. քոնը քո բկիդ ուռուցքն է. քո էր հարսը մինչև հիմա որ լավ է ապրել՝ էր դու չես լավ ապրել. ու հիմա էլ որ Արմենակի կինն է լինելու՝ Արմենակի տերն ինքն է լինելու. քոնը քո Սիմոնն է: Ես էղանս եմ կարծում: Իմ տղերքին ես տվել եմ առողջություն ու մի ձեռք անկողին: Իմը իմ Փիլոն է, եսօր Երկուսով Երկու հավ ենք կերել: Իսկ էր մի-մի ձեռք անկողինն

Ել իգուր եմ տվել: Ի՞նչ է եղել – աշխարհը լե՞ն, որ կողմ նայում ես՝ ապրուստ ու կյանք է թափած: Դու ծիծաղելու սիրտ ուզիր: Դու բախտավոր ես թե անբախտ՝ դու կիմանաս, իսկ իմ մասին՝ ես գոհ եմ որ Արուսն եմ և ոչ թե Աղունը:

– Ես անբախտ եմ, Արուս. իմ մերացուն դարպասեցին է եղել, իմ հերը իշխանն է եղել, քսան մետր կտոր է տվել, երեխային մի անգամ մի բուռ կոնֆետ ու սուտ-սուտ խոստումներ հազարների մասին. իմ սկեսուրը Արելի Արուսն է եղել, իմ մարդը՝ Սիմոնը:

– Դե լավ, ուրախության ես գնում ուրախությամբ գնա, ինձ չկանչեցիր՝ որ լաց լինես: Իսկ եթե ինձ լսես՝ եր փողի կեսը բավական է բուժվելու համար:

– Որ անբախտ եմ եղել՝ անբախտ էլ թող գնա: Առողջությունն ուրախության համար է, ուրախությունն ինձ համար սահմանված չի եղել:

Արուսը լեզուն կծեց՝ որպեսզի չասի, բայց չեղավ, չէ, պահել չէր լինում: Յիշանդ, ջղային կին է Աղունը, բայց ախր ինչպես չասի, որ նրա հորաքույր Մանիշակը էս լուս աշխարհ էր մտել աստծու անեօքը սև ամպի նման գլխին, մի ամուսին Յախապատ էր կորցրել, մեր հորեղբորը՝ Էստեղ. աչքներիս առաջ երեք որբ Դսեղա աղջիկը թողեց, հինգ երեխա՝ շարմաղ Ներսեսը... բայց էս ամբողջ Ծնակուտում նրա ընտանիքից լավ հյուրատուն կա՞ր – նանի շուրջը կազմակերպած մի պուճուր պետություն էր:

– Ամեն մարդու ուրախությունն իրենից է զալիս, Աղուն ջան. բախտավոր է՝ ուրիշներով չի բախտավոր, դժբախտ է՝ մեղավորն ուրիշները չեն:

– Իմ երեխան գոմում է ծնվել:  
– Իմո՞նք որտեղ եմ ծնվել:  
– Ես քաղաք տեղից էի Եկել, դու՝ Յովիտից:  
– Քաղաքից մենակ՝ դու ես Եկել:  
– Իմ հոր պալատները – իմ մարդի գոմը:  
– Դե լավ, քեզ բարի ճանապարհ, իմ ճաշն էլ հիմա վառվեց:  
– Շնորհակալ եմ, Արուս ջան:  
– Դու քաղաք տեղից էիր Եկել, ես Յովիտից – Յովիտ մարդիկ չեն ապրում:

– Երանի քե՞զ: Մարդիկ գնում են Եսենտուկի, Օդեսա, արտասահման գնում մարդիկ, դու՝ «Յովիտ ապողովները մարդ չե՞ն»:  
– Եսենտուկի ու արտասահման բացքամակ հիմարներ չկան, էլի:

– Ախչի, գործի՞դ գնա:

– Չո հորաքույր Մանկակի հացը մի անգամ կտրում էին ու հարյուր տարի չեն մոռանում: Նրա հացում աղ կար: Չո լեզուն քո թշնամին է:

– Եդ մեկը ճիշտ է, իմ հացում աղ չկա:

– Կառնեն ճաշասենյակն էլ, սառնարանն էլ, գորգը ոտքների տակ էլ կցցեն ու վրան երեխային փիշիկ անել կտան ու քեզ կասե՞ն դու ով ես:

– Ճիշտ է, արմատահան լինի իմ լեզում:

– Կտեսնենք:

– Դու ճիշտ ես, Արուս ջան, փոքրը եսօրվանից է ասում, թե լավ են արել, որ իմ անունը առնառուտ են դրել:

Դարսն ու տղան կրվեին, մազերը շտկելով հարսը այն սենյակից այս սենյակ գար.— Մամա, էս տանը ես էլ չեմ ապրի... Ես անամոթին ասա...— և ինքը գրապահարանի մոտից կանչեր որդուն այս սենյակից այն սենյակ.— Այ տղա, Է՞յ, սի՞նոնացու, թնիցդ կբռնեմ ու դուրս կշպրտեն, վա՝ լոդացու...

Երբ Յովիաննես Թումանյանը գրում էր, գրագետները քիչ էին, քչերն էին գրում, ճանաչվելը հեշտ էր Յովիաննես Թումանյան, Յովիաննես Թումանյան, Յովիաննես Թումանյան — մի տասը գրածանաչից մեկն է եղել ու հիմա արձան էլ ունի, տուն-թանգարան էլ ունի... Այ, Յովիաննես Թումանյան, գայիր ժուռնալիստ աշխատեիր, տեսնեի անունդ որտե՞ղ է հոլովկում: Յինա բոլորն էլ կարդում են, բոլորը կարող են գրել, Վազգենը Արմենակիս գրածը չի հավանում, ասում է «Ես իրենից լավ կգրեմ», կա՞րող էիր, Յովիաննես Թումանյան, հազարի մեջ աչքի ընկենել այնպես, որ արձան ունենայիր ու օրորոցդ էլ պահեին. «Ես էն օրորոցն է, որի մեջ օրորել են Յովիաննես Թումանյանին»: Ահա իմ մայրական սիրտն ասում է, որ Արմենակը արձան է ունենալու: Նրա գրելու շնորհը Վանքերից է գալիս իմձանով. Ես Վանքերի աղջիկ եմ, իմ հայր Իշխանը ասող-խոսող մարդ էր, իսկ Ծմակուտի կողմը բերանը կապած է. Նրա հորեղբայր Աղամար ընդամենը գլխարկ է ուզելու՝ երեք օր մտածում ու այդպես էլ չի կարողանում արտահայտվել արագ և ամբողջական: Բացի այդ, Արտաշես Արզումանյանն էլ Վանքերից է: «Իմ լեզուն իմ թշնամին է» — իմ լեզվի շնորհիկ է աչքի ընկել իմ որդին: Մի լեզու ունեի, մի խեղճուկրակ ամուսին և մի կարպետ: Գնա, Արուս ջան,

լուրջ տար Ծմակուտին, Ծմակուտով՝ Յովտին, Մանաց քաղաքին ու Վանքեր գյուղին, որ Եշխանի դուստր Աղունը իր որդի Արմենակի ամուսնությանը նվիրաբերում է երեսուն հազար ռուբլի փող և իր մայրական հպատակությունը նրա գործին ու լավ ապրելուն:

Արձանը պետք է դնել Վանքեր: Բայց մի արձան էլ պետք է դնել իին գոմատեղը. այստեղ Աղունը տանջանքով մեծացրել է Յովիան-նես Թումանյանի և Արտաշես Արզումանյանի նման մարդու: «Եսկ տիկին Սոֆին դեռ երկար մնաց ջահել, կրակոտ, փարթամ, և դեռ շատերին փոխեց, և այդպես էլ չպառավեց, և այդպես էլ մեռավ՝ որովհետև մեռածները գերեզման են ունենում, իսկ նա չունի: Երկի հալվել, ներծծվել է աշխարհին և աշխարհը որոշ չափով սոֆի-ացրել»: Մեռնեմ ճարտար լեզվիդ – «աշխարհը որոշ չափով սոֆի-ացրել»: «Որոշ չափով»: «Ներծծվել»: «Ներծծվել»:

– Սերո՞...

Յովիաննես Թումանյա՞նն է նշանավոր թե Արտաշես Արզուման-յանը: Արտաշես Արզումանյանը թռել էր Ամերիկա, որպեսզի պատերազմ չլինի: Ասում էին պատերազմ էր լինելու՝ Արտաշեսը չեր թռել: Այդ օրերին ռադիոն ու թերթերը բոլորը միաբերան ասում էին «Արզումանյանը, Արզումանյանը, Արզումանյանը», և ինքը Արմենակին ասաց. – Ինչո՞ւ չես ուզում դառնալ շրջկոմի քարտուղար: – Խնած էր, մրթնրթում էր՝ չե՞մ փոխի, չե՞մ փոխի: Յայսատանում կա հազար գրող ու ժուռնալիստ, տեղից ելնողը գրում է: Մուրադենց Գիքորն էլ է բանաստեղծություններ գրում: Աղամն էլ էր ուզում իր պատերազմական կյանքից գրել. այնտեղ Մանեն ու հարևանները ծեծում էին տորքը, այնտեղ խաշած կարտոլը սառչում էր նրա դեմ, իսկ Աղամն գրիչը թաթախում էր ու մտածում, թաթախում էր ու մտածում: Թուղթը պոկել էր տեսրակից, դրել թաց մոմլաթի վրա, գրիչը թաթախում էր ու մտածում: Ինքը ծաղրեց. – Յորեղբայրը գիրք է գրում, մեծ փող է ստանալու: – Յորեղբայրը նեղացավ. սառած կարտոլի հետ թանաքն ու թուղթը թողեց սեղանին ու գնաց տաշել սկսեց իր սայլը: Ու դրանից հետո նա ու իր որդի Վազգենը, նրանց հետ էլ Մանեն, Արմենակի գրածը չեն հավանում: Արմենակը Արտաշես Արզումանյանի պես էր լինելու՝ սև կոստյումը հագին երեմն գյուղ գար, գյուղացիները նայեին մի քիչ հեռվից, իսկ Արմենակը նրանցից ոմանց բարևեր ձեռքով: Մեղք է էն երեխան. ծուխը սենյակը լցրած՝ գրում, գրում է, առավոտը թթված վեր կենում, կարդում ու պատռում: Իսկ դու Արուսին պարծեցիր, թե նրա մի գիշերը հազար արժե: Ոչինչ,

որդիս, տանջանքը մարդու համար է, իսկ քո արյան մեջ կա տանջանքին դիմանալու ընդունակություն. քո մայրը բաժանվեց մի կարպետով, իսկ հիմա կորածների մեջ չի: Սկզբում տանջվում են վերջի համար: Արզումանյանը որ Արզումանյան է՝ կնոջ թաղմանը չկարողացավ Ամերիկայից գալ: Չեն տանջվում միայն գողերը և անասուն մարդիկ կան՝ անհասկացողները: Աշխարհի կեսը գողությամբ է ապրում, կեսը՝ աստծոն ու մոր տված շնորհով: Լավն այն է, որ ունեցվի լավ ապրելու հետ մաքուր անուն էլ: Փողով կարելի է մաքուր անունի հասնել, բայց բոլորը կասեն՝ ահա այս մարդը փողով մաքրեց իր անունը: Յայրդ փայտ է կրծում, դու՝ թուղթ – իսկ իմ եղբայր Վալոդը քառասուն տարեկան եղավ՝ ոչ գլխի ցավը ճանաչեց, ոչ թէի: Մաքուր անունը մաքուր անուն, բայց աշխարհը լիքը հեշտ գործ է – պիտի դառնայիր դեկավար աշխատող: Կյանքը մի անգամ է լինում ու պիտի կենտրոնում լինել: Իսկ որ ճիշտ ասենք՝ ինձանից հետո ջրհեղեղ: Վանքերի կնյազ Նիկոլը արյուն խմելով է հարթել, իմ պապ Բեգոն՝ քաղցով: Կնյազ Նիկոլին ամիջում էին, իմ պապ տիրացուին՝ օրինում: Յող ու մոխիր: Իսկ որ անկեղծ ասենք՝ հետն ով ինչ տարավ՝ տարավ. նա իր կշտությունը տարավ, նա իր քաղցը: Այդ արձանը, մարձանը, հիշելը, միշելը սուտ բաներ են – աշխարհը մեզ համար մի անգամ կա ու դրանից հետո փակվում է, վսյո, մեխեցին՝ պրծավ, քեզ մնում են քո տեսածը, սիրածը, կերածը, վայելածը: Իսկ հետո թե քո մասին ինչ կասփի՝ պարապ մարդկանց գրուց է: Իմ հեր Եշխանը գողանում էր – իմ հորեղբայր Վաղարշակը անկարող էր և այդ պատճառով էլ ասում էր՝ «ամոթ է, Եշխան»:

– Գործ գտիր, գործ գտիր, գործ գտիր... – ծանածռվելով, Ծմակուտից Երևան, հղեց մայրը որդուն: – Թուղթ ով ասես կմրոտի, հրեն Մուրադենց Գիքորն էլ է բանաստեղծություն գրում, գործ գտիր:

«Տաեմ՝ քեզ համար մատանի եմ առնում»: – Իսկ եթե չտպե՞ն: Սերմ է, ելի, գցում ենք, կամ կինձենք, կամ կարկուտը կտանի, կամ մորեխատար կլինի, կամ կմրկի, կամ դեզի մեջ կօլի: Զուկը ջրում՝ առևտուր չեն անում: Գարնան ճուտը ուրուրինն է, աշնանը՝ մերը: Բորիկանում են ջրին հասնելուց հետո: Այսօրվա կոպեկը վաղվա հազարի հետ չի կարելի փոխել: «Տաեցին՝ մատանի եմ առնում»:

– Գործ գտիր, գործ... – կրակի վրա շան լափը խառնելով զզվելով ծղոտաց նա: «Այ մեր, երեք ռուբլի փող տուր, եգուց հոնորարն ստանամ իինգը կտամ: – Այ մեր, երեք էլ տուր՝ քեզ վեց ռուբլի կլինեմ պարտք, հոնորարն եսօր չտվեցին: – Յացի եմ գնում, այ մեր,

Երեսում կոպեկ...»:

– Տո որ քեզ ուղարկում էին անասնաբուժական՝ ինչո՞ւ չգնացիր, ի՞ւ՞։ Եդ է՞լ էր ծեծով լինելու: «Պի-յե-սեմ գը-րում»։ Պի-յես գը-րիր, գյուղի լակոտները բեմից ծնոտները ծռեն, ժողովուրդն էլ ծիծաղի, Սիմոնն էլ ուրախանա, դու էլ՝ «հա-ցի եմ գը-նում, այ մեր...»։

Գլխացավը բռնեց: Քունքերն ափերով սեղմած՝ նա որոնել սկսեց կուչ գալու մի տեղ: Նեռավոր կայծակների պես լուռ՝ ուղեղի փափկությունը ցավը հերկում էր: Կափարիչը հիմա-հիմա անաղմուկ ելնելու էր տեղից. և տաք ուղեղը կաթան փրփուրի պես շատանալու և ծավալվելու էր: Գլուխն ափերի մեջ պահած՝ նա ուսով հրեց խոհանոցի դուռը, և կոտորակվող ճռճռոցը մոտիկ կայծակի պես քանդուքարափ արեց ուղեղը: «Դպրոցի համար թենիս եմ սարքում»:— Վայ մամա ջան, գլուխս խորովում ե՞ն...Վայ մամա ջան, ես ի՞նչ անեմ, գլուխս խորովում են...— Մթի մեջ նա տեսավ շերտավոր կարպետի չորությունը նրանց տված թախտի վրա և նրանց տված մութաքան և զգաց մութաքայի կոշտությունը և մոնմած թղթի եռանկյուն կոշտությունը մութաքայի մեջ:— Գիրկապ լինես դու, Արուս:— Անկողինների ծալքը մեծ սենյակում էր: Մի ուժեղ փափկություն սեղմած պահեր գլուխը: Սեղմե՞ր, պահեր գլուխը: Նա դուրս եկավ, և արևը հանկարծ վառվեց, կուրացրեց ու հանգավ: Գլուխը ձեռքերով բռնած՝ նա տեսավ, որ տաք մոխիր է մաղում: «Վայ մամա ջան, ուղեղս խորովում ե՞ն... Կանցնի, հիմա կանցնի»: Բազրիքի դուռը դեմն էր, պետք էր ծնկով իրել: Նետո արդեն՝ ծալքը և բարձերը: Օժիտակալը փակում էր մեծ սենյակի մուտքը – ինչի՞ս էր անցնելու: Դեմ ընկնի օժիտակալին ու գլուխը դռնով խփի: Նա օրորվում էր բազրիքի դռան մոտ և վախենում էր նրա ճռճռոցից: Դիմա տրաք-տրաքելու էր շան հաշոցը: Դիմա աքաղաղը սղոցելու էր կափարիչը:— Վայ մամա ջան, մի օգնական չունեմ...

Նա պիտի փակեր ականջները, բայց մոռացավ: Արևի մեջ, կապույտ բազրիքի մոտ կանգնած՝ նա օրորվում էր, չէր օրորվում, իրեն հրում էր դեպի մեծ սենյակի ծալքը և մոռանում էր գնալ: Ձեռքերը փխրորեն բարձրացրած՝ նա նազանքով օրորվում էր և մրմնջում.

– Ախր ինչի՞ս է պետք, ինչի՞ս... Ախր ինչի՞ս է պետք, ինչի՞ս... Ախր ինչի՞ս է պետք, ինչի՞ս... Սերո՞...

– Դե թող սպանի, ինչի՞ս է պետք եստեսակ կյանքը, – հարբածի պես գլուխը կրծքին՝ բողոքեց նա:

Տանը նա ծալքի վրա ընկավ և ինքն իրեն ասաց. – Չէ, էդ դու չես,

Եդ քաղաքավարություն չի,— և բարձը տարավ դեպի քախտը և գլուխը բարձի փափուկ մրության մեջ թաղած՝ նա ասաց բոլորին, բոլորին.— Ինչ ուզում եք եղեք՝ առողջ եղեք... Այ ցավ, ի՞նչ ես ուզում ինձանից:

Եվ ականջ դնելով ցավին, նա տեսավ, որ ցավը հիմա դուր է գալիս տաք մոխրի պես:— Ես քո գլուխը հողեմ,— մրմնջաց նա որպես փորձությունն անցըրած և միանգամից կարծես գայթեց ու ընկդմվեց արևի տակ գոլ ջրի մեջ:

Իբր թե չորս կովի տեր՝ իբր թե սարում էր: Կանաչ ու արև էր: Իբր թե չորս կովն էլ կրի էին, չորս հորթ էր կապած մի ցցից:— Երազ եմ տեսնում,— մրմնջաց նա և տեսավ շարունակությունը. ինքը որդուն պատմում էր, թե մի ժամանակ երազում շատ էր թռչում, հիմա էլ չի թռչում: Կանաչ ու արև էր, որդին ասաց իրավարի:— Որ ուզենաս՝ հիմա էլ կրօչես:— Եվ որդին թևին արավ ու թռավ:— Արի, հեշտ է, արի,— մաքուր, ուրախ կանչեց որդին:— Էլ սիրտ ու ցանկություն չի մնացել, կովերը կրելու են,— դերասանավարի տխուր՝ պատասխանեց ինքը, բայց, մեկ էլ, ինքն էլ էր թռչում: Երկուսով թռչում էին ուրդի, գյուղի, խոտհարքների վրայով:— Մեծ կնիկ ես՝ երեխայի երազներ ես տեսնում,— մրմնջաց նա և իրեն ասաց, որ Սիմոնն ուշանում է, եթե որևէ գործից ինքն ուշացել է միշտ Սիմոնի պատճառով:— Ժամացույցը սրանց ցեղի համար չի,— ջղայնությանք մտածեց նա և իրեն ասաց, որ չպետք է ջղայնանա:— Քնիր, քնիր, մի կես ժամ աչքդ կացրու՝ մի ամիս քեզ քավական է:

Սիմոնը քաղաք պանիր ծախելու էր գնացել, կովը ծնելու վրա էր, գյուղացի ու հասկացող Աղամը նայեց «Էս կովը քան օր դեռ ունի», իսկ ինքը չհավատաց Աղամին, բայց քնեց: Գիշերվա էն դառը կեսին իշխանի ծայնը կանչեց:— Աղունիկ, Աղունիկ, Աղունիկ...— ինքը վեր թռավ ու վազեց գոմ՝ Արմենակը գոմում էր, կովի մոտ տնքտնքում էր, հորթը թարս էր գալիս: Մի երկու անգամ ետ մղեցին, մինչև ճիշտ եկավ:— Դու էդ ինչպես զարթնեցիր, Արմենակ, — հարցրեց ինքը:— Երազում իշխան պապին տեսա, վրաս գոռգոռաց, թե կով է ծնում, այտա, տասնչորս տարեկան ես՝ քնել ես, կով է սատկում, այտա:— Արմենակը չհավատաց, որ մորն էլ իշխանի ծայնն է արթնացրել: Իսկ սրանք, Սիմոնն էլ սրանց հետ, ծաղկեցրին. «Իշխանն ասել է՝ ճակատը ծաղիկ հորթ է ծնվում, այտա, վեր կաց, Աղունիկ, Սիմոնը պանիր ծախելու է գնացել, կովը դու պիտի ծնեցնես, Աղունիկ»:

Բարձը տեղը դնելուց հետո նա հայելու դեմ շտկեց քունքի մազը

և ուզեց հիշել, թե ձեռքին ինչ գործ կար գլխացավից առաջ: Եվ պատշաճամբ ելնելով, նա ասաց հաշտվողի պես.

– Խեղծ հերս միայն Սիմոնի դեմ զորու չեղավ: Թենիս է շինում՝ թենիս է շինում: Թենիսի սեղան են տվել՝ թենիսի սեղան է շինում:

Սիմոնը կապրի հարյուր տարի: Սիմոնը կապրի հարյուր տարի – մեզ մեր հիսունը բավական է: Ագրավն ապրում է հինգ հարյուր տարի, ուրուր... ինչպես է՞ր... բազեն: Ագրավն ապրում է հինգ հարյուր տարի, բազեն՝ քառասուն: «Պաահ, հինգ հարյուր տարի սատկած լեշ ուտե՞ն, – պատասխանեց բազեն»:

Կապերը կտրտելով շունը հաշում էր դեպի ներքև: Անասուն չկար, մարդ չկար, Ադամը տուն էր մտել քնելու, – ինչո՞ւ էր հաշում: Յա՛, շան լափը կրակին է: Մի օր էլ կխփի, կսպանի այդ գլխացավը – պիտի բուժվել:

– Այ շուն, ի՞նչ ես ուզում դու քեզանից:

Ներքեսուն Ադամի տունն էր, ձորն էր, քարկապն էր, կաղնին էր, մարդ չկար, դիմացը՝ անտառն էր: Դիմաց անտառի բացատում մի սև կով էր երևում: Կապն արձակի՝ շունը կթռչի ծվատելու էստելից դիմացի անտառ: Ադունը լափ լցրեց գուրի մեջ, բայց շունը ծառս լինելով կտրտվում էր դեպի դիմացի անտառ: Այս դրան շները թշնամի են ամեն մի շունչ արարածի: Սրանից առաջ եղածը սրտի պայթյունից սատկեց – շուն չէր, մոտոր էր, եռում ու պայթում էր ինքն իր մեջ: Իսկ նրա առաջի Չամբարը իրեն մենակ տվեց ոհնակի մեջ, պատառութեց ու պատառութվեց: Այս դրան շները դիմանում են չորս-հինգ տարի: Մինչև հիմա մի յոթ շուն է եղել, երբ Ադամինը երկրորդն է, սկեսրոջ դրանը մի Բասար էր ու մինչև հիմա մի Բասար է: Բարի, հանգիստ, ալարելով – շուն չի, էշ է:

Շունը ականջները ցցեց ու սպասեց՝ քարափի ոլորանում երևաց Սիմոնի կեսը: Սիրտ պատռելու չափ դանդաղ աչքառ ելավ լրիվ ու արահետի վրա օրորվեց իր գայթող քայլվածքով: Դանդաղ գալիս էր. տուն է, էլի, կիասնենք, էլի: «Պատերազմի հաշմանդամ Ուսկանը, երկու շիշ օղու գրազով, ուսին դրած Մանացից Վանքեր է հանել երկու փթանոց աղաքար – սրա քայլվածքին նայիր:

Նրա մոր ննան ձեռքը ճակատին՝ Ադունը ասաց նրա մոր պես հոգածու.

– Կա՞նաց արի, ոտքերդ կցավեն, կամաց արի...

Սիմոնը կամգ առավ: Մեծ գլուխն ուսին՝ քարափի ետևից դուրս եկավ, կանգնեց ու նստեց ներոն: Անձրևներից առաջ և խնելուց հե-

տո Արմենակը ծռմովում է ոտքի ցավից. պատճառն այս լավ հայրն է, որ երեխային երեք-չորս տարի պահեց ռետինե տրեխների մեջ: Ինքն ասում էր.- Եղ անտեր ռետինը եղ երեխային սպանում է,- Սիմոնը «մաշվել է»:

– Այտա, բան էիր ասո՞ւմ, – կանչեց Սիմոնը քարափի արահետից, կանգնած տեղից:

– Մի քիչ էլ հանգստացիր, հետո կասեմ, – ցածր ասաց Աղունը և գոռաց.- Շատ ես շուտ գալիս, արի մի քիչ էլ էստեղ պառկիր, հետոն էլ՝ տեսնենք:

Սիմոնը դարձյալ սպասեց:

– Երևա՞ն եմ գնում, շտապում եմ, ձի է պետք, ձին ձորում կապած է, պիտի բերվի,- բացատրեց Աղունը:

Սիմոնը հասկացավ և շուր եկավ ու իր գայթուն քայլվածքով գնաց արահետով ետ: Վայ էն ոտքին, որ չհասկացող գլխի ձեռք է ընկել. միանգամից չեր կարող ձոր իջնել, ձին բերել հետը – մեկը պետք է, որպեսզի թելաղրի:

– Եղ սառը գետնին մի նստիր, վեր կաց, Սերո...

Երեխան ծույլ-ծույլ օրորվեց, բայց երբ Աղունը ճաշը կրակին դրեց ու անցնում էր խոհանոցից մեջ սենյակ նա դեռ նստած էր:

– Եղ սառը գետնին մի նստիր ասացի:

– Սառը չի:

– Սառն է, սառը, վեր թռիր:

– Դու գեներալ ես, ամեն ինչ գիտես:

– Ոտքդ ցավում է՞, Սերո ջան:

– Չո ինչ գործն է:

– Դե որ իմ ինչ գործն է սատկիր:

Վայ թե սա էլ հոդացավ ունի, մեկ-մեկ նվում է. Ես ի՞նչ կրակ է, ես ի՞նչ աստծո անհաջողություն է ես տան գլխին: Ինչի՞ս է պետք թե թերթում գրել են անունս ու գովել են, թե կողքից ասում են կեցցես՝ երբ իմ մեջ ուժ չկա ուրախանալու:

– Ճիմա որ եկա հա՞... Վե՞ր կաց եղ գետնից: Էդպես:

«Քանի դեռ խանգարիչներս չեն եկել՝ ինձ հաշիվ տամ: Ես գնում եմ երևան: Ես՝ ես եմ, ես՝ բեռներս. սա՝ օժիտը՝ ամեն ինչ ամբողջական. երկու բարձ, երկու վերմակ, երկու ներքնակ. սավանների փողը պետք է առանձին դնել. սրանք՝ կարպետը և գորգը. այս՝ երկու կտոր (կայարանը լիբը ժողովուրդ – առջիկ ես՝ բեռներդ ական պահիր). խնձոր, ձու՝ չորս կտոր: Պանիր, կարագ՝

վեց կտոր: Դասուրման՝ յոթ, մեղրը՝ ութ. ձեռքիս մածուն-մուծունը՝ ինը: Երևան եմ գնում, ինը կտոր բեռ ունեմ: Պանիրն ու կարագը խուրջինի ակներում՝ դարձավ մեկ կտոր – ութ կտոր, մածուն-մուծունը պանրի վրա՝ յոթ կտոր, մեղրը կարագի հետ խուրջինի մի ակնում վեց կտոր, խնձորը մնում է առանձին, ձուն՝ առանձին: Վեց կտոր, վսյո՛: Եթե ինձ չշաղեն՝ վեց կտոր բեռ ունեմ: Յիմա գնացք-ներում գողությունները քչացել են, եզրաց Երևան եմ: Վսյո՛:

Ի՞նչ է պակաս: Պակաս է մեքենա և տոննա: Գողի Արտաշը քոչում էր Կիրովական՝ դղոդաց իինգ բեռնատար ավտո: Աղամն ասաց. «Մեր կոլխոզն էրքան ապրուստ է ունեցել՝ ես անտեղյա՞կ»: Մոլորան, թթուն, կարտոլը կուղարկեն ձմեռնամուտին: Ավելուկ: Ավելուկը՝ իիմա չմոռանամ: Ասում են Արզումանյանը Մոսկվա քաղաքում շատ է սիրում ավելուկ: Ավել-պակաս չկա՞: Իմ աղքատ մարմնի համեմատ՝ պակաս ոչինչ էլ չկա, իսկ ավելին՝ ավելի է ամենավերջին ձուն էլ, որովհետև հնարված է անհնար տեղից: Վսյո՛: Ինչ էի ավելացնելո՞ւ: Անկարևոր մի բան էի ավելացնելու, ի՞նչ էի ավելացնելու:

– Սերո ջա՞ն... Մի բան էր միտս, մոռացա, Սերո ջան:

– Ի՞նչ:

– Չեմ իիշում, զլիսիս խելք չի մնացել:

– Ճետդ տար՝ ասեն թե ինչ ես մոռացել:

Նա թևերը կանթեց, նայեց որդուն, նայեց, հանկարծ սկսեց անձայն ծիծաղել:

– Ի՞նչ է, չես տանում, հետն էլ ծիծաղում ե՞ս:

– Դուք էլ որ չլինեիք՝ ես ինչի՞ համար էի:

Խրախուսված երեխան ուզեց պնդեցնել տեղը.

– Չեմ խանգարի, ինձ համար կողքիցդ կգամ:

– Քաա՞ որ:

– Մի բան էլ ես կօգնեմ:

– Վայ թե չօգնես:

– Ես բեռներին կնայեմ, դու կգնաս ջուր խնելու:

– ճիշտ է:

– Էլի քեզ հետ ետ կգամ, Երևան չեմ մնա:

– Ասում եք ու չեք անում, եսի՞ն:

– Են անգամ բա չեկա՞:

– Ես էի լաց լինում:

– Բա՝ դեռ չինք հասել, ասացիր գնանք:

– Բա՝ մեր տան գործերը ո՞ւմ թողնեինք:

– Բա՛ չեկա՞ր տեսար խոզերը ական են, հավերը ական են, շունը սոված չի:

– Յա, դու ու քո հերը շանը լավ էիք յուղ կերցրել:

– Ես մեղավոր ե՞մ, Նազիկը երկու անգամ էր աղ գցել ճաշի մեջ:

– Պրոֆեսոր Սերո ջան, ի՞նչ է նշանակում... ի՞նչ է նշանակում ներծծվել:

– Որ ասեմ, հետդ կտանե՞ս Երևան:

– Որ ասե՞ կտանեմ:

– Օրինակ՝ ինչպե՞ս ներծծվել:

– Ե՛, քիչ ես կարողում, չես կարողում: Քո ախառերը քո տարիքին ասում էր Առագուստ Բեբել: Քո տարիքին, քո հորեղբայր Յակոբն էլ բանակից եկած՝ հետը գրազ բռնեց, որ Մաքսիմ Գորկին մահացել է հազար ինը հարյուր երեսունվեց թվին ու ճիշտ դուրս եկավ: Ես լամպը հանգց-նում էի, ինքը վառում էր, ես հանգցնում էի, ինքը վառում էր:

– Իա՞... ներծծվելը են է ներծծվելն է, ելի:

– Ինչպե՞ս է ներծծվելը:

– Ծըվել, ներծծվել, ծծան, ներսծծվել: Ծծիչ, ներս ծծիչ: Տանում ե՞ս: Մարգը ո՞նց է ջուրը ծծում:

– Պրոֆեսոր Սերոն:

– Սխալ է:

– Տիկին Սոֆին հապա ինչպե՞ս է հալվել, ներծծվել աշխարհին, աշխարհը մի քիչ սոփիացրել:

– Տիկին Սոֆին ի՞նչ է:

– Տիկին Սոֆին կին է:

– Եսի՞ն: Երևի սխալ է գրած:

– Ինչպե՞ս է սխալ գրած, պրոֆեսոր Սերո: «Երևի»:

– Թվաբանության խնդիրը ինչպե՞ս է սխալ լինում:

– Եղ՝ ախառող գրածն է:

– Բա դու ո՞նց ես կարդացել: Տառերը ճանաչում ե՞ս:

– «Երևի»: Ախառող բոլոր գրածներն իմ պատմածներն են, պրո-ֆեսոր Սերո: Ախառող ասում է ինչը որ իմ պատմածն է գովում են, ինչը որ ինքն է ավելացնում՝ չեն գովում: Տառերը չեն ճանաչում: Սեպ-տեմբեր, հոկտեմբեր, նոյեմբեր – դեկտեմբերից չքողեց դասի գնամ իմ դարպասեցի մերացուն «անինթյունակ ա»: Ինքն ինթյունակ էր, մինչև իհմա հշխանին իխշյան է ասում. իխշյան ճան...

Երեխան փորձեց մտքում, փորձեց կիսաձայն, բարձր – չեր

լինում:

– Ի՞նչ է, դժվար անուն է, էլի, – ինչ-որ մարտական, ինչ-որ բողոքող՝ հանկարծ հայտարարեց նա:

– Որովհետև, Սերո ջան, Ադամի ցեղից ես: «Գը... գը... գը...» – Գլխա՞րկ:– «Հա»:

– Դե արի արտասանենք, տեսնենք ով չի սխալվի:

– Սիրտ չունեմ:

– Որ իմանայիր...

– Ե՞ս զգիտեմ: Ես բանաստեղծ եմ: Ես մի գյուղի չափ խոսք ու տրամաբանություն ունեմ, ես Վանքերի ցեղից եմ:

– Դե որ բանաստեղծ ես՝ արի արտասանենք, տեսնենք ո՞վ շատ կարտասանի:

– Ուրիշների՞ գրածները, ես թութակ եմ: Ես թութակ չեմ, ընկեր Սերո:

– Վուեյ, – սրանցավարի հեգնեց Երեխան, – բա եդ մենք թութակ ե՞նք, որ դպրոցում բերանացի ենք անում:

– Թութակ եք, մի բան էլ պակաս եք:

– Բա որ... բա որ ես չեմ սովորում՝ ինչո՞ւ ես ծեծում:

– Որպեսզի մարդ դառնաս, գրիչ վերցնես – Եղան չվերցնես ձեռքդ:

– Ով որ Եղան է վերցնում՝ մարդ չի՞:

– Մարդ է, դու էլ Եղան կվերցնես, Սերո ջան, մի դեկավար էլ հետք, որպեսզի քեզ բգի՝ թե էս խոտը էստեղ դիր, էս դեզը լավ ծածկիր, որպեսզի մեջը ջուր չառնի, եզներին շուտ խոտ տուր, որպեսզի կովերին չուշացնես, որպեսզի թրիքը ժամանակին դուրս թափես:– Նա, ծնոտն ափի մեջ, դարանած սպասեց: Երեխան մտածում էր, պատկերացնելով տեսնում էր ու հանկարծ բողոքեց.

– Թրիքը ես դուրս չեմ թափում:

– Կրափե՞ս:

– Չեմ թափի:

– Խելոք ես՝ կրափես: Աշխօր կգրեն, կգովեն, մի կիլո կարտոլ կտան, կրերես հորդ կտաս, հերդ կուրախանա... Կուտեք ու կպարեք: Յը՞:

Ուսերը նեղ, գլուխը մեծ ու վիզը բարակ՝ Երեխան տնկվեց նրա նեմ, դողաց, դողաց ու ծղրտաց միանգամից, հաչելու պես.

– Չեմ թափի: Քեզ ասացին չեմ թափի: Քեզ ասացին ինձ հետո տար Երևան:

Անձայն ծիծաղելով, նա Երեխային քաշեց գոգը և նրա մեջ գլուխը գոգում շոյելով թե կշռելով ասաց.

– Չես թափի, իսկ ի՞նչ կանես:

Երեխան անձարպիկ դուրս պրծավ նրա գրկից, կանգնեց նրա դեմ և ասաց աչքերը չոր ու փայլուն.

– Ինձ պետք չի քո սուտ սերը, ինձ տար Երևան:

– Գնացեք, ճամփան բաց է, ինձ էլ թողեք ես քարի տակին մենակ:

– Քո ճամփան էլ է բաց, դու էլ գնա:

– Երևան քաղաքում էլ անգրագետ չկա, ինձ են սպասում:

– Ինչո՞ւ ես մենակ մնում, բոլորն էլ էստեղ են. էլի:

– Ապրես: Բոլորի լավություններին էդպես կպատասխանես:

– Ի՞նչ ես ասում, չեմ հասկանում:

– Ինչը ձեզ ձեռնտու չի՝ մի հասկացեք:

– Ի՞նչ ես ասում, է, չեմ հասկանում:

– Լավ, թրիք թափելուց հրաժարվեցիր՝ հասկացանք, գնացիր Երևան՝ շատ բարի, Երևան ի՞նչ ես ամելու: Մի մտածված պատասխան տուր՝ քո մերը թող ուրախանա: Քո մերը դատարկ խոսքից ուրախացող է:

– Դպրոց եմ գնալու:

– Ձեզ ո՞վ է պահելու էնտեղ:

– Արմենի տանը:

– Են հարսը թեկոցդ կրօնի ու դուրս կշպրտի:

– Վուեյ:

– Այո: Թիշ առաջ մեռնում էի, մի օր էլ կարող է չխնայի՝ էլ վեր չկենամ: Ի՞նչ ես ամելու: Յարսն էլ դուրս է շպրտել: Անելի՞քդ:

– Մեծանամ՝ կասեմ:

– Իմ մերը չսպասեց իմ մեծանալուն, Երեք ամսական էի՝ հանգավ, իմ մերացու դարպասեցին ինձ դարձրեց ջրկիր, տուն ավլող, տորք ծեծել էլ չի կարող, անինթյունակ էի – ի՞ն-չես դա՛ռ-նա՛-լո՛ւ:

Երեխան լաց էր լինում: Քոր էր գալիս և ուռչում էր իր կոկորդն էլ: Եվ բռնությամբ ժպտալով, նա ասաց Երեխային.

– Քո հորեղբայր Աղամը պսակվելու տղա էր՝ իմացած ոտանավորը չէր կարողանում արտասանել՝ լաց էր լինում, ասում էր ծանր է, է՛... Յիմա քեզ համար էլ է ծանր, Սերո ջան, սրանց ցեղն ես:

Երեխան ասաց մտածկոտ, կասկածելով ու չկասկածելով, որպես վերջին հույս.

– Բա հայրի՞կը:

– Յայրիկդ հետդ կապրի հարյուր յոթանասուն տարի: Յայրիկդ ասում էր Արմենին ուղարկենք կոլխոզ, լավ աշխօր կա ոչխարում: Քեզ էլ կուղարկի թրիք թափելու: Ամեն մարդ էն է դառնում, ինչ որ ուզում է: ճանապարհները շատ են, կամք՝ մեկ: Ամեն մարդ գնում է իր ընտրած ճանապարհով – դու ի՞նչ ես դառնալու:

- Յիմա՝ չգիտեմ: Յիմա, ես րոպեիս՝ չգիտեմ:
- Քո տարիքին Արմենը պիես էր գրել, – համկարծ գոռաց նա:– Ասում էր դառնալու եմ դրամատուրգ: Դարձա՞վ – դարձավ:
- Արտասանիր – արտասանեմ:
- Յա-ա՞: Արտասանիր – արտասանեմ:
- Մի հատ ես – մի հատ դու, մի հատ ես – մի հատ դու:
- Շատ բարի: Կիհշեցնես, ավելուկ եմ վերցնելու: Ես քեզ լսում եմ, ընկեր Սերո:
- Մի ասա ընկեր Սերո:
- Չեմ ասի, շատ բարի:
- Յովհաննես Թումանյան. Զարի վերջը. որ շփոթվեմ՝ չխանգարես, ես էլի տեղը կգցեմ:
- Զարի վերջը Յովհաննես Թումանյանն է գրել թե Ղազարոս Աղայանը:
- Մի խանգարիր, Յովհաննես Թումանյանը: Յովհաննես Թումանյան. Զարի վերջը.

Լինում է մի սար,  
Են սարում մի ծառ,  
Են ծառում փըչակ,  
Փըչակում մի բուն,  
Բընում երեք ծագ,  
Ու վըրեն Կկուն:

– Կո՛ւկու, կուկու, իմ կուկուներ,  
Ե՞րբ պիտի դուք առնեք թևեր,  
Թըռչե՞ք, գընա՞ք, ուրախանա՞ք...  
Երգում էր մարիկ Կըկուն,  
Մին էլ, ըհը՛, Աղվեսն եկավ.

– Ես սարն իմն է,  
Ես ծառն իմն է,  
Ծառում փըչակ կա,  
Փըչակում մի բուն,  
Բընում երեք ծագ,  
Ու վըրեն Կըկուն:

– Կուկու, կուկու, իմ կուկուներ,  
Ե՞րբ պիտի դուք առնեք թևեր,  
Թըռչե՞ք, գընա՞ք, ուրախանա՞ք...  
Երգում էր մարիկ Կըկուն,  
Մին էլ ըիզ, Աղվեսն եկավ...

Ես ինչո՞ւ չի առաջ գնում... Դո՛ւ խանգարեցիր...

Նա դարձյալ անձայն ծիծաղում էր, երեխան թշնամանքով բողոքեց.

- Ի՞նչ է, դու ինձանից լավ ես արտասանո՞ւմ:
- Ես չեմ արտասանում, իմ գործը լափ եփելն է՝ եփում եմ, – ասաց նա:
- Բա ինչո՞ւ ես ծիծաղում:
- Ծիծաղո՞ւմ եմ: Այո, ծիծաղում եմ:

Ավարտական վերջին քննությունից, Յովիտից, աղջիկը փախավ կիրովականցի դասատուի հետ. իրենք թեկուց մի թերև բարկացան, բայց դա լավ էր եղել ավելի, քան բոլոր խնամախոսներով ու նշան-դրեքներով ամուսնությունները. տղան Կիրովական տուն ուներ, ճարպիկ էր՝ կարողացավ կնօշը տեղավորել դպրոցում ջոկատավար և մանկավարժական հեռակա խնատիտուտ, միայն թե գնալ-գալ չունեն. արհեստական հավ էր, ձու ածավ, էլ հետը գործ չունի. դե եղան էլ պիտի լիներ, ո՞ր աղջիկն է ծնողինը, միայն թող վատ չապ-րեն՝ գլխացավանքը պակաս լինի: Սպասում էին Արմենակին՝ նա-մակը Սիբիրից եկավ: Տանը սարսափելի լռություն էր: Թերթերն իրար ետևից բերում էին Արմենի անունն ու ակնարկները, թերթերն աշնանը գովեցին Արմենին – Արմենը էլ իրենցը չէր: Արմենին տեսել էին Երևան– Թբիլիսի գնացքի ռեստորանում, իսկ այստեղ տանը լռություն էր: Դրած թքուն իզուր էր, եփած ճաշը անտեղի էր, ամբողջ խնձորը կերան Աղամի թոռները, իսկ մեղրը այդպես էլ սառավ, տա-քացավ, սառավ, մինչև որ Սիմոնը կարագի հետ Կիրովական ծախեց թե տվեց խնամիներին:– Բերելու եմ, Սիմոն:– Խանութից շաքար ու օճառ էր առնում, Վարդանենց Արտոն ասաց. – Մեկն էստեղ ձմերուկի կորիզ է կուլ տվել, – և նայեց չքերին, խաղալիքներին, Աղունին, չքերին: Ու խանութի ամբողջ ժողովուրդը ծիծաղեց, լավ ծիծաղեց. – բայց բերելու եմ, Սիմոն, ունենալու եմ:– Բեր, – մի տեսակ կովելով՝ ասաց Սիմոնը, – ունեցիր:

- Ծիծաղում եմ, որովհետև ես իմ շան լափը եփում եմ, դու բա-նաստեղծությունը չես սովորում:

- Բա քո շան լափին կաց, ինչո՞ւ ես ինձ վրա ծիծաղում:
- Յա-ա՞:
- Դե որ եղան լավ գիտես, արտասանիր, էլի:
- Ես անգրագետ կին եմ:
- Որ անգրագետ ես՝ մի ծիծաղիր:
- Տո ես ծեր գլուխը հողեմ, եդ ո՞վ է անգրագետ:– Քունքի մազը նա աղօկավարի ականջի ետև անցըրեց:– Յովիաննես Թումանյան.

Թմնկաբերդի առումը:

- Պա՞հ, պահ, պահ:

- Յա-ա՞:

Յեյ՝, պարուններ, ականջ արեք  
Թափառական աշուղին...

- Մենք էդ չենք անցել:

- Ես էլ չեմ անցել:

Սիրուն տիկնայք, ջահե՛լ տղերք.  
Լավ ուշ դրեք իմ խաղին...

- Բա երրորդ դասարանում էդ անցնում է՞ն:

- Ես զյու դասարանցի եմ:

Մենք ամենքս հյուր ենք կյանքում  
Մեր ծննդյան փուչ օրից,  
Յերթով գալիս անց ենք կենում  
Ես անցավոր աշխարհից:  
Անց են կենում սեր ու խնդում,  
Գեղեցկություն, գանձ ու գահ,  
Մահը մերն է, մենք մահինք,  
Մարդու գործն է միշտ անմահ:

- Գահն ի՞նչ է:

- Թագն է, թագավորությունն է, հարստությունն է, գեղեցկությունն

է:

Նադիր շահը զորք հավաքեց,  
Զորք հավաքեց անհամար,  
Եկավ թմնկա բերդը պատեց  
Ինչպես գիշերն են խավար:  
– Յեյ՝, քաջ թարուլ, – կանչեց շահը, –  
Անմա՞հ էիր քեզ կարծում,  
Եկ, բերել եմ ես քո մահը,  
Ի՞նչ ես թառել ամրոցում:

– Մի՛ պարծենա, գոռող Նադիր,-  
Պատասխանեց էն հսկան,-  
Գլխովը շատ ամպեր կանցնեն,  
Սարը միշտ կա անսասան:  
Ասավ, կանչեց յուր քաջերին,  
Թուրը կապեց հավլունի,  
Թռավ հեծավ նժոյգ իր ձին  
Դաշտը իջավ արյունի:  
Իրան, Թուրան ողջ եկել են  
Թաթուլն անհաղթ, աննկուն,  
Զորք ու բարան խորտակվել են՝  
Նրա բերդը – միշտ կանգուն:

Զորավար հերդ ժամանեց: Միասին կապրե՞ք հարյուր տարի:

– Հետո ի՞նչ եղավ:

– Երկար է, ժամանակ չունեմ: Ավելուկը չմոռանամ:

«Եսպես անցան շատ տարիներ,  
Տխուր աղջկն արքայի  
Նայե՞ց, նայե՞ց սարերն ի վեր,  
ճանփաներին ամայի,  
Դույսը հատավ... ու լաց եղավ.  
Ենքա՞ն արավ լաց ու կոծ,  
Որ լիճ կտրեց արտասուքը,  
Ծածկեց քաղաքն ու ամրոց.  
Ծածկե՞ց, կորա՞ն, ինքն էլ հետը...  
Այժմ ենտեղ տրտնաշուք  
Խոր Փարվանա լիճն է...»:

Զեղուն բարձրանալիս, սանդուղքների վրայից նա նայեց՝ տան-ձենու մոտ Սիմոնը գալիս էր ձին քաշելով դանդաղ ու Մուրադենց տղերի պես ծնկները ծալվելով: Բայց սիրտ չկար բարկանալու: Աշխարհը տխո՞ւր, տխուր էր: Ոստակալած տանձենին էլ, նրա միակ կանաչ պատվաստն էլ, մի տեսակ փոքրացած Սիմոնն էլ, աղոտ փայլվիլող ձին էլ, ժայռն էլ՝ որ պիտի փլվի ու չի փլվում ու չի փլվում, ամեն ինչը տխո՞ւր, տխուր էր:

– Ծուղրուղու-դուռուուու...

Երեխա էինք, աղջկ էինք, հարս էինք, դեռ երեկ էր՝ կարոտում ու սպասում էինք ինչի՞: Մի լավ բանի սպասումից սիրտներս թպրտում էր ինչո՞ւ: Աքաղաղը կանչում էր լուսամուտի տակ՝ ասում էինք իյուր է գալու: Սիրտներս հոգմե՞ց թպրտալուց, էլ չի խփում: Օֆ, իյուր էր գալու, իյուր էր գալու, իյուր էր գալու, սիրտներս պատռեց լավի կա-

րոտից, իյուրը եկավ՝ ղազախեցի չարչին իշով, նռնով ու ոջիլը շալակին: Օֆ, պատերազմ էր՝ մած էինք բռնում ու լաց էինք լինում, կալ էինք կալսում, պարկ էինք քարշ տալիս, հունձ էինք անում, եզ էինք պայտում, երգում էինք ու լաց էինք լինում, կարոտում էինք ու սպասում էինք ինչի<sup>9</sup>: Թպրտաց, թպրտաց ու հաճավ մորթած հավի պես: Օֆ, երանի կանաչ գերեզմանոցում ննջողներին:

– Մնաք բարով դուք, արոտներ սիրուն,  
Ամառն անց կացավ, հոտն իջնում է տուն...

ԻԵՍՈՒ<sup>10</sup>: Շարունակությունը մոռացել եմ: ՅԵՍՈՒ<sup>11</sup>:

Մնաք բարով դուք, արոտներ սիրուն,  
Ամառն անց կացավ, հոտն իջնում է տուն...

Սրանց գերազանց են ստացել, բայց շարունակությունը չեմ իիշում, ինչի<sup>12</sup> է:

Նա չարձագանքեց երեխային: Ավելուկը ձեռքին սանդուղքի վրա նստած նա ասաց գլուխն օրորելով.

– Չեմ գնում, չեմ:

Եվ դարձյալ տխուր էր աշխարհում ամեն, ամեն ինչ: Ախ, երանի նրան, ով մի անդարձ մեծ կորուստ ունի, կարոտում է ու անհնար է կանչել, կանչվել, զգվել ու զգվեցնել: Երանի գերեզմանաքարերին:

Մնաք բարով դուք, արոտներ սիրուն,  
Ամառն անց կացավ, հոտն իջնում է տուն:  
Մենք ձեզ մոտ կգանք նորեկ գարունքին,  
Երբ զարթնեն ուրախ երգերը կրկին,  
Երբ որ սարերը զուգվեն կանաչով,  
Երբ որ ջոերը վագեն կարկաչով:  
Մնաք բարով դուք, արոտներ սիրուն,  
Ամառն անց կացավ, հոտն իջնում է տուն:

Մի երգիշ տղա ուզեցինք՝ էր էլ չեղավ: Մեծ բան էինք ուզել – մի ձեն էինք ուզել:

– Այ հեր, բա... ներծծվելը ներս ծծվելը չի<sup>13</sup>:

– Ինչը չի ներսծծվելը:

– Ներծծվելը:

Սիմոնը նստեց կոճղին ու ոտքով սապոգը հանեց:

– ՅԵՍՈՒ<sup>14</sup>:

Սիմոնը գլխով հարցրեց, թե երեխան ինչ է ուզում:

– Ներծծվելը ներսծծվելը չի<sup>15</sup>:

- Երևի:
  - Սիմո՞ն: «Ամառն անց կացավ, հոտն իջնում է տուն... Ամառն անց կացավ, հոտն իջնում է տուն»:
  - Ի՞նչ է, ախչի:
  - Սիմոն, բանաստեղծներն ինչո՞ւ են շուտ մեռնում:
  - Շուտ են մեռնո՞ւմ:
  - Շուտ են մեռնում, ասում են սրտի լարը կտրվում է:
  - Դե մինչև մեռնելը ապրում են՝ իրենց բավական է, էլի:
  - Ասացիր, էլի:
  - Դե ի՞նչ էի ասելու, լավ են անում՝ որ մեռնում են:
  - Սրախոս-սրախոս՝ եկավ:
  - Ի՞նչ ես ուզում ինձանից, ախչի:
  - Ինչո՞ւ ուշացար:
  - Ոտքով եկա:
  - Ենտեղից եստեղ:
- Սիմոնը նայեց ու լրեց:
- Այ քեզ տեղն է, այ քեզ տեղն է... Որ գնում էիր՝ քեզ ասացի՞ն ձիով գնա: Ավտո էր տեսել, շոֆերի կողքը դուրս էր եկել:
- Սիմոնը հանեց մյուս սապոգն էլ, ոտքերը դրեց սապոգների ճտքերին ու թաթերը շարժեց:
- Բա դու ճամփորդ ունեիր, քեզ չասացի՞ր ուշանում եմ: Յիշում ե՞ս մորաքրոջս թաղումը, հիշում ե՞ս, որ քո պատճառով ուշացա ու չգնացի:
  - Ես կարծում էի գալիս էլ ավտո կպատահի:
  - Կարծում էիր:
  - Գնալիս ավտո կար, ես կարծում էի գալիս էլ կլիներ, իսկ դու գիտեի՞ր որ չի լինելու: Եթե գիտեիր՝ ասեիր:
  - Ես քեզ ասացի ձիով գնա:
  - Չին՝ ես հասկանում եմ, իսկ որ ավտո չէր լինելու, դու էլ գիտեիր՝ ասեիր:
  - Յա, տունդ էլ մի կարգին տեղ սարքած լինեիր... Ես քարի տակին ես պիտի իմանայի, որ Յովիտից եստեղ ավտո չի գալու:
  - Իսկ ե՞ս որտեղից իմանայի:
  - Խելքից:
  - Չկա, չունեմ:
  - Դրա համար էլ էր վիճակին ես:
  - Էլի սկսեցի՞ք, այտա, – ծղրտաց երեխան:

– Դու Երեխա ես՝ քո Երեխայությանը կաց:

Փոքր եղբոր դռնից պառավզ թոնթորում էր մեր անհասկանալի, մեր լսելի. «Են տղի Երեսը կերավ... Կրակն է ընկել... Են տղին սպանեց բողեց: Արմատահան լինի դրա լեզուն: Վերջ չկա, պատիվ չկա, ամոք չկա: Այ տակռապոկ լինի քո լեզուն, տակռապոկ: Այ ախչի...»:

– Դու քո թևերն էդտեղից մի՛ կրակիր... Սրախոս եք, կաք, չվերցացաք:

– Ես Երևան եմ գնում, ինձ տանում ես Երևան:

– Ա՞ռ, – անդաստիարակ տղամարդու պես բութը մատների արանքը անցըրեց Աղունը, և դա այն էր, ինչը շարժում էր Սիմոնի գլխի որդերը: Սիմոնը շպրտեց սապոգը, կացինը այգի շպրտեց, թքեց ու մտավ տուն:

Նա մի պահ շփոթվեց, մի պահ կարծես թե զգաց, որ վատ բան է արել, հետո իրեն արգելեց փափուկ ու նահանջող լինել. – Են եք, – ասաց դեախ թափով վլա եկած դուռը, – քանդեցեք, սարքել եք՝ իիմա էլ քանդեցեք: – Գործ՝ կար. ավելուկը պետք էր տեղավորել. կարելի էր նաև ձին բարձել ինքնուրույն. թող ներսն ամաչի: Պիտի հանել վանդականախչ մեծ շալը: Զեռքի փողը: Երկու հատ հնգանոց, մի հատ Երեքանոց, մի հատ մեկանոց:

– Սերո, – մտասույզ հարցրեց նա, – Երկու հատ հնգանոց, մի հատ Երեքանոց, մի հատ մեկանոցը ինչքա՞ն կանի:

Սերոն չկար: Սերոն գոմի սրահում լաց էր լինում: Երբ մոտեցավ՝ նա գրկեց սյունը, իսկ երբ ուզեց զոռով քաշել՝ Սերոն պարկեց գետնին ու ոտքերով ծեծեց գետինը:

– Յորմերդ էղպես պաշտպանեցեք գազաններից, – և նա արտասուրքով ու կատաղությամբ լիքը՝ եկավ իր բերներին. մեկանոցը՝ շոֆերի համար, գնացքի տոմսն արժե Երեք ռութի յոթանասունիինգ կոպեկ, Երեքանոցը քիչ է տոմսի համար, հնգանոցը՝ շատ. պետք է սկզբից ամեն ինչ դասավորած ունենալ. հնգանոցները՝ անձեռնմխելի. շոֆերը հիսուն կոպեկ ետ է տալու, քանզի ավտոն արժե հիսուն կոպեկ. շոֆերի տված հիսուն կոպեկը Երեքանոցի հետ՝ անում է գնացքի տոմս: Վայ թե սխալ է: – Սերո... – Յին փողով գնացքի տոմսն արժեր Երեսունյոթ ռութի հիսուն կոպեկ: Յին տասանոցը հիմա մեկ ռութին է, գնացքի տոմսն ուրեմն ի՞նչ արժեցավ: Իմ հայր Իշխանն ու իմ մերացու դարպասեցին և կրվում էին և հաց ուտում – սրանց ցեղը նուրբ է, ոչ կարողանում է հաց ուտել, ոչ էլ

կռվել:— Մերո... Այ, կգնամ Երևան, էլ չեմ գա:

- Չգա՞ս:
- Չեմ գա, կապրեմ Արմենի մոտ:
- Ասացի՝ չգաս:
- Հա, Արմենակն էլ էր ասում, իսկ հիմա որ բեռ-բեռ տանում եմ՝ էդ կարելի է, էդ լավ է: Դե լավ, հիմա խռովելու ժամանակ չի, վեր կաց:
- Չեմ վեր կենում:
- Մի կտոր գաթա տամ՝ խռովածությունդ կանցնի<sup>։</sup>:
- Քեզ լինի քո գաթան:
- Վեր կա՞ց...

Շունը հաշեց, նրանց շունն էլ էնտեղից մի երկու բերան ալարելով, պառավն սկսեց թոնքորալ: Աղունը նայեց դեպի նրանց տուն, հետո իրեն ասաց, որ ինքը հերոս է, որովհետև չի պատասխանում պառավին: Ինքը տուն ունի, գործ ունի, գործի է գնալու:

— Այդպես,— փաղաքշանքով ասաց Աղունը և երեխայի շորերը թափ տվեց,— հեղափոխվել է քո տատ Արուսը, համկարծակի հեղաշրջվել է. Արմենի դեմքը ջնջխվել էր, ինքը գոմի դռանը՝ խլացել էր, հիմա խուլ՝ քեզ ասում եմ էդ կեղտի միջից վեր կաց՝ լսում է, ականջները սրվել են: Գնացքի տոնսը եթե եղած լինի երեսունյոթ ռուբի հիսուն կոռպեկ, հիմա հ՞նչ կարժենա: Թվաբանությունից ախպերդ էլ էր թույլ: Յորդ ասա, եկեք հաց կերեք:

Սիմոնը մի օր սկսեց նրա եփած ճաշերը չհավանել: Սա կարտուլով ճաշ է՝ աղի ես արել. սա ձու է՝ պինդ ես խաշել. սա փլավ է՝ աղի ես արել. սա խոզի գլուխ է՝ լավ չես խանձել. սա ծվածեղ է՝ մեղր բեր, մեղրով ուտեմ, սա ցանաք կարտոլ է՝ կլպում են, աղով են եփում: Ո՞վ: Սա մածուն է՝ կաթի վրա արաժան են լցնում, էդպես են մերում: Ո՞վ, է, ո՞վ: Բաժակն ափսեռվ մատուցիր: ճաշի ափսեի տակ փոքրիկ սփռոց փորիր: Յացը դանակով կտրտիր, տանձից-խնձորից չկա<sup>։</sup> Միսը աղում են, կոտլետ են անում: Ո՞վ, է, ո՞վ: Էլ ո՞վ — լիրը Սոնան: Աղունը մայիսին սարն է գնացել, կովում է գայլի ու անձրևի հետ — հունիսին զավթել է Սիմոնին: Յունիսը, հուլիսը, օգոստոսը, սեպտեմբերը: Մեղրամառ են արել: Զուն պինդ ես խաշել, փլավն աղի ես արել, մածունի վրա արաժան չես լցրել — տո ես ծեր գլուխը հողեմ, էդ ծեր մեղրը, էդ ծեր ձուն, էդ էլ ծեր գյուղխորհուրդը ու գյուղով մեկ ծեզ խայտառակելը — գնացեք ծվածեղ կերեք:

«Քո բռնած գործե՞րը: Արի կեր, միսը աղացել եմ, կոտլետ եմ արել քեզ համար, սառչում է»:

Երեկ իրիկում էլ ճաշ չէր դրել, բեռները կապում էին: Մի րոպե մտածելով, նա փոնում փշրված գաթայի կեսը դրեց Սիմոնի ճաշի մոտ, կեսը՝ Սերոյի: Եվ որովհետև հիմա նրանց համար լավ բան էր արել և որովհետև գնացողն ինքն էր, ուշացողն ինքն էր, գործի իրավասում ինքն էր՝ մեծ սենյակում չխնդրեց նրանց, այլ հրամայեց.

- Ուտում եք՝ կերեք, չեք ուտում՝ ճանապարհ դրեք, շուտ:
- Իմ արկը, մեղք եմ, Աղունիկ, իմ արկը:
- Ես մեղք չեմ, կեղսոտ գուլպաներով գոմի դռնից եկեք, ձեզ տվեք գորգին: Մաքրողը կմաքրի:

Սիմոնը նայեց գորգին, ոտքերին – Աղունը դարձյալ ճիշտ էր. և շատ սրտնեղեց, քանի որ մեծ իրավացին ինքն էր, բայց փաստական ճիշտը՝ Աղունը: Ու միշտ այդպես է եղել, միշտ, միշտ:

- Ես՝ ներողություն, – ասաց, – Ես՝ ներողություն:
- Սերո:
- Ես գալիս եմ Երևան:
- Ոչ մի Երևան: ճաշիդ, շուտ: Բոթի, բրթած կեր:
- Չեմ բրթում:

Նա վերցրեց հացը և ինքը բրթեց:– Կեր: Գաթան՝ վերջում: Ինչքա՞ն հանեցիր, ինչքա՞ն մնաց, ամուսնյակ ջան: Գաթան, ասացին, վերջո՞ւմ:

- Փող չկար, եղածը վերցրի:
- ճաշը չեմ ուտում:
- Ինչքա՞ն:
- Յոթ հարյուր:
- Ինչքա՞ն յոթ հարյուր, յոթ հազա՞ր:
- Յոթ հազար:
- Ինչքա՞ն էի տանելու:
- Ասում էիր տասը:
- Փո՞ղ չկար:
- Ինչքան կար՝ վերցրի:
- Ամբողջ Հովտի բանկում փող չկար:
- Ամբողջ Հովտի բանկը էդ ի՞նչ է:
- Էդ էն է, որ ծաղկած ծառին էլ գնաս՝ քեզ համար կչորանա:
- Գղալը ձեռքին՝ Սիմոնը մի րոպե պաղեց, հետո երեխային ասաց.
- ճաշդ կեր, Սերո:
- Երեխան սկսեց ուտել, բայց Սիմոնը չէր կարողանում, չէր լինում,
- չէր ուտվում, չէր ուտվում: Կուրօքը նեղանում էր ու կոկորդը փակ-

վում: Արմենակը Սերոյի հասակին էր՝ հարցը մի անգամ շատ թունդ դրվեց: Խոտ էր հնձում, Արմենակը ջուր էր բերում, խոտ էր հավաքում, և ասվեց, որովհետև չէր պահպում. դու համարյա թե մեծ ես, Արմեն, ասաց ինքը, իմ տեղուն էլ շատ է նեղ, ուզում եմ մորդ դուրս անեմ: Արմենն ասաց հա: Յետո ասաց չէ: Յետո զնաց ջրի, եկավ ասաց հա: Յետո ասաց՝ սա մեղք է, ի՞նչ կանի ինքը առանց մեզ: Տուն հասան ուշ երեկոյին, գիշերվա կեսին, ու քարսի բան էր՝ նա ճուտով սուապ էր եփել, լորի էր տապակել, մեղր ու թեյ էր դոել սեղանին և քարի՝ սպասում էր նրանց: Եվ այնքան կին էր, այնքան մայր էր: Նա նրանց.— Շուտո,— քշեց տաշտակ ու երկուսին լողացրեց մի տաշտակի մեջ: Ու քշելով անկողին.— Քըշ, քըշ, քըշ,— նա նրանց լավ ծածկեց, լամպը իշեցրեց, ու դուրսը լվացք էր անում: Սիմոնը Արմենին մյուս օրն էլ գործի տարավ, թեկուզ դժվար էր արթնանում,— որովհետև տանը նրանք մենակ կմնային ու կխոսեին երեկվա զրուցից:

— Բամկում ինչքան որ կար՝ վերցրել եմ,— ասաց Սիմոնը,— թող հաց ուտեմ:

— Կեր,— ասաց նա,— հավ էլ եմ տալու: Ինչքան էի տանելու, ինչքան է պակաս:

— Երեք հարյուր:

— Ինչքան երեք հարյուր, երեք հազա՞ր:

— Երեք հազար:

— Ներողություն,— ասաց նա,— չես կարո՞ղ պարտքդ Սաքոյից առնես:

— Սաքոն սարում է, նրա տալիքն էլ վաթսուն ռուբլի է:

— Վեց հարյո՞ւր:

— Վեց հարյուր:

— «Վեց ու յոթ»,— հաշվեց նա:— Ամեն կճիկ իր տան գործերը գիտի.

Սաքոն սարում է՝ Լուսիկը տանը կլինի: Եթե լրիվ չի ունենա, թող երեք հարյուրը տա, երեք հարյուրն էլ հետո կտա — ես գործ ունեմ գնամ իմ գործին:

— Եթե երեք հարյուր տա՝ կլինի յոթ հարյուր երեսուն ռուբլի:

— «Յոթ, երեք»,— հաշվեց նա:— Ի՞նչ անենք, որ անգրագետ եմ, ինչո՞ւ ես խաբում:

— Ի՞նչ եմ խաբում:

— Յոթ, երեք՝ տասը:

— Սաքոն տալիք է վաթսուն ռուբլի, վաթսունի կեսը երեսունն է,

բանկից հանել եմ յոթ հարյուր, երեսուն էլ՝ յոթ հարյուր երեսուն:

– Սերո, թուղթ ու մատիտ բերեմ՝ հա:

Գդալը ձեռքին՝ Սիմոնը սառավ:

– Յիմա հավ եմ տալու, – ասաց նա, – թվաբանությունից իիմար եմ:

– Յին ու նոր փողերը խառնում ես, – ասաց Սիմոնը:

– Ինչ որ է, հազիվ առիթ է, պարտք ուզիր:

– Յիմա չունի, ոչխարը ծախի՝ կտա:

– Սեր ոչխարը խուզելու մնաց:

– Եսօր կխուզեմ:

– Բա որ, – ասաց Աղունը, – նա Կիրովական ոչխար ծախի, Կիրովական քաղաքից փո՞ղ ետ կրերի՝ որ քո պարտքը տա: Դու ետ կրեռեի՞՛ո:

– Ինչու չի՞ բերի:

– Կտա, Սիմոն, խելք կառնի, չիթ կառնի, կոշիկ կառնի:

– Այո, – ասաց Սիմոնը:

– Բա ի՞նչ ենք անելու:

– Քաց ենք ուտելու, – ասաց Սիմոնը:

– Քացը չի փախչի: Պարտքը:

– Յիմա չունեն:

– Օ՛ֆ-օֆ, ծաղկած ծառին գնաս՝ կչորանա:

Երեխան գլուխը բարձրացրեց՝ գդալը ձեռքին հայրը սառել էր. իիմա հոր ափսեն ետ էր հրվելու, դուռը շրխկալու էր, մայրը ասելու էր «Էդ եք»: Կտրուկ շուր գալով դեպի մայրը, գույզ ձեռքով ափսեն շպրտելու բռնած՝ երեխան ծնոտով ցույց տվեց դուռը: – Ծո՛ւտ:

– Էլ չեմ խոսի, լավ, – խելոքացավ նա: – Ձեր արդար հորը պաշտպանեցեք: – Եվ ձեռքերը կրծքին ծալած, նա կուչ եկավ, դարձավ մի բուռ, հնազանդ, ճնշված, խեղճ, խելոք, լսող, անեզու և ծորտ: Գարա է թխել. հավ է փետել-եփել, լիտոր լիտրին գցելով ոչխարի պանիր է արել, խանությոց մի կերա - մի կերա պոկել է տվել առաջին տեսակի այսուր, որպեսզի սրանց ցորենը հաց դառնա – ո՞վ է հարցնում թե, Աղուն, ի՞նչ ես ուտում: Վեց հարյուր, երեք հարյուր, չորս հարյուր, տասը, քսան, քսանիհնգ՝ ինքը առնել է տվել նրա պարտքերը – ո՞վ է ասել ապրես: «Մարդիդ երեսը ուտում ես»: Եկեք դուք լիզեք, մի կերեք: Որբ, անօգնական, անընդունակ, առանց սովորեցնողի, խոզի հետ, կովի, լվացքի, ջրի, ճաշի, շան լափի հետ՝ ինքը գործել է չորս գորգ – «գիծը ծուռ ես գնացել»: Նա լաց եղավ և

որպեսզի իր արտասուբով, – սրանք զգայուն են, – չփչացնի սրանց ախորժակը, վեր կացավ ու, մի բուռ դարձած, գնաց դեպի դուռը: Բայց որպեսզի սրանք՝ աշխատավորները, կարգին վայելեն, նա պահարանից սեղանին դրեց հավը: Եվ դուրս գնաց հնազանդ-հնազանդ, տան ծառայողի պես՝ որ լիքը սեղան է գցում և դատարկ սեղան է հավաքում:

- Զո՞ն մայրն է, – ասաց Սիմոնը, – արեցիր, մյուս անգամ չանես:
- Զո՞ն էլ կինն է, մի ժամ առանց կռվի ապրեցեք:
- ճիշտը ինքն է:
- ճիշտը ինքն է, ճիշտը ինքն է՝ ամեն ժամ կրիվ:
- Կեր: Ինչ որ ասում է լսիր, ճիշտը ինքն է:
- Ղե՞ դու էլ ծիով գնայիր Յովիտ:
- Կարծեցի ավտո կայտահի, ավելի շուտ կգամ:
- Ոտք չեմ ուտում:
- Կուտե՞՞ս փափկանիս:
- Աստամներիս արանքում մնում է:
- Դու էլ մի ծամիր:
- Յը-հը-հը-հը... Ո՞Վ է թութ կերել, հետո էլ վարունգ կերել, հետո էլ ուրել:

- Վրացոնց Ավագը:
- Ոիտայի պա՞պը:
- Այո... Ոիտայի:
- Ինչքա՞ն էր կերել:
- Մի փութ՝ մի փթանոց դույլ:
- Հետո ի՞նչ էր եղել:
- ճաշի վրա չի կարելի ասել:
- Ինձ ուղարկիր քաղաք, – պահանջեց տղան:
- Յունվարի արձակուրդին միասին կգնանք:
- Չէ, միշտ:
- Յոթերորդը վերջացնես՝ կգնաս:
- Յոթերորդը վերջացնեմ՝ կգնամ: Ես հիմա եմ ասում:
- Բա մենք էստեղ ի՞նչ անենք մենակ:
- Ին գործը չի:
- Բա ո՞ւմ գործն է:
- Արմենին ինչո՞ւ եք ուղարկել:
- Կարծում էինք կգնա ու կգա, էն էլ գնաց ու չեկավ:
- Ես ու Արմենը քաղաքում կլինենք, դուք՝ էստեղ: Ես մեկ-մեկ

կգամ:

– Յոթերորդը վերջացրու, տեսնենք գլխաներիս ինչ է գալիս:

Սիմոնը, հոգնած ու խուլ, հնձից եկավ տուն՝ լույսերը վառվում էին, շունը փաթաթվեց ոստքերին, այգում քչքչում էր առվի ջուրը, բուխարու մեջ մարմրում էր թեյի կրակը, բայց տունը լուս: «Աղջկա հետ էլի կռվել է»: Սիմոնը հազար ու ներս մտավ՝ աղջիկը գիրք կարդալով համերգ չեր լսում: Աղունը նստել էր գզողների տակ ու լաց էր լինում:– Կռվել ե՞ք:– Փախել է Կիրովական:– Բա քննությունը:– Գերազանց է ստացել ու դասատվի հետ փախել է՞է:– Սիմոնը նստեց թախտին ու խուլ սպասեց: Ոչինչ չեր պատահում: Լույսը վառվում էր, գորգը կախված էր պատից, դուրսը խթիսլքում էր թեյամանը, պատուհանի գոգին աղջկա գրքերի դասավորությունն էր, գզողների ոճմ քիրը վեր էր քաշում Աղունը:– Ճետո,– ասաց Սիմոնը,– կարգին տղա՝ է, թե՝ լածիրակ-մածիրակ է:– Պատմության դասատուն է,– հեկեկաց Աղունը:– Դե լավ, լաց մի լինի:– Երեկ հետը կռվել էի, ասաց էլ տուն չեմ գա, ես չորացած լեզվով ասացի իմ ուզածն էլ էր է,– աղջկա նկարի վրա օրորվեց Աղունը: Սիմոնը տնքալով թիկնեց մուրաքաներին և խուլ ու հոգնած ասաց:– Արմենակը գա՝ մի բան կմտածենք:– ու այդպես էլ քնեց մուրաքաների վրա, իսկ առավոտյան աղջկա մահճակալը տիսուր ու դատարկ էր: Արմենն այդ ամառ արձակուրդի չեկավ, Սիբիրից երբեմն կատակներ էր անում «առանց հոնորարի մի տող էլ չեմ կարողանում գրել, դրա համար էլ նամակ քիչ-քիչ եմ գրում»: Թերթերում լինում էին նրա հոդվածները, որոնք այնքան էլ լավը չէին, բայց այդ աշնանը նրան գովեցին: Ասաց նոյենքերին մի հինգ օրով կգա, բայց նոյենքերին հեռախոսով հոդվածներ էր հաղորդում Բուլղարիայից թե Զեխոսլովակիայից: Աղունը երեսունյոթ տարեկան էր, Սիմոնը՝ քառասունութ: Աբել ապին ու Արուս նանը Յակոբին ունեցան երբ Ադամի կինը կար, Սիմոնն էլ մի տասնութքսան տարեկան տղա էր: Անոթ չեր լինի: Կատակողները մի քիչ կկատակեն, հասկացողները կհասկանան, որ բուի պես ապրելը դժվար է: Իսկ ընդհանրապես՝ երեխան այս տան համար է և ոչ թե կատակողների կամ հասկացողների: Մի քիչ ամաչելի էր Արմենից,– նրան տեսել էին Թրիլսի-Երևան գնացքում աղջիկների ու տղաների մի մեծ խմբի հետ, ծեռքերն աղջիկների վզներին,– բայց Արմենն էլ եթե մտածողություն ունի, թող կարդանա մտածել ծնողների մասին:– Բեր,– ասաց Սիմոնը, դու երեսունյոթ տարեկան ես, ես՝ քառասունութ:– Սիմոնոն,– Ցից-քարի

գահերից կանչեց Փիլոն, – աչքալույսն ի՞իմնէ, աչքալույսն ի՞իմնէ:  
Հնձվորները վրա տվեցին թե՝ Սիմոն, պիտի պարես. Սիմոն, պիտի  
պար գաս, թղթակից տղա ես ունեցել: Քունքերը ծիփ-ճերմակ, մա-  
զերը ցանցառ՝ Սիմոնը մի երկու շարժում պար եկավ, բայց ամա-  
չելով ծիծաղեց:– Այտա, ամոք է:– Յետո Սիմոնին առաջ գցեցին ու  
քշեցին մինչև ծորքի տակը: Յետո ասացին պիտի հնձես տակնիվեր  
ու իրենք էլ շարվեցին նրա ետևից, ապա մածուն ու մեղր խմեցին  
նորեկ թղթակցի կենացը և Սիմոնին վազեցրին ջրի: Իսկ Վարդանենց  
շաշ Արտոն կապավ թե՝ ինձ պիտի շալակես էստեղից մինչև ծորքի  
գլուխը, բայց Մուշեղը Արտոյին բռնեց, ու Սիմոնին Արտոյի շալակը  
տվեցին: Ամբողջ օրը կատակ ու ծիծաղ էր, բայց վերադարձին Սի-  
մոնն ասաց. «Չե, ես մեկը մեզ համար է. Են մեկը աշխարհին, ես մեկը՝  
մեզ:– Եղրոր ետևից կթռչի՝, – ասաց Մուշեղը, – քաղաքի տերը չմեռ-  
նի»: Լուսին չկար, անտառը ցեխի պես մութ էր, իջնում էին գայթելով  
ու զգույշ: Գյուղի գլխին անտարից դուրս եկան Վարդանենց շաշ  
Արտավազդը արահետից մի կողմ քաշվեց ու թլիկ-թլիկ հրահանգեց.  
«Դիվիզիա, ստանավի՞հս, – և մեկ-մեկ ճանաչելով անցնողներին,  
ծիծաղելով հայինյեց:– Սրա մերը... բոլորդ կույր ու կաղ թոշակառու  
եք, մեջներիդ իբր ջահելը ես եմ, ես էլ անընդունակ եմ, քաղաքուն  
ին դնչին ոչ մի կնիկ քացի չի տա»: ճամփարաժանուն Սիմոնը  
նրանց կանչեց մի-մի բաժակ խմելու: Եվ երբ անցնում էին Նիկալ  
պապի տան ձորը, ասաց. «Անկեղծությամբ, ես մեկը գյուղի համար է  
ստեղծված:– Ոչ ոք էլ իր երեխայի վատը չի ուզի, – ասաց Մուշեղը, և  
Սիմոնը պատասխանեց:– Իսկ իր վատը կուզի՞՝– Երեխա-երեխա  
զրույց եք անում, աշխարհը կարծես թե ձեր ուզելով է. աշխարհ է, իր  
համար գնում է, էլի»: Սիմոնը ետ նայեց՝ Վրացոնց Արշակ քերին ջրի  
մյուս կողմն էր, կռացած փնտրում էր առվի վրա անցնելու տեղ:  
Լույս դառնաս: «Աղունիկ ջան, ո՞նց ես, – կամաց հարցրեց Սիմոնը:–  
Են ո՞վ են:– Տղերքն են, կանչել են մի-մի բաժակ խմեն:– Ի՞նչ  
տղերք:– Դե տղերքն, էլի, հնձվորները:– Տնաշե՞ն, – ժպտաց Աղունը,  
և Սիմոնը չհասկացավ, թե նա ինչու է ասում տնաշեն:– Տղերքին ճա-  
նապարհեն, – ասաց Սիմոնը, լիտրանոցը տարավ փոքր սենյակ՝  
լույսի տակ տղերքը ջարդվածի պես թափվել էին, – չսակրված,  
կնճիռ-կնճիռ, ճաղատ-կիսաճաղատ, մի աչքը կույր, ֆսֆսան, անա-  
տամ, մի երկու ատամով, Վարդանենց Արտավազդ՝ ծնոտը մի  
կողմի վրա, – նստած տեղները քնում էին, և Սիմոնը հասկացավ, թե  
Աղունը ինչու կլիներ ասած տնաշեն:

- Ախչի, էսքան էս ի՞նչ ես տանում:
- Յանձե՞՝, – արհանարիեց նա:
- Ասում եմ էսքանը ո՞նց ես տանելու:
- Ես քար եմ:

Սիմինը գոյմի դրանը ձիմ թամբեց, բերեց կապեց սյունից.

- Բարձե՞նք:
- Եթե քունդ չի տանում:
- Ղծվար բեռ է: Աղա՞մ, – կանչեց Սիմոնը:
- Ո՞չ:
- Ի՞նչը ոչ:

– Մի կանչիր: Ես կամ:

«Ի՞նչ է, Սիմո՞ն»:

– Սել ես սարքո՞ւմ:

«Կամաց-կամաց»:

– Դեսն արի:

Փոքր եղբոր դրանը պառավը գոհացավ:– Իրար օգմեցեք, իրար պաշտպանեցեք, իրարից խորհուրդ հարցուեք, – մրմնջաց պառավը:

– Աղունիկ:– Սիմոնը մեծ սենյակ մտավ՝ Աղունը հագնվում էր:– Փեշդ ես հագնո՞ւմ:

– Այո, Սիմոն:

– Բա փեշով դժվար չի լինի՞:

– Դու քո գործին կաց, մի ձի բարձել է եղբորդ էլ կանչիր, փոքրին էլ կանչիր, Մուրադենց էլ կանչիր, գուցե հաջողվի:

– Խոսում ես, չես թողնում մարդ իր մտածածը ասի:

– Քո եղբայր Աղամի մտածածը հասկանալու համար մի աքցան է պետք ու մի տարի ժամանակ:

– Ասում եմ նամակ գրենք, թող ինքը գա իր բեռները տանի:

– Ապրես:

– Կամ թե չէ ես տանեմ, քեզ համար ծանր կլինի:

– Գնաս մի ամիս նստես, գաս՝ հարսն ի՞նչ աղջիկ էր – աղջիկ էր, էլի. Արմենն ի՞նչ էր անում – անում էր, էլի, կտորեղեն էիր առնելու, ո՞ւր է – կառնենք, էլի: Դո՛ւ տար, Սիմոն:

– Ախր հետո գալու ես հիվանդանաս:

– Ին հիվանդությունն էլ րոպեական է, էդ դուք եք, որ տնբում ու վշչում եք տարիներով:

– Ես է, որտե՞ղ ես պահելու:

– Ինչքա՞ն է:

Սիմոնը սկսեց հաշվել: Մեկ-մեկ, դանդաղ, հարյուր-հարյուր առանձնացնելով, շփոթվելով և սկսելով նորից:

- Ախպերդ գալիս է, վերջացրու, – շշուկով ասաց նա:
- Յոթ հարյուր:
- Յոթ հազա՞ր:
- Յա: Որտե՞ղ ես պահում:
- Եդ քեզ չի վերաբերում, – շշուկով ասաց նա:

Պատերազմի ժամանակ գնացել էն Թիֆլիս տղերքին տեսնելու – սրանց մայր Արուսն էր, կարմիր Սաքոն, ինքը, Եգորի Սիրուշը: Մանացի մոտերքը գալիս էին՝ գնացքի լուսերը հանգան ու մի կնոջ ծայն ծղրտաց ու աղերսեց. «Երեխեքիս ապրուստը տարան, վայ երեխեքիս թողեցին անհաց, վայ երեխեքիս զրկեցին»: Մեկը սեղմվեց վագոնի պատին, ու այդտեղ Աղունին կարծես թե հուշեցին, որ դա իր եղբայր Վալոդն է: Աղունը լուցկի վառեց, դեմ արեց նրա աչքերին ու ասաց. «Վալո՞ն»: «Աղունի՞կ, – ասաց նա և փչեց լուցկին, – Էս ի՞նչ ես անում էստեղ»: «Եդ ի՞նչ ես քարշ տալիս, – Աղունը վրա քշեց ու ձեռքը զցեց պարկին, – իհմա քեզ կտան միլիցիայի ձեռը, խուլիգանի մեկը»: Մրի մեջ ուրիշ ձեռքեր էլ էն քաշում պարկը ու նրանք շատ էն, ու էն ժամանակ գնացքում դանակով ճարդ էն սպանում: «Իշխանին կասեն, Վալոդ, փողոցային լրի մեկը, մեղք է», խնդրեց Աղունը: Վալոդը ծիծաղեց. «Արա քույրս է... Աղունիկ... չես իշնո՞ւմ Մանաց... Իշխանը քեզ համար օճառ է առել», ու մինչև գնացքի կանգնելը ցած թռան թե անցան մյուս վագոն: Էն կինն էնքա՞ն էր շնորհակալ, էնքա՞ն էր շնորհակալ...

- Ես ինչքա՞ն է, երկու հնգամոց, մի հատ երեքամոց...
- Տասը, տասնչորս:
- Տոմսի փողն առանձնացրու: Էս երկո՞ւսը: Երեք, մեկ – չո՞րս:
- Կոպեկներ է ետ տալու, բայց ախր բեռը շատ է, բեռան համար վայ թե առանձին վճարելու հարց առաջանա:

- Հսկողությունը խիստ է:
- Եսի՞մ, Աղուն, – բարկացավ Սիմոնը, – Էստեղից կայարան՝ Ես շա՞տ գիտեմ խիստ է թե խիստ չի:
- Դե լավ, մի դժվարացրու, – շշուկով ասաց նա: – Ուրեմն տոմսի փողը էս է: Ախպերդ գալու լավ ժամանակ գտավ: Գրպաններիդ մեջ կոպեկներ չկա՞ն:
- Որտեղի՞ց էն լինելու:
- Եսի՞մ, առևտրական մարդ ես: Ախպորդ առաջ գնա, երեխային

Էլ ներս ուղարկիր: Սերո՞...

Սիմոնը դարձյալ սրտնեղեց.— Այտա, կամ ես գնայի, կամ թող ինքը գար իր անտերների ետևից, երեսուն տարեկան մարդ է:

— Փայտ չի կրօում, գրում է, Սիմոն, գրագետը դու ես՝ ես եմ քեզ բացատրում:

Սերոն իր կոպեկներին ինքնահոս գրիչ էր առել, գրիչը կորցրել էր:— Ոչինչ, ես տներին-դրներին լավ կնայես՝ քեզ համար ախապոր նվիրած մի ինքնահոս գրիչ կրերեմ:— Իսկ եղ անտեր թկի կոճակը խեղդում է. աղջկան հազար անգամ խնդրեց շորի վիզը լայն բռնել: Բրդե ժակետի էլ թևատակերն են փոթվում. թե՞ շապիկի թևերն են վերև քաշվել: Այդ քաղաքացիք այդ ինչպե՞ս են այդպես մազը մազին և նեղ և ազատ հազմվում: Եթե նեղ լինի՝ ինչպե՞ս ազատ կլինի: Նշանակում է՝ շատ ճիշտ են հազմվում: Չէ, նեղվածքը թկուռուցքի պատճառով է: Եթե որ երևան հարսնով տուն կունենա, մի ձմեռ մի քսան օրով կնստի հիվանդանոցում, հարսը քիչումիշ ճաշեր կրերի, ինքն այնտեղ շալ կգործի և կզորւցի: (Արա՞նը: Արարը դրած է կես հավի մոտ: Յոնի է — գնացքի քաղաքաբնակ ուղեկցորդները շա՞տ են հասկանում թե տանձինը որն է, հոնինը՝ որը հոնի է, և բեռների շատության հարցը լուծվեց): Ամենադժվարը կոշիկի հարցն է. ոտքը ոտք է դարձնում կոշիկը, բայց առանց ասֆալտի կոշիկը մի բան չի, ու այդպես էլ իր ոտքերը մնացին գյուղական: Յիշվանդանոցում կհագնի տնային փափուկ մաշիկներ: Ասել էի՞ն՝ ես Ծմակուտ գյուղում ներկայումս ամենասիրունն ո՞վ կլինի, որոշել էին, որ բոլոր աղջիկների ու հարսների մեջ ամենասիրունը Սիմոնի Աղունն է, մյուսը՝ Լևոնի աղջիկ Ելենան. ասել էի՞ն՝ բայց եթե հաշվենք, որ Աղունը երկու երեխայի մայր է, ապրել է գոնուն, նրա սկեսուրը Արուսն է եղել, իսկ Լևոնի աղջիկ Ելենը արևի երես տեսած չկա, — որոշել էին, որ ամենասիրունը Աղունն է, իսկ թե Լևոնի Ելենը սիրուն է թե սիրուն չի՝ այդ կերևա երկու փոր ծնունդից և վատ ամուսնու ձեռք ընկնելուց հետո:

Նա քթի մուրզ սրբեց և հիշեց Վանքեր գյուղը, Վանքի աղբյուրը, երեկոն այգեմիջյան ճանապարհին և իրեն՝ դոյլերով: Արզումանյանի եղբայրը հեծանիվ էր քշում. Իշխանի դրանը կանգնել էին շարմաղ Ներսեսը և սև Սիմոնը: Պատերազմի ժամանակ Արզումանյանի եղբայրը շրջկոմի քարտուղար էր, մեքենայով Ծմակուտ էր եկել, գողի Արտաշի հետ նստել էր գրասենյակում, և կամանց մեկնեկ ներս էին կանչում ու լեզվանիներին անպատվելով խելոքներին

հորդորելով համոզում լավ աշխատել: Շողերի հետ Արտաշն ասել էր. «Աղունը թող ներս չգա»: Աղունը աղջկան տվեց Շողերին ու ներս գնաց՝ գողի Արտաշը ասաց. – Սա կծան է, մի քիչ զգույշ, ընկեր Արդումանյան:– Արդումանյանի փոքր եղբայրը նայեց ու տեղից վեր թռավ:– Վայ, Աղավնի ջան, եդ դու ե՞ս, – ու Արտաշը շատ ամաչեց:

- Ես պատրաստ եմ:
- Քթի մուրը երևան կսրբես:– Սիմոնն Աղամի հետ բերները հակ էր անում:

Նա ներս գնաց, քթի մուրը սրբեց և դուրս բերեց պատասխանը.

– Չեզ նման սև լինեի՝ քթիս մուրը չէր երևա:

Բեռը վերցնելիս Սիմոնի գլխարկն ընկավ ու բացվեց ջղային մեծ գլուխը. կարմրել ու սևացել էր Սիմոնի ճակատը, և բեռան տակ նա ճղատվում էր. Աղամը իր հակը տանում էր հանգիստ ու դանդաղ, Սիմոնը խփվեց բազրիքին, ծնկեց ու տնքաց: Յակերը հավասար չէին արել. Սիմոնը կոտրվում էր իր հակի տակ – Աղամի գրկին երեխայի թեր էր: Մրանց բռնած բոլոր գործերն այդպես են. ձիաբեռը ճանապարհին մինչև մի յոր անգամ չքանդվի՝ կիմի՞։ Ղազախից ցորեն բերելիս մի կողմը քանի հակել էր՝ մյուս կողմն Աղամը քար էր դրել: Բեռան կեսը քար էր:

«Քեզ զսպիր, քեզ զսպիր, – մրմնջաց Աղունը, – գուցե իրենք հասկանան, ի վերջո մարդահաշիվ են»:

Զիու քամակն անցան, Աղամը պտտվեց մյուս կողմ, իր հակը դրեց թամբին և բռնած սպասեց Սիմոնի դնելուն, որպեսզի շտկեն, – իսկ Սիմոնը չարչարվում ու չարչարվում էր և չէր բարձրացնում:

– Հը, – սպասեց Աղամը:

Սիմոնը զոր արեց և մի կերպ առաջ բերեց իր հակը: Ու մեղավոր-մեղավոր ժպտաց.

- Էսքան էս ի՞նչ ես դրել, Աղունիկ:
- Զարդելիք, մինչև Գոմեր ճանապարհին ջարդելիք ու դենթափելիք:

Շարժահարելով ու կախվելով՝ բեռը կիա նստեցրին թամբին, Սիմոնը կողքեկողը ընկնելով գնաց դեպի կոճղը ու մի տեսակ կարծես թե վրիաեց: Մի տեսակ՝ կոճղը կարծես չէր գտնում: Ուզում էր նստել՝ կոճղը կարծես տակից փախչում էր: Աղամը երկու կողմից ու ետևից բեռը տնտղեց ու ասաց.

– Լավ է նստել, ախսեր, որ պարան էլ չգենք՝ չի հակի: ճիշտ՝ էսքան էս ի՞նչ ես տանում, այ ախչի:

– Զեր կարծիքով դա ճի՞շտ բեռ է, – հանգիստ հարցրեց Աղունը:

Աղանձ եկավ, տնքաց ու տարավ օժիտակալը, դրեց հակերի արանքում. – Մեր կարծիքը... զո՞ր, – պարանը վերևից շպրտեց ու տակից դուրս քաշեց, – Վանքերն ի՞նչ կարծիքի է, – և ձգեց պարանը:

– Վանքերն էն կարծիքին է, որ էդ բեռը Գոմեր չի հասնելու:

– Քար կղնես, – ասաց Աղանը:

– Յա, քանի հակի՝ քար կղնեմ:

Իսկ Սիմոնը մի տեսակ հանգած նայում էր կոճղի վրայից: Սերոն տարավ դրեց գլխարկը, նա շտկեց գլխարկը գլխին և շատ նմանվեց Ասորենց Մացակին, որովհետև շալվարի կոճակներն արձակված էին ու գլխարկի հովարը ականջի կողմն էր:

– Ախչի, – ասաց Սիմոնը, – մեկ էլ եմ ասում, դու էս բեռը տանող չես:

– Սերո, ձին քաշիր: Վսյո: Դուք էլ նայեցեք ձեր կապած բեռին ու զարմացեք:

Այդպես: Երեկոյան կուտեն մնացորդ հավն ու հացուպանիրը: Վաղը կուտեն այսօրվա ճաշի կեսը: Վաղը առավոտյան հավերը ձու ածած կլիմեն, կուտեն Երկու-Երկու հատ: Մյուս օրվա ճաշը կեփի Աղամի հարս ևազիկը, իսկ մյուս օրը ինքը կլիմի իր տանը՝ իր տան գործերին: Վսյո: Բաց դուռ չկա, շունը կապած է, ռադիոն անջատած է. Երջոյին հոնի արադից պիտի մի բաժակ խնեցնել՝ հաշվիչը դարձնի չպատվող, Սերոն արդեն քարափին էր հասնում բեռն ուղիղ էր ու չէր ճոճվում: Սիմոնը ցանկապատն անցել էր, գնում էր ձորի պոնկով ու, մի տեսակ, կարծես անընդիատ սայթաքում էր դեպի ձորը: Աղանը կանգնել էր իր հավիտենական սայլի կողքին:

– Ինձ համար ի՞նչ էիր բերելու:

– Տաք-տաք գլխարկ:

– Ապրես, – ծիծաղեց Աղամը:

– Գնացի՞ր, անփորձանք գնաս, անփորձանք գաս, բեզ հաջողություն, – ձորի մյուս կողմից կանչեց սկեսուրը:

– Բեզ էլ ողջություն: «Աչքերդ չռած նայիր՝ տես ով է գնում, ով է գալիս»:

Փիլոյի տունն անցան, Մուշեղի տունն էլ անցան՝ Սոնայի ավերակն էր: Լիրք Սոնան խելագարվեց ու մեռավ Կիրովականի հիվանդանոցում, տղաները Գրողնի են: Տղաները լավ են ապրում, բայց Սոնան չտեսավ նրանց Գրողնին: «Բեզ իմ անեծքը տարավ, որովհետև ես արդար էի, դու՝ շան պես մեղավոր»:

Արահետի հետ եկող ցանկապատի գլխին, գետնախնձորների և մի երկու քալենու ետևում Արոյենց Ստեփանի տունն ու քարհանքն էր. նրա տղա Արեստին քարհանքի մոտ մի բնում ապրեց, ապրեց, ապրեց ու դեռ ապրում է: Քարհանքն էլ իրենցն է, քարհանքի տեր են:

Վարիչ Ռուբենի տունը երկհարկանի է, քազրիքները ներկված են կապույտ, բայց վարիչ Ռուբենը ահով սպասում է Արմենի ֆելիետոնին, քանզի բարձրագույն կրթության վկայական չունի և թենիս-մենիս, նստարան-մստարան է նորոգել տալիս Սիմոնին ու փող է դուրս գրում:

Քոչարի Յրանտը Կիրովական ավտո է առել. ճանաչում է եղբայր Վալորդին, եղբայր Վալորդ՝ նրան, իրար հավանում են, գյուղ գալիս Աղունի և Սիմոնի առողջությունը հասուկ կերպով է հարցնում: Արմենի և Վալորդի շնորհիվ:

Յամբո հորեղբայրը մի ժամանակ լավ թափ է վերցրած եղել տներ սարքելու իմաստով, բայց նրա թափը զավել է Մամիշակ հորաքույրը: Նկուղային մի ընդարձակ հարկ էր լինելու, դրա վրա՝ երեք սենյակ, բայց տանիքը ծներով էր լինելու, ապակիներով՝ ամառվա համար: Մի սենյակը մի կերպ սվաղել, մտել են մեջը է՛տ քսանութ թվականից, իսկ տունը կա եղանակ կիսատ ու տանտիրոջ պես մեծախոս-մեծախոս:

– Գնում ես երեխային տեսնե՞ս, – եռանկյունի աչքերը ջրոտ՝ հարցեց Յամբո հորեղբայրը:

– Այո, հորեղբայր: Դո՞ւ երբ ես քոչում: Տղերանցդ ուղարկել ես ու եղանակեմ...

– Ա եդ քաղաքուն ի՞նչ կա, Է... Աշխատողն աշխատում է, հասկացանք, բա ծերե՞րն ինչ են անում: Ոչխար չունեն, խոզ չունեն, ծիչ չունեն – ինչո՞վ են պարապում:

– Պահակություն:

– Ես է պալատներիս պահակ եմ, էլի:

– Զգիտեմ, հորեղբայր, չգիտեմ, – ասաց Աղունը, – մերն էլ երկի ես է, որ բոլի պես էստեղ վայենք:

– Գնաս բարով, երեխային ասա թող մեր ազգի պատիկը բարձր պահի:

«Ազգ էլ լինեք»:

Սումբարի դանից ծիկրակեց նրա ամող-դնող Գոհարը: Արուսն արդեն լուրը տվել է: Գոհարը տարին մի գորգ է կտրում: Մի ձմեռ

Աղունն ուզեց նրան և օգնել, և սովորել, նա ասաց. «Ես անհասկացողների հետ գլուխ չունեմ»: Աղունն արհամարհեց նրանց տունը և բարձր-բարձր գրուցեց սկրարեցի պառավի հետ.

– Պատի մի մեծ գորգ, մի հատ էլ՝ թախտի, կարպետը չհաշվենք, երկու ձեռք անկողին – ավելին չեղ կարող: Ով որ դրանից շատ է տվել, թող պարծենա: Սառնարան: ճաշասենյակ:

Գերեզմանոցի ձորում գալիս էր փոքր Սիմոնը: Աշխատող մարդ է, բայց իր առողջության արժեքն էլ հասկանում է: Յնձի ու ցանքսի ժամանակ փայտը ձեռքն է առնում՝ ոտքս ցավում է, գյուղամիջում պտտվում, երբեմն մանրիկ պաշտոնների տեր է դառնում, իսկ որպես փայտագործ Սիմոնի կեսը չարժե, բայց փողոտ գործերը միշտ նրան են ընկնում: Գայլի պես մի շաբաթում վերջացնում է ու էլի ձեռնափայտը վերցնում – ոտքս ցավում է: Սիմոնը սրտնեղում է, բայց Աղունը գիտի, որ այդ այդպես էլ պիտի լիներ, քանզի մենք իրար բարեւում ենք, ինչպեսություն ենք հարցնում, բայց բարին պահում ենք մեզ և մերը մեր ինչպեսությունն է, և չի կարելի արիեստը տալ ուրիշի, են էլ էս մի բուռ գյուղում: Մի առանձին ծեծ էլ դրա համար կերավ:

- Երևան ե՞ն գնում:
- Հա, տեսնենք:
- Հաջողում:
- Դուք լավ լինեք:
- Մենք կամաց-կամաց ապրում ենք:

Իսկ վիզը միշտ լիքն ու կարմիր է, նրանց տանը կրիվներ չեն լինում, թեպետ հենց նրա տանն էր կրիվ լինելու, քանի որ գոյի Արտաշի հետ նրա կինն էր կապվել Հայրենական մեծ պատերազմի ժամանակ և ոչ թե մենք:

Հորաքույր Մանիշակի տունը հիմա հարազատ ու խեղճ է, որովհետև Ներսեսը բանակից չեկավ, իսկ նրա ժառանգները թեկուզ աշխատաեր են, բայց չունեն Ներսեսի ճարպկությունն ու ոխավոր պաշտոնասիրությունը: Արմենակը նրանց մի թերև օգներ, մի պահեստապետից-բանից դառնային:

Մելքոնմենց իվանը աղջիկներ է բուծում ու ծիծաղկոտ-ծիծաղկոտ, սիրուն-սիրուն տալիս Ծնակուտ, Հովհիտ, Կիրովական: Սեղան մի քիչ ավելի կրթված լիներ՝ հենց հիմա թևից կրոներ ու կտաներ Երևան հարս. նա և բարի է, և գյուղացի, և ումի քաղաքի գեղեցկություն: Նա չէր թողնի, որ Արմենը մոռանար Ծնակուտի իր մորը:

Նաև՝ Եսի՞մ ինչ սիմոնացվի բաժին է դաշնալու հովիտներում այս լույսի պես աղջիկը:

— Աղջիկ ջա՞ն:

Նա քամուն ցորեն էր տալիս, մղեղի ու հատիկի ետևից նայեց ուկի մազերով ու ժառաց, ու մտավ Աղունի սիրտը: Ու լիստիկ թևերը վար բերելով, վիզը թեքած նայեց կապույտ մաքուր հայացքով:

— Եսի՞մ,— ասաց Աղունը:

Նա մղեղ ու ցորեն հիմեց արևի մեջ և շողք ու խշշոց մաղեց Աղունի սրտի վրա:

— Քեզ ցանկանում եմ մի լավ ամուսին,— ասաց Աղունը: Յին օրերի արևի մեջ Շողերը ցորեն էր քամհարում, արծիվը պտտվում էր լազուրի ու ամպերի մեջ, հետո Շողերը վար դրեց աշտարարը, եկավ շիփուղով խիեց-փուց պառավին:

— Քեզ արժանին Ծնակուտ ու Յովիտ չի, աչքը Երևանի վրա պահիր,— ասաց Աղունը:

Նա թույլ-թույլ ծիծաղեց, նրա ուսերը թրթռացին, և Աղունը խեղդվելով մտածեց, որ գեղեցիկներն անբախտ են լինում, իսկ ծշմարիտ մեծ սերը լույսի պես իջնում է ձիու փիքիրի վրա: Արզումանյանի եղբայրը կին բերեց ռաստովներից եսիմ ում, և Արմենակին չանթել է Երևանցի մի սվաղած սկը:

— Կամ թե չէ՝ գնա համալսարան, Արմենիս կասեմ կօգնի՝ կընդուն-վես:

Կապույտ աչքերի մարմրոցով նա տաքացնում ու տաքացնում էր Աղունի սիրտը:— Այ ախչի,— կանչեցին,— այ ախչի, ուշանում ես,— կանչեց Սիմոնը:

— Քեզ մի լավ ամուսին եմ ցանկանում, աղջիկ ջան:— Եվ մի անգամ էլ ետ նայելով, Աղունը նրան տեսավ բորիկ ոտքերը ցորենի մեջ, ցորենը մինչև ծնկները, ծփացող չիթը,— և Աղունը մտածեց, որ համալսարաններում վկայական են տալիս և ոչ թե խելք, որովհետև խելքը սովորովի չէ, այլ բնականից, և դրա համար էլ լինում են վկայական ունեցող ավանակներ և չունեցող իմաստուններ:

Սիմոնը կանգնել էր դպրոցի մոտ, պտտաձողի սյունը բռնած, ձին կապած էր գուգափայտերից, տարատը մաշելով Սերոն ուզում էր բարձրանալ պտտաձողին, փաթաթվել ու կպել էր սյանը, Սիմոնի գլխարկը թարս էր դրած, մեծագլուխ ու սև՝ Սիմոնը նայում էր մոտեցող Աղունին:— Ամուսինս հիմա թռչելու է, բռնելու է, մարզանք է անելու պտտաձողի վրա,— չարախնդաց Աղունը:— Յավատալի է,

սիրուիի էր պահում, գլխարկն էլ՝ ճիշտ էր դնում:

- Այտա, արագ արի, արագ,— սրտնեղելով բարկացավ Սիմոնը:
- Մի հատ թոփր մարզանք արա՝ տեսնեմ,— կանչեց Աղունը:
- Քո լեզվիդ տերը մեռնի, քո լեզվիդ,— քրթմնջաց Սիմոնը, հեռացավ պտտաձողից, չիմացավ ինչ անի, թշնամանքով նայեց պտտաձողին և սրտնեղած թքեց:— Գյուղամեջ չկա, ամոք չկա:

Աղունը ճանապարհին չէր:

- Ո՞ւր գնաց, այ տղա, մերդ:
- Չտեսա:

Սիմոնը հանկարծ հասկացավ, որ Աղունը մտել է Սաքոյի տուն՝ պարտքը առնելու: Դարձյալ ամոք էր, որովհետև Սիմոնը երեկ էր հասկացրել, որ իրեն փողը հիմա պետք է, իսկ նրանք չունեին: Նրանք հիմա ի՞նչ կմտածեն ընտանիքում Սիմոնի դերի մասին:

- Ճիշտ եմ ասում, քո լեզվիդ տերը մեռնի, քո լեզվիդ, ճիշտ եմ ասում...— քրթմնջալով դեսուդեն ընկավ Սիմոնը:

Քիչ հետո Սաքոյի Լուսիկն ու Աղունը երևացին նրանց տան անկյունից, գնացին դեպի խանութ: Սիմոնը կարծում էր Աղունը հիմա ամաչելով ետ կնայի՝ նա չէր նայում, գրուցելով գնում էր Լուսիկի հետ:— Աղունիկ,— կանչեց Սիմոնը: Նա ետ չնայեց, ձեռքով լսած լինելու նշան արեց ու գրուցելով շարունակեց ճանապարհը դեպի խանութ:— Ես ձին մեղք է, այ ախչի...

Խանութից դուրս եկավ շուտ, եկավ արագ-արագ և ծեծի սպասող երեխայի պես ժպտում էր:

- Ախչի, կարողացա՞ր,— զարմացավ Սիմոնը:
- Ինչո՞ւ էիր ասում վարսուն է:
- Ախչի, հինգը Մուշեղին պարտք եմ անցյալ տարվա հունվարից:
- Ինչո՞ւ էիր պարտք վերցնում, առևտրական ամուսին ջան:
- Ախչի, Արմենակի մասին ռադիոն հոդված էր հաղորդում, տղերքը բռնեցին թե՝ մի կոնյակ ես առնում:

– Եդ շալվարիդ բերանը փակիր, եդ գլխարկդ ուղիղ դիր: Սերո ջա՞ն: Երկու օրով քեզ նշանակում եմ մեր տան մինիստր, գործերդ էնպես դասավորիր, որ գամ տեսնեմ էն ճաշը դեռ էնտեղ է, իսկ մուրաբայի հախից եկել ես: Տուն: Ինքնահոս գրիչով բերում եմ, հունվարին էլ մի շաբաթով երևանցի ես:

- Սինչև Գոմեր հետներդ գամ, հայրիկի հետ ետ կդառնամ:
- Գա՞ , Աղունիկ:
- Ի՞նչը:

Ինքը իր ասածին չհավատալով՝ Երեխան սրանցավարի ժպտում էր:

- Մինչև Գոմեր գամ, հայրիկի հետ ետ կդառնամ:
- Թոփիր տուն, շուտ: Յավերը, շունը, ոչչարը հանդից գալու, խոզը հանդից գալու՝ «մինչև Գոմեր հետմերդ գամ»:
- Ես ձեր խոզարածը չեմ: Կարծես ես իրենց խոզարածն եմ: Իրենք գնում են Երևան, ես, «հավերը, շունը», – Սերոն լաց լինելով ետ էր գնում, Սիմոնը խղճահարվելով նայում էր նրա ետևից, իսկ Աղունն արդեն քաշում էր ձին:
- Արի, լավ, ուշացնում ես, շուտ, – ջղայնացավ Աղունը: – Քո ցեղական լացն է, նորություն չի:

Սիմոնը վերցրեց ձեռնաբեռը և իջավ կարճ արահետով: Խաչմեռուկում սպասեց, ձիու սանձերը կապեց թամբին, ձին առաջ գցեցին, իրենք գնացին ետևից, և Սիմոնն ասաց.

- Երեխայի հետ կոպիտ ես վարվում:
- Քո մեր Արուսը ձեզ քորել է՝ ահա թե ով եք դուք, ես Արմենակին ծեծել եմ՝ ահա թե ով է նա: Արագ արի:
- Ախչի, էսքան թեռը ո՞նց ես տեղ հասցնելու: – Սիմոնը ուսը գցեց ձեռնաբեռը և եկավ դարձյալ մի տեսակ ոտքերը տակից փախցնելով:
- Այ մարդ, էդ ո՞նց ես քայլում:
- Քեզ նեղություն է տալի՞ս:
- Էդ բկիդ կոճակն արձակիր: Տեսա՞ր փոքր Սիմոնի առողջությունը:

Կամքջի մյուս կողմը, ճանապարհի գլխին, մի աղջիկ էր նստած. մի տղամարդ փորի էր պառկել նրա կողքին: Տղան գլուխը թեքեց և ուսի վրայով նայեց սրանց: Սիմոնը դոփդոփելով կամուրջն անցավ, ետևից անաղմուկ գնաց Աղունը – Վրացոնց նորահարսն ու մի տղամարդ էին. տղամարդը շուրջ եկավ ու վրա նստեց՝ Վրացոնց Արշակի Սուրենն էր:

- Կովում ե՞ք, թե արդեն հաշտվում, այ տղա, – կանչեց Սիմոնը:
- Չի լինում, Սիմոն քեզի, չեմ կարողանում կռվել:
- Սիմոնը ծիծաղեց ու թաքում մտքից կարմրեց: – Յանով է՝, – ծիծաղելով հարցրեց Սիմոնը:
- Յանովը՝ դեռ հանով է, համը տեսնենք երբ է դուրս գալու:
- Մի շտապիր, ինչո՞ւ ես շտապում, – թեռը մեջքին շտկելով ասաց Սիմոնը:

- Եղ ո՞ւր եք գնում էդպես տնով-տեղով:
- Արմենակն էդ ցավից ազատ է, գնում ենք գլուխը յուղենք գանք:  
Սուրենն ու Սիմոնը ծիծաղեցին, Աղունը կանչեց դեպի կարծես թե խօռվ հարսը.

– Սուտ է ասում, աղջիկ ջան, դրանց տղերքը լավ տղերք են: Զոկել ես:– Եվ աննկատ հրելով Սիմոնին, Աղունը ցածրաձայն ասաց.– Իսկ որպես հայր՝ դու քո հայրական բարձրության վրա չես:

Նրանք զրուցելով գնացին:

– Ի՞նչ բարձրության:

– Յեղինակազուրկ ես:

– Ինչո՞ւ եմ հեղինակազուրկ:

– Շուտ-շուտ արի՝ ասեմ: Քո անունը լսելիս Արմենը պիտի դողար, եթե մինհատ էլ լիներ՝ քո խոսքը նրա համար օրենք էր լինելու, բայց հետդ մի րոպէ կվանգնի<sup>6</sup>, կխոսի<sup>7</sup>:

– Երեսուն տարեկան մարդ է, էդքանն ինքն էր հասկանալու:

– Չհասկացողին հասկացնում են:

– Քիմա էլ Արմե՞նը դարձավ չհասկացող:

– Որոշ հարցերում: Որոշ հարցերում ծնողի խոսքը օրենք է:

– Աղջկա հաշվով ես ասո՞ւմ, – կանգ առավ Սիմոնը:

– Թեկուզ՝ աղջկա:

Սիմոնը նեղսրտեց.

– Այտա... այտա, նրա տեսածն իմ տեսածից շատ է, ինքն աչք չունի<sup>8</sup>:

– Աչք ունի, բայց իվանի Սեդային չի տեսել:

– Դարբնի<sup>9</sup>... Ա դե հիմար-հիմար քիչ խոսիր, է:

Դարբնի աղջիկը արևի մեջ ցորեն ու ոսկի էր շաղուն, կանգնել էր ցորենի մեջ ոտքերը բորիկ, թևերը բարձրացրել էր ու ցորեն էր հինում իր բարձր հասակով մեկ: Կույտը հասել էր ծնկներին, մղեղ էր նստել կույտից կարպետի վրայով մինչև ցանկապատ, իին ջինջ արևի մեջ ուրախություն ու լաց էր սփռում Ծովինարի հարսանիքը:– Դարբնում ո՞նց էր սովորում, – հարցրեց Սիմոնը:

– Ես տարի նոր վերջացնելու է, տասներորդում է:

– Վայ թե ճիշտ ես ասում, Աղունիկ:

– Ես միշտ էլ ճիշտ եմ ասում. Էն է որ՝ ասողին լսող է պետք: Կրթվածությունը կրթվածություն, քաղաքավարությունը քաղաքավարություն, բայց գյուղում գյուղացի էր լինելու, քաղաքում՝ քաղաքացի: Գյուղի աղջիկը հեշտ է քաղաքացի դաշնում, բայց քաղաքինը

գյուղացի... Մի ոտքը Ծմակուտ է լինելու, քանզի ամեն ինչին չի կարելի փող տալ: Քաղաքը լիքը գրող ու մինհստր է, իսկ Ծմակուտ մինհստր է, գրող է, խնբագիր է թե կոմպոզիտոր՝ մի Արմենակ է: Մեծ անունը մեծ ծախսեր է պահանջում, իսկ եթե մեծ ծախսերը բացակայեն անունն էլ կփոքրանա: Ինքը քեզ սիրում է, «հերս, հերս», բայց դու ինքնուրույն խելք չունես, թե չէ վաղուց համոզած կլինեիր: Դրա համար էլ ասում են, որպես հայր՝ դու ևս տանը ձայնագուրկ ես: Այ մարդ, եդ ո՞նց ես գալի՞ս...

– Ո՞նց եմ գալիս:

– Տակուգլուխ ես անում:

Սիմոնը հավասարվեց: Շտկեց թեոր մեջքին և սրտնեղեց.

– Չեր օրինած, զնալու ես, գաս ու հիվանդանաս:

– Շովտից իրո՞ք ոտքով ես եկել:

– Չէ, հատուկ սավառնակով:

– Չո խելքը...

– Կասես՝ որ դպրոցից հեռացրել էին, որ մի շաբաթ դասի շիր գնում, որ գրեթե մատուռում պահում էիր ու ոչխարածների հետ քարշ գալիս, որ էն է ոչխարած էիր դաշնում – հերդ վեր կացավ ու հիվանդ-հիվանդ զնաց Յովիտ ու յոթ քրտինք փոխեց Յովիտ ճանապարհին ու Խաչատրյանի դրանը, կասես՝ եթե դու լավ զավակ ես ու մենք էլ քո ծնողներն ենք՝ դեռ եդ վիճակում ենք, մտածիր:

– Յա-ա՞... հա-ա՞... որ էղքանը հասկանում էիր՝ մի թերան էլ դու ասեիր անասնաբուժականի մասին: Որպեսզի քեզ սիրեն, իրենց կամքով ես գնում: Կուրանամ ես, գրում է, գրում է, գրում է կոպեկի գին չունի, գիշերվա գրածն առավոտը պատռում է: Ուզում է մեծ գրող լինի, ու չի հասկանում, որ ինչը հնարավոր չի՝ հնարավոր չի: Էղքան գրող կա, նրան ո՞վ ճանապարհ կտա:

– Ռադիոն որ հաղորդում էր, ռադիոյի ասածով կարծես թե մեծ գրող էր, Աղունիկ:

– Երեխա-երեխա մի խոսիր, հենց ապրես: Տում չունի, տեղ չունի, ոչ հերն է մի բան, ոչ մերն է գրագետ, ինքն էլ բարակ երեխա, «մեծ գրող էր, Աղունիկ»: Այ մարդ, քայլվածք աչքիս մի տեսակ շատ է փոխվել, եդ ո՞նց ես քայլում:

– Ծերացել եմ, Աղունիկ, ծերացել:

– Զահելուրյունիցդ շատ խնդացինք, իհնա էլ «ծերացել եմ»: Դու որ մի ռխավոր մարդ լինեիր՝ գիտե՞ս ինչ կանեիր: Ասա՞ ի՞նչ: Չո սիրած մայր Արուսը, երբ երեքդ էլ բանակում էիք, հասնում էր էստեղ,

ոտքերը հանում եր ու բորիկ-բորիկ գալիս է՞ր, գալիս եր, գալիս եր... Հա, ասա՝ ի՞նչ: Լսիր ու վրաս գռառա: Մի երկու ոչխար կմորթեիր, միսը աղուսուի կղճեիր, մի քառասուն գարեջուր ու մի քանի հատ կոնյակ կրերեիր Յովտի խանութից, ասա՝ այո՛: Յովտի փոստից կզանգահարեիր Երևան՝ «Էդ Խմբագիր-մմբագիր, տպող-մպողներիդ հավաքիր, բեր եստեղ. ասա հայրս հրավիրում է»: «Յայրս ծեզ կանչում է գյուղավարի պատվելու»: Դրանից հետո տղայիր արածը արած կլիներ և ոչ թե «մամա, հացի փող տուր»: Մտածիր: Յը...— Ետ նայելով՝ նա տեսավ Սիմոնի խեղճ ժպիտը և հասկացավ, որ դա այդպես էլ կլինի:— Այ մարդ, բեր եռ բեռը կամ ես տանեմ, կամ ձիուն կապիր... Ոռօռօ...— Որ դա այդպես էլ կլինի. ոչխարը կմորթեն, կհամեմեն ու կսխսեն, Սիմոնը կգնա Յովտի, վերադարձին ավտո չի լինի, շշերի մոտ Սիմոնը կկանգնի մի օր, երկու օր, Սիմոնը կրերի շալակով (որովհետև ձին տված կլինի ուրիշի), կողերը ջարդելով ու մինչև պոչուկը քրտնած Սիմոնը կրերի գարեջուրը, իսկ նրանք կզան, կլակեն, կրափեն, կջար-դեն, կերգեն, կգնան ու չեն տպի, քանի որ Արմենի կողը հաստ է և մարդանոտ չէ:— Ո՛չ, ոչ մի ոչխար. Արտաշես Արգումանյանը Վանքեր գյուղից Մոսկվա քաղաք հասավ իր խելքով: Ոչ նի տարբերություն աղջկա և տղայի միջև. տասնութ տարեկան դարձավ՝ աղջկան մարդի ես տալիս ու դրանից հետո նա մարդինն է. տղան տասնութ դարձավ՝ պիտի տաս կյանքին, թող գնա իր տեղը գտնի: Վսյո՛: Նրա փառքն ինը չի, որպեսզի նրա հաջողությունը իմը լինի: Վսյո՛:

Մատուրի մոտ նա ձայնը ցածրացրեց. խոսեց շշունջով, և չեր հասկացվում՝ աղոթո՞ւմ է թե խմբագիր-մմբագիրների հետ վիճում: Որդին ու դուստրը ծիծաղում էին նրա աղոթելու վրա, որովհետև նա կարող էր վիճել, ճճվալ, ապացուցել իր արդարացիությունը և աստծո սխալականությունը և ոչ թե վախճնալ աստծուց և աղերսել:

— Աղոթում ե՞ս,— ժպտաց Սիմոնը:

Նա սայթաքելով բարձրացավ մատուրի դուռը, արագ համբուրեց մի քանի խաչքար, մի թերև խաչակնքեց ու ետ դարձավ:

— Օգնելու գորություն ունեցողը քիչ է, բայց ով ասես կարող է խանգարել: Եսի՞մ: Վանքերի սուրբ Սարգսից հետո չարժե սրան բանի տեղ դնել, բայց դե եսի՞մ: Քո մերն էն ցույց տվածս տեղից բորիկ գալիս էր, լուսնահարի ննան գալիս էր, բոխենու մոտից ծնկասող գալիս էր ու գետինը լիզելո՞վ պտույտ էր գալիս շուրջը: Աղամիս համար՝ երեք պտույտ, Սիմոնիս համար՝ երեք պտույտ, Յակոբիս հա-

մար՝ Երեք: Իսկ տավարը գոմում՝ ծարավ, սոված, տակը մաքրելու: Առատ-առատ աղոթում էր, իսկ խամ Երինջը ծնել էր ու հորթը տրորել:

— Դու չէի՞՞ր աղոթում,— նեղացավ Սիմոնը:

— Հա, ձեր մայր Արուսն էլ էր կարծիքին էր, որ Երեխաներին ծաղկի մեջ տապակվելիս պիտի բողնեմ ու գամ Ծնակուտի ավերակին աղոթեմ: Արմենի աչքերը բասն օր կպած էին, մի տոպրակ ցորեն ունեի, ձեր ջրաղացը սառել էր, բերի Գոմեր՝ Հովսի ջրաղացը սառած էր, տարա՛, Սիմոն ջան, Դարպասի ջրաղաց, ու Փառանձեմը մեր տաճ դուռը բաց էր թողել, իբր թե կարտոլ պիտի խաշե՞՛ ջուրը ցանաքեցրել-վառել էր, հոտը գցել էր տուն, վառարանը ծուխ էր տվել, Երեխեքը Փառանձեմին ասել էին մեր տնից գնա, նա էլ խոռվել-գնացել էր, վառած կարտոլի հոտի վրա մերունը ներս էր մտել, տունը ծխով լցվել էր, Երեխան՝ ջղային, կատաղած՝ պոկոտելով աչքերը բաց էր արել, վառարանը ջրով հանգցրել էր, խոզը տնից դուրս էր արել, իսկ խոզը սովա՛ծ, դռնից չի հեռանում: Երեխան պառկում է, խոզը ներս է մտնում. Է՛տ ամբողջ օրը էր աչքերը կպած Երեխան խոզը դուրս է անում է՛տ սոված խոզը ներս է գալիս: Գնացի տեսա, Սիմոն ջան, ին էր կատաղած Արմենը կացինն առել է, յոր տարեկան, ու շենքին նստել, սպասում է խոզը մոտենա՝ որ կացնով խփի: Կույր-կույր, կույր-կույր, կույր-կույր...

Աղունը մի Երկու կաթիլ լաց եղավ, հետո հանեց փեշը, բաճկոնը և՝ ջղային ու մի տեսակ զգվելով՝ հրահանգեց.

— Տղամարդ ես, տո՛, շուտ-շուտ արի... Աղոթք էի անելու Ծնակուտի հավաքրին: Զեր մայր Արուսը աղոթեց, աղաչեց ու ձեզ Երեք-Երեք ետ բերեց ողջ-առողջ, հիմա կաք, տղամարդ եք, գյուղում ասում են Աղունի ամուսինը, Մանեի ամուսինը, «մարդդ կողքի կանգնած է»:

— Հենց ապրես,— զգվելով խնդրեց Սիմոնը,— հենց ապրես, ձենդ կտրիր:

— Ծնորհակալություն: «Ամուսինդ»: Ու ոչ ոք չի հասկանում, որ մուրճ է գլխիս և ոչ թե ամուսին:

— Ծնորհակալ եմ:— Սիմոնը ետ մնաց ու սրտնեղած թքեց: Աղունն ուշադրություն չդարձնելով գնում էր արագ-արագ և խոսում էր:

— Ծալվարը վրան բռնող է պետք՝ «ամուսինդ»: «Մի լծի եզները իրար պաշտպանում ու սիրում են, Աղունիկ»: Վանքերի սուլը Սարգսին տասնինգ տարի է մատաղ եմ խոստացել, մի օր տեղից

շարժվեցի՞ր թե գնանք, Աղունիկ: Առողջարան եմ ուղարկում: Առողջարան եմ ուղարկում, որպեսզի առողջանա, որպեսզի ուրագը գլխիս առողջ-առողջ վրա բերի: Ինչի՞ համար: Շաբաթ չէր քաշել՝ լիրը Սոնայի հետ նստել էր կերուխումի – առողջարան եմ ուղարկում: Ամեն մարդ իր առողջությանն է հետևելու, իր, իր, իր...

- Տո գնա, չեմ գալիս, – Սիմոնը թքեց ու շուր եկավ դեպի գյուղ:
- Մի՞ արի: Գնա տես ծուն ով է թերխաշ արել, գնա կոտլետ կեր:
- Աղունիկ, որ հասա՝ կտրորեմ:
- Հասիր:
- Ե... թո՞ւ: – Սիմոնը դոփովիելով ետ գնաց և շատ էր նման Ասորենց Մացակին, որովհետև գլխարկի հովարը դարձյալ ականջի վրա էր, – իսկ Աղունի սրտին մի կաթիլ դառնաքաղցր լեղի կաթեց... Աղունն զգաց կարողի հայումը:
- Ի՞... դա՞րպասեցի... – ուզեց անիծել Աղունը և բառեր չգտավ, և իրեն ասաց, որ չպետք է ջղայնանա, քանի որ դժվար ճանապարհի վրա է: Աղունը ժպտաց ու հետևեց ձիում, որի բեռը ճիշտ ու պինդ էր կապած և կարծես թե դրանց ցեղի տղամարդիկ չեն կապել:

Բլրի ոլորանից Աղունը ետ նայեց՝ Սիմոնը նստել էր սալերին ու շատ էր նման Ասորենց Մացակին, որովհետև շորերը գորշ ու իին էին և գլխարկն էլ դրված էր մացակավարի: Նրա համար պիտի մի գլխարկ առնել, հատուկ տեսակի, որ հովար չունենա, ոնց էլ դմի՝ ճիշտ լինի, ու այն ժամանակ Աղունը մի քիչ պակաս կջղայնանա:

- Քիմի չե՞ս գալիս, – ծիծաղեց Աղունը:

Սիմոնը նայեց նրան, գլուխը շրջեց մյուս կողմի վրա ու թքեց: Բայց կարծես թե դեռ նայում էր Աղունին, որովհետև հովարը նայում էր Աղունի կողմը:

– Վեր կաց արի, – կանչեց Աղունը, – քեզ համար մի հատ ինքնահոս գրիչ եմ առնելու:

- Քենց ապրես, ռադ եղիր՝ աչք քեզ չտեսնի:
- Բա ձեր կովերն ո՞վ կկրի:

Սիմոնը անցողակի նայեց ու չտեսավ նրան:

– Արի, քեզ թերխաշ ձու եմ տալու արադի հետ, արի, – կանչեց Աղունը: – Խմես ու գժվես, – շշնջաց Աղունը:

– Դե ռա՞դ եղիր, քո դեսն ուղարկողի հերն անիծեմ, – բղավեց Սիմոնը, կարծես վեր էլ թռավ տեղից, բայց հետո դարձյալ նստած էր, և չէր երևում թե ինչ է անում, որովհետև շորերն ու քարը մի գույնի էին:

- «Դե դադ դեղի, քո դե-դե դուդի դեղն անիծեմ», որովհետև

մարդավարի խոսքի անընդունակ եք:— Աղունը քշեց ձին և մտածեց, որ ձեռքի փողից մի քանիհենգ-երեսուն ռուբլի պիտի թաքցնել Արմենից, Սիմոնի համար առնել նոր բաճկոն ու տաքատ: Ոչ այնքան թանկ, ոչ այնքան էժան — գյուղին հարմար մի բան: Ամբողջ գյուղը ման է գալիս բաճկոնավորված, իսկ Սիմոնի հագինը չորս-հինգ տարի եղավ: Ամոբն էլ լավ բան է: Իսկ եթե ինքը Աղունը առողջարանի մասին լուրջ ասաց և ոչ թե պատահական՝ ուրեմն պետք է հարյուրի՝ սահմաններում մի տաքատ ու բաճկոն առնել: Գող ու լիրք Վալողն ահա հագուստի պահարանում ուր ձեռք տաքատ-բաճկոն է կախել:— Սա ամառային է, սա ձմեռային, սա աշնանային, քույրացու, հավանում է՝ իսկ Սիմոնի մի զույգ կոշիկը հազար ինը հարյուր երեսունվեց թվականից դեսը յուղվեց ու չորացավ, յուղվեց ու չորացավ, յուղվեց ու չորացավ առանց ոսք տեսնելու:— Ի՞նչ եմ ուզում եղ խեղճից, ի՞նչ, — խեղճելով գնաց Աղունը, — ի՞նչ կարող է անել, որ չի անում... ի՞նչ եմ ուզում եղ խեղճից, ի՞նչ...

Բոյսու թմբից Աղունը ետ նայեց՝ Մատուռի զարիթափում զայթող քայլերով գալիս էր Սիմոնը: ճանապարհը կարծես թե դուրս էր պրնում նրա ոտքի տակից և ամեն քայլափոխում պիտի ընկներ:— Մուրադենց տղերքին ձեռ առնեն ու քայլեն Մուրադենց տղերքի պես: Ին բախտն է:

Ավետօքի ջրաղացատեղերից Աղունը ետ նայեց՝ Սիմոնը թափ առած իջնում էր Բոյսու զարիթափը: Թափ առած իջնում է, թափով բարձրանում է՝ քայլ թե ահա կես ժամ է ետ է ընկել ու չի հասնում նրանց ետևից: Աղունը ձին պահեց ու կանչեց.

— Լավ, լավ, քեզ մի՛ սպանիր, կամաց արի: Երևանը տեղից չի փախչի, — մեկուսի ասաց Աղունը.— Էնպես էլ կարևոր-կարևոր գալիս է տեսնողը կասի կողոպուտի է գնում: Շուտ-շուտ, — ծղրտաց Աղունը:

Սիմոնը դեռ մի քանի քայլ էլ եկավ թափով, ապա դանդաղեց, ապա կանգ առավ: Կանգ առավ ու անշարժացավ ծառի պես, որ կտրված է մինչև վերջին ջիլը, քայլ ոտքի վրա մի պահ մնում է: Ուղեղը տաքացավ ու խառնվեց, և սրտից մինչև բերանը դառը դառնացավ: Սիմոնն ուզեց հայինել նրա ողջն ու սատկածը՝ չկարողացավ: «Դիմար, հիմարի գլուխ, — շշնջաց Սիմոնը, — ճիշտ եմ ասում»: Դրա համար էլ Աղունն ասում է, որ նա ու նրա ցեղը չգիտեն մարդավարի խոսել՝ ղրղում են կամ բառաչում:

— Գոմերում ձին կթողնե՞մ, եթե եկող եղավ՝ կտամ կբերի, եթե

Եկող չեղավ՝ Գոմերում կթողնե՞ն, Գոմերում կթողնեմ,— հստակ ու բարձր կանչեց Աղունը,— դու հոգնել ես, մի քիչ նստիր հանգստացի՞ր, հետո կամաց-կամաց կգաս, կամաց-կամաց կգա՞ս,— աշնան պայծառ օրվա մեջ հստակ ու մարդավարի զրնգաց Աղունն իր Վանքերի ձայնով:— Բեռը ճիշտ եք կապել՝ շնորհակալ ե՞ն, շնորհակալ ե՞ն:— Եվ ձին քշեց ու գնաց:

Մի քանի րոպե հետո Սիմոնը կարողացավ հայիոյել նրա ողջն ու սատկածը, իհմարությունը, իր անտղամարդ փափկերեսությունը, Արմենակ որդում և աշխարհում ամեն ինչ:

Աղունը երեխաների հետ սարում էր՝ խանութում շաքար էին տալիս: Սիմոնը փոնից մի իհնգ հաց վերցրեց, գնաց շաքար առնելու, որպեսզի ֆերմայի սայլի հետ սար ուղարկի: Տղերքը խանութում պատմում էին, թե ինչ կատակ է արել Ասորենց Մացակը Կիրովական: Ասորենց Մացակը, Կիրովական, խանութի վաճառող աղջկան ասել է եր կրծքակալն ի՞նչ արժե, ասել է տասմիհնագ ռուբի, ասել է դատա՞րկ: Շաքարը տալիս էին երեք կիլոգրամից, բայց Սիմոնը բուկը բռնեց, Արտոն նայեց տեսավ Սիմոնն է, ժողովրդին ասաց՝ մեր վարպետն է, բողքավոր չե՞ք: Ժողովուրդն ասաց՝ տուր, արժե: Յինգ կիլո շաքարն ու հացը սայլի հետ սար ուղարկեց՝ երեկո էր, կինո էին ցույց տալիս: Ակումբավար թմբիկ Օյան տոմսերը կտրում էր, ով անտոնս էր՝ նշում էր, որ անտոնս է, որպեսզի կոլտնտեսության դրամարկղից համապատասխանաբար, ուրեմն, գանձել տվյալ անտոնս անձի աշխօրի փողից: Ներս գնալիս Սիմոնը չկարողացավ իրեն զսպել, Օյային ասաց՝ ախչի, դեռ էնպե՞ս ես,— ու ժողովուրդը մի լավ ծիծաղեց: Դրանից հետո ով ներս էր գալիս, Օյային ասում էր՝ ախչի, դեռ հիյ՞ ես. ախչի, ե՞րբ ես ազատվում. ախչի, եր քանի՞ ամիս եղավ: Իսկ Օյան, ուրեմն, հղի չէր, միայն թե, ուրեմն, եղպես կարգին փորութամակ ուներ: (Յինա քոչել են ընտանիքով Կիրովական, ու ասում են ավելի է հաստացել): Օյան վերջը լաց եղավ ու, երբ նստեց Սիմոնի կողքին, Սիմոնը գրկեց նրա ուսը և ասաց, որ ուրեմն կատակ է արել, կատակից լաց չեն լինի: Եդ էլ ծիծաղի առանձին նյութ դարձավ, գոռացին թե՝ Սիմոնն Օյային գրկեց, Սիմոնն Օյային նորիլիզացրեց:

Կինոն վերջացավ՝ մութ ու տաք գիշեր էր, անկողնի պես: Ժողովուրդը ցրվում էր տները, մի կնոջ ձայն մթի մեջ կանչեց. «Վերի թաղից ո՞վ կա եկող. Սիմոն, չես գալի՞ս»: Մոտեցավ, աչքը մոտեց-

րեց աչքին՝ Սոնան էր:— Սիմոն, դու Ե՞ս, վախեցրիր,— ասաց: Գնացին, կողըներից ուրիշ տոնաձայն չկար:— Ախչի, մենակ Ե՞ս:— Բա ինչ եմ:— Բա երեխեքն ո՞ւր են:— Մեծը սարվոր է, ասաց, միջնեկն ուսումնարանից դեռ չի եկել, փոքրը Ծաթեր քեռոնց է գնացել:— Դե ասա ստերջ ես, էլի,— ծիծաղեց Սիմոնը: Սոնան չծիծաղեց, մթի մեջ քսվեց նրան և ցածր-ցածր ասաց:— Ես քեզ համար Օյան չեմ, գիտե՞ս:— Գերեզմանոցի ծորում ասաց՝ վախենում եմ, ու Սիմոնի թկը մտավ. վախով կրծքերով թե կոնքով հպվեց ու մի րոպե տաքացրեց Սիմոնի գլուխը:— Ես կողքիդ՝ ինչի՞ց ես վախենում:— Կամաց խոսիր,— շշուկով ասաց Սոնան, և Սիմոնը դրանից հետո չկարողացավ խոսել: Մի խոսքով, Սիմոնն այդ գիշեր տուն չգնաց: Իսկ աքլորականչին շորերը հագավ ու փախսավ: Սոնան քնած էր մորից մերկ, կեսը վերից վար բաց, աղջամուղի մեջ թուխ: «Ես՝ լիրը է հաստատ»: Սիմոնն ուզեց նորից հանվել, բայց թե լուսանում էր: Սիմոնը գնաց, պտտվեց լուր դրներին, ոտքով ջրի մարգը փոխեց, ուզեց թորիսիչը գտնել ու թորիսել կարտոլը (Աղունը շնորհակալ կլիմեր), բայց լորուսի կողքին այդպես էլ քնել էր: Արթնացավ լսեց, որ մեկը տաք ու լուր քոքում է շատ մոտիկ: Աչքերը բացեց՝ արկը խցկվեց աչքերը, Սոնան նստած էր կողքին, ծեղով խտուտել էր Սիմոնի վիզը: Արկը տաքացրել էր Սիմոնի գլուխը, խանձել էր շորերը. Վրա նստեց՝ գլուխը մի թերեւ պտտվում էր: Սոնան լուր ծիծաղում էր ու նրա կուրծքը թրթռում էր հագուստի հետ: «Ես լիրը Ե՞»: Սիմոնը գլուխ նրան և թաղվեց արկի ու գլխապտույտի մեջ:

— Դե, դե, դե, դե... անհարմար զգացեք, էլի,— կանչեց Սումբաթի ծայնը. Սումբաթն էն ժամանակ դեկավար էր:— Օրը ճաշ է դարձել՝ դեռ տանն եք, անհարմար զգացեք, էլի, դե-դե-դե-դե...

— Գնում եմ, գնում,— ասաց Փառանձեմի ծայնը,— Էն է գնում էի՝ երևացիր: Քիմա շարժվում եմ:

Սումբաթը կանգնած էր Մուրադենց թմբին, և նրանք այդպես անշարժ երկար մնացին լորուսի մոտ, քանի որ թմբի ուղիղ դիմացն էին և երես շարժվեին՝ Սումբաթը կտեսներ նրանց լորուսի մոտ պառկած: Թեթև տնքոցով լորու մարգը ծծում էր ջուրը, կարտոլը ծաղկում էր արևի տակ, խնձորները լրիկ սպասում էին տերևների մեջ, ծիծեռնակը ճռվողում ու սուրում էր երբեմն շատ ցածր, համարյա թե քսվում էր նրանց, հետո միանգամից ճկում ու թեքում էր սլացքը: Անտառը դանդաղ մթնում էր անցնող ամպերից ու դանդաղ բացվում:

- Դե լավ, շոգ է, խեղդվեցի...
- Փառանձեմի ետևից էլ չես հասնի:
- Փառանձեմի գլուխն էլ հողեմ, Սումբաթի գլուխն էլ:

Նա հավը բնից բռցրեց, բերեց ձվերը, կրակ վառեց, յուղ հանեց Աղունի կծուճից ու գովեց Աղունին այն բանի համար, որ հիմա հունիս էր, իսկ Աղունը դեռ ուներ անցյալ ամառվա յուղ. փափուկ յուղունու արեց ու հաց տաքացրեց: Մարանում հանկարծ մեղր գտավ շշի մեջ ու եկավ, պնդացրեց ձվածեղը, մեղր լցրեց ձվածեղի վրա: Եվ նատեց Սիմոնի դեմ ու լաց եղավ.

- Կնօքից վախենում եմ:
- Մեջքդ նրա մեջքից հաստ՝ ինչո՞ւ ես վախենում:
- Մարդն իրենն է, ես էլ էսպես անտեր շան պես սրա-նրա դռանը:
- Դե երեւ էտպես ամորի ներկայությունը կար՝ չանեիր եր բանը:
- Որ քո կինն ամեն օր է անում, եր լա՞վ է, օրենքո՞վ է:

Նա ասաց, որ դեռ պատերազմից առաջ հատակի տախտակ են սղոցել ու մինչև հիմա գոմի ծածկի տակ դարսած է, իսկ տան հատակն էտպես էլ մնում է տախտակելու, ի՞նչ է որ, մի երկու շաբաթվա իրիկուն-առավոտում կարվի: Եվ այդ հարցը Սիմոնի սրտին անհարմար նստեց. ուրեմն աշխարհը հաշվով է՝: Ամառվա այդ խիտ ժամանակ, գիշերը կարճ, գնա ու ուրագին արա: Թիսկրիսկոցն էլ հասնի սար՝ Աղունին: Աղունն էլ մի շտապ-շտապ մեջտեղ քաշի փողի հարցը: Դե հիմա արի բացատրի Աղունին, թե Արտոն ուր հարյուր չէր տալիք, այլ հազար հարյուր, Մուշեղը իր հերթին հազար հարյուր, իսկ ինքը դսեղեցի Մաքնոսին դեռ շատ վաղուց պարտք էր վեց հարյուր ոռւբլի և հիմա Մուշեղից ու Արտոյից վերցրել ու տվել է դսեղեցի չգիտեմ ում՝ որպեսզի հանձնի Մաքնոսին:

- Չե, Սոնա, դժվար հաշիվ է:
- Դե ես էլ կտամ փոքր Սիմոնին:
- Ի՞նչ անեմ, Սոնա, տուր:

Իրիկունը Սիմոնը գյուղամեջ էր իջնում՝ Սոնան տախտակը շրիկոցով դուրս էր տալիս գոմի ծածկից և բարձր-բարձր ասաց.

- Վարպետ, էգուց սկսում ե՞ս:

Յնձվորը հանդից վերադառնում էր, նրա տան մոտ էր, «Էս՝ վերջնակա՞ն լիրը է», – մտածեց Սիմոնը, մոտիկ բանջարանոցում Արոյենք բուկլիցում էին իրենց կարտողը: – Յա՛, սկսում եմ, ուզում ես՝ իենց գիշերս, – չար և ուղիշ մտքով ասաց Սիմոնը:

- Դե ժամանակն ամառ է, բա իհարկե գիշերները:

Սիմոնը ճանապարհի տակ նստեց, սպասեց բրիգադի անցնելուն, որպեսզի այդ լրին մի երկու տեղին խոսք ասի, իսկ Սոնան կանգնել էր ձեռքերը կոնքերին ու թաքուն ծիծաղում էր: Սիմոնի մոտենալու հետ նա ձեռքերը վար բերեց ու, երբ Սիմոնը կիա մոտեցել էր՝ նա նայում էր խռոված աղջկա նման: Նա Սիմոնին թողեց ճանապարհին ու գնաց կանգնեց դռանը. Սիմոնը գնաց դուռը՝ նա մտավ տուն: Մտավ տուն ու դերասանի լաց դրեց:— Ես մեղավո՞ր եմ, որ քո կնոջ մարդը եկել է, իմը չի եկել:

Եվ առհասարակ այսպես եղավ. Սիմոնը գյուղամեջ չգնաց. տախտակը կրեց դուռը և պատշգամբում դագգահ կապեց. տախտակի կեսը ռանդեց և կեսգիշերին գնաց քնեց տանը. առավոտյան սեղանին հաց ու հավ էր դրված. Սիմոնը կերավ ու գնաց կոլխոզ. իրիկվա կողմ անձրև սկսվեց ու այրաբես էլ չդադարեց. թաց ու ոտքերը ցավելով՝ Սիմոնը գնում էր տուն – Սոնան տարավ մերկացրեց, անկողին մտցրեց մերկ, որովհետև տանը տղամարդու մեջ չափսի փոխնորդ չկար, և լվաց ու չորացրեց նրա փոխնորդը. և արդուկեց, և արդուկած փոխնորդը տաք էր:

Անձրևները շարունակվեցին երեք օր, և դա թեկուզ մեղվի և առհասարակ բերքի համար վատ էր, բայց ընդհանրապես լավ էր, որովհետև Սիմոնը միայն մեկ գործի էր: Անձրևը շրիսկոցով խփում էր դիմացի անտառին, ծորը լցվել էր մեծ ջրի խշոցով, աշխարհը մի տեսակ խոլ ու փափուկ էր, Սիմոնը չոր ծածկի տակ ռանդում, կտրում ու մեխում էր: Իսկ Սոնան նստում էր ցած աթոռին և երբեմն ծիծաղում էր, բայց ավելի հաճախ լաց էր լինում, որովհետև եղանակը անձրևային ու սրտնեղիչ էր, և, նաև, եթե պատերազմ չլիներ՝ Սոնան էլ կունենար իր սեփական ամուսինը:

Այդ օրերին երկու անգամ միս եղավ. մեկ՝ Սոնայի փոքրը Շաբերից բերեց քեռու ուղարկածը, մեկ էլ՝ անձրևների պատճառով խնձոր եզր սայթաքել ու ընկել էր Կիրքարից:

Անձրևներից հետո միջնեկ տղան եկավ ուսումնարանից, և ամոր էր, որովհետև նա տասնվեց-տասնյոթ տարեկան տղա էր և կարծես թե հասկանում էր՝ որովհետև ամաչում էր, և այդ պատճառով էլ մի երկու օրից գնաց իբր Դիլիջանի ընկերների մոտ, բայց իրականում Կիրովական սիրած աղջիկ ուներ, նրա մոտ էր գնացել, այդպես էլ աղջկա ծնողները վերցրել ու նրան ամուսնացրել էին իրենց աղջկա հետ, իրենց սեմյակներից մեկը տվել նրան և աշխատանքի տեղափորել: Իսկ Սոնայի փոքրը, որ հայր չէր տեսել, քանի որ օրորոցում

Եր եղել՝ հորը տարել էին բանակ, – շան լակոտի պես փաթաթվում էր Սիմոնի ոտքերին, ամբողջ օրը նրա և նրա գործիքների հետ էր. Սիմոնն ու Սոնան ասում էին արհեստի սերն է, բայց արհեստինը չէր, այլ՝ հոր կարոտը, քանզի հիմա էլ, երբ Գործնուց պատահում է գալիս է, միամիտ մաքուր սրտով հարցնում է Սիմոնին. «Դիշում ե՞ս, հայրիկ, որ մեր տունը տախտակում էիր... որ իմ խեղճ մերը դեռ կար... իիշում ե՞ս, հայրիկ...»:

Այն օրերին, երբ դեռ հատակի գործը դեռ չէր վերջացրել, սարից լուր բերին, թե Աղունը հովիվների հետ կովել է անվայել խոսքերով, քանի որ Աղունի ջղային շունը հովիվներին դուր չի եկել, և հովիվները խեղճ ջղայինին տվել են ֆերմայի ամբողջ երեսուն գամփոի ռեխը: Եվ խորհրդածություն եկավ այն մասին, թե լավ կլիներ այլևս չբարձրանալ սեփական տուն, և առհասարակ լավ վարվեցին Եգոր և Յմայակ Եղբայրները՝ բանակից հետո իրենց կանանց դուրս գցելով և բերելով նոր կանայք, քանի որ այս պետության մեջ այնքան էլ կարիք չկա երեխաների որբության մասին մեծ մտահոգություն քաշելու, և ահա Սիրուշ կնոջից Եգորի Յրաշիկ տղան Կիրովական տուժ քար է տաշում և գործից հետո հագնում սպիտակ վերնաշապիկ և սև կոշիկներ: Եվ առհասարակ մարդուս բախտավորությունը իր տան խաղաղությունը և հարգանքն ու սերն է մինյանց նկատմամբ, որ բացակայելով բացակայում է ժայռատակի այդ ավերակում:

Տղերքը որոշ բանի հոտ կարծես թե առել էին, և հնձի տեղը ծիծաղեցին, և Եգորն ասաց. – Յը, Սիմոն, բարի լինի, գեղեցկացել ես, ին առողջարան-մառողջարա՞ն չես գնացել:

Սիմոնը ամաչեց, բայց ծիծաղեց ու պատասխանը տվեց ըստ արժանվույն.

– Բա ի՞նչ ես կարծում:

Կանայք որ՝ հասկացել էին: Լաշառ Շուշանը ջուր էր բերել, կանգնեց տղամարդկանց մեջ ու կանչեց. – Ում սիրտն է վառվում, – և ընդհանրապես ամաչկոտ Մարոն կանչեց կանանց խմբից. – Սիրահարների՝ սիրտն է վառվում, – և լաշառ Շուշանը ջրամանը ծեռքին եկավ դեպի Սիմոնը, ծիծաղելով եկավ դեպի Սիմոնը, ջրամանը տվեց Սիմոնին ու քրքռում էր, խուլ ու ներսում քրքռում էր մայշան ծիու պես: – Սեպերդ ինչի՞ ես բաց արել, – բարկացավ Սիմոնը, իսկ նա դարձյալ ծիծաղում էր: Յետո, կանանց վրա երգեցողություն էր իջել. նստում էին հանգստանալու ու երգում էին, սարից իրիկունն իջնում ու երգում էին, ձորից երամ-երամ բարձրա-

նում էին դանդաղ ու երգում էին, – և դա այն տարին էր, որ Եղբացի Արուսյակ քրոջ հարսանքով ներքել գյուղերից բերել էին ու շատ էին երգում թիֆլիսյան «Սուլիկո» քաղցր երգը, – և մեղադրելու չեր, որովհետև համարյա թե բոլորն անմարդ էին, քանի որ Շուշանի Անդրեն խփվեց Պրագայում, Մարոյի Աշոտը զորակայանից ուզեցել էր փախչի՝ Մանացի ծորում բռնել ու գնդակահարել էին 1942-ին, շատերը կորել էին անհայտ, և կանայք մտածում էին, թե նրանք իհմա Ամերիկա հեռու երկրում փողկապավորված կարոտում են Ծմակուտ գյուղի իրենց կանանց, բայց Սիմոնը լավ գիտի, որ բոլոր անհայտ կորածները խփվել են Կերչ քաղաքում:

Կարտոլի բերքահավաքին Աղունը Սոնային ուզեցել էր ծեծի՝ լաշառ Շուշանը բահն առած վրա էր քշել. «Այ ախչի, Է՞յ... գլուխու աշխատո՞ւմ է թե չէ: Յիտլերի դեմ մերոնք որ զրիվեցին՝ մենակ մեզ համար չզոհվեցին, ու ձերոնք էլ որ էղաքս ողջ-առողջ եկել են՝ մենակ ծեզ համար չեն եկել, Է՞յ...»: Եվ ինչպես էլ մտածում ես՝ այդ այդպես և միայն այդպես է:

Աղունը և դիմեց գյուղխորհուրդ և լոեց ու միաժամանակ սիրովացավ: Տեղը պնդացրեց ժայռատակի այդ ավերակում, որպեսզի հետո վրա տա ավելի չար ու սուր:

- Գյուղի ամուսինը: Գյուղի հանրային ամուսինը:
- Գնա, հանրային, – ասաց, – սիրուիիդ մեռել է, տախտակավորիր:

Եվ փառք աստծո, աստծուն հազար փառք, որ Կիրովականից դագաղով էին բերում, քանի որ անհարմար էր գնալ թաղմանը, որովհետև Աղունը չեր անաչի ու կօքար կաներ որևէ տգեղ անհամություն, այնինչ՝ դեռ դագաղն էլ ինքն էր սարքելու, քանի որ փոքր Սիմոնը այդպիսի դեպքերում գլուխն ազատում է, որովհետև չի կարելի դագաղը փողով սարքել: Ղազախից ֆերմայի համար քսան ծիաբեռ գարի էր բերվելու: Սիմոնը գյուղամիջում էր, ինքն իր կամքով լուռ խառնվեց գնացողներին ու երեք օր քացակայեց: Զիերը լղար էին, սարերում դեռ քանի ու ծյուն կար, ծորի ճանապարհը դեռ ցեխ էր – լավ տանջվեցին, քանի որ քսան ծիուն ուղեկցում էին Սիմոնով հինգ մարդ: Կեսգիշերին ծիերն ախոռավորվեցին, պարկերը քաշեցին պահեստ, ցրվեցին տները:

Գյուղը քնած էր մեծ կարմիր լուսնի տակ, բույրերը թեև գարնան էին, բայց ցուրտ էր և սրսուր ցեխ: Զնձաղիկների խնբերը նայուն էին լուսնալուսի միջից, շները մրափ էին մտել, բլուալանջի գերեզմանոցը նայում էր կարծես սուր ու լուռ: Սիմոնը մի քիչ սպասեց գերեզ-

մանոցի տակ,— այնտեղ թաղված էին կայծակնահար Եղիշը, պապ Հովհաննեսը, հորեղբայր Յովսեկը, հորեղբայրներ Եսային, Ասատուրը, Ակոփը. «Բոլորիս տեղն էլ էդ է,— ասաց Միմոնը և գնաց իր ճանապարհը,— ու երանի ձեզ և ոչ թե մեզ, ներողություն իհարկե, վատ խոսք ասացի»: Այնտեղ էին թաղված Սաքոն, Շողերը, Մանիշակ հորաքույրը, Ազատը, Արշակը, Նեսոն, Նեսոյենց Արշակը, բոլորը, և բոլորի վրա էլ անունով ու ազգանունով քար կա, Արշակի քարին արոր ու հրացան էլ կա, իբր և հողագործ է և որսորդ, թեև իրականում ոչ որսորդ էր, ոչ էլ կարգին հողագործ... իսկ երեսուներեսունինգ տարեկան քառասունութ տղամարդ մնաց անգերեզման սառնամանիքներում ու օտար անհայտություններում: Մահը սարսափելի չէ, որովհետև միշտ էլ տանում է մեր կողքիններին, իսկ ինքներս անմահ ենք: Միայն ափսոս է, որ աշխատող մարդիկ այդպիսով քշանում են, իսկ պլանը անընդհատ շատանում է:

Սոնայի տան մոտ Սիմոնը կանգ առավ, արահետը թեքեց, գնաց մոլորվեց գոմի ծածկի մոտ, որտեղ Սոնան շրիկոցով տախտակ էր թափում: Մորից մերկ Սոնան քնել էր վերմակի վրա և աղջամուղի մեջ թուխ էր: Ինչո՞ւ է աշխարհն այսքան հիմար, անհասկանալի և կեղտոտ: Սիմոնը մեխսվել էր Սոնայի տան մոտ, և նեղվածք ու ցուրտ էր, և ձգող ոչ մի տաք անկյուն չկար, քանի որ նա ուզում էր միայն Սոնային, իսկ Սոնան մեռած ու հողավորված էր, իսկ ժայռատակի տունը կոպիտ ու թշնամի էր Սիմոնին:— Սոնա,— քառաչեց Սիմոնը մտքում, որովհետև եթե բարձր բղավեր, հարևանները կարթնանային, շները կիաչեին, Աղունը կգար ու կկատաղեր իր անհամ կատաղությունը: «Սոնաաաա»:

Աղունը հասել էր Գոմեր, իր ասելով՝ տասը ժամ առաջ էր հասել, նստել ու լաց էր լինում, որովհետև ծին թեռան տակ մեղք էր, իսկ ինքը չէր կարող բեռնաթափել: Պարանների հանգույցները մի երկու տեղ թուլացրածի պես էին, մի տեղ կապը խճճել էր, ու նստել լաց էր լինում:

- Բա որ ասում եմ ես թեռը քո տանելու բան չի...
- Իբր թե դու ես մի առողջության տեր... Կգնաս ու կգաս՝ կիշվանդանաս,— լաց եղավ Աղունը:
- Որ ես հիվանդանամ խնամող կա, բա որ դու ես հիվանդանում:
- Ես երեխայի դպողոցին մի հետևկիր,— ասաց Աղունը,— վատ է սովորում վատ է սովորում: Բոլորը գլխներիս ժուռնալիստ չեն դառ-

նալու:

— Աղունիկ... Ասա՝ թող զագս չգնա, շտապ չի: Լսեցի՞ր:

ճանապարհի կեռմանում, Յովսի տակ, հանգած շարժիչներով մի պահ շխկթևկաց բեռնատար տաքսին, հետո ծածկվեց ճանապարհի հետ, կարծ զարդվերում դրդուց ու մարեց:

— Ին անունից հատուկ կասես: Կասես՝ խառնված էր, ժամանակ չընեցավ՝ գրությամբ ասելու, բայց քո հերը քեզ հատուկ խնդրեց, որ միառժամանակ զագս չգնաս:

— Թե ինչներին է պետք... Թե ինչներին է պետք: Ոչ իր էն հազարներից է մի կոպեկ քեզ հասնելու, ոչ էլ անունն է քոնը և ոչ էլ՝ լավ լինի, վաստ լինի՝ հարսն է քոնը լինելու: Տվեցիր քաղաքին՝ պրօճակ գնաց: Աղջկանիցդ տեղեկություն ունե՞ս: Տղեդ էլ նույնը:

— Դիմար-հիմար քիչ խոսիր:

— Կտեսնենք:

— Այսինքն՝ ինձ հատուկ բախտ է վիճակված:

— Ոչ մեկի գլուխն էլ յուղումեղորի մեջ չի:

— Ինը հատկապես: Շոֆերին ասել եմ, կողքին քեզ համար պիտի տեղ պահած լինի. բեռներդ վերև դնենք, դու շոֆերի կողքին նստիր, հանգիստ կլինես:

— Այո... խելքը՞դ... բեռներս վերև դնեմ՝ հովտեցիք նստելու փափուկ տեղ գտնեն:

Մեքենան արգելակվեց: Բրեգենտի տակ լիքը ժողովուրդ էր: Վարորդը խցից ելավ, եկավ Սիմոնին օգնելու և Աղունին ասաց.

— Դու գնա նստիր կողքիս, տիկին Աղավճի:

Նա հետևեց, որ բեռները զգույց դնեն վերև և մտածեց. որ այդ Արմենի անունին են հարգանք մատուցում կամ Վալոդ Եղբոր, թե չէ ով է հարգում այս փայտ կրծողին, և բեռների ետևից չարչարվելով բարձրացավ թափք:

— Շնորհակալ եմ, տղա ջան, բենզինի հոտը գլխիս է խփում:

— Կասես, իմացա՞ր,— ասաց Սիմոնը:

— Ի՞նչը:

— Են, որ քեզ ասացի:

— Ի՞նչը:

Ճանգած շարժիչով՝ մեքենան գլորվեց ձորը, դրդուց-դրդուց, ետ գնաց ու բարձրացավ — Սիմոնը ձիու կողքին կանգնել էր ու ձեռքը բարձրացրած նայում էր, թե բան էր ասում: